


# Bwile Bible Translation



Bwile: Bwile Bible Translation (Bible)

## Bwile Bible Translation

### Bwile: Bwile Bible Translation (Bible)

copyright © 2025 The Word for the World International

Language: (Bwile)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-08

---

PDF generated using Haiola and XeLaTeX on 8 Jul 2025 from source files dated 8 Jul 2025

3cb4ea97-87a2-5d11-9a6a-710ef2de6afb

## Contents

MATEYO . . . . .	1
2 Tesalonika . . . . .	36
YAKOBO . . . . .	38

## IMBILA NSUMA VALEMBELE MATEYO

### UBULONDOLOSI

Imbila Nsuma ukulingana na Mateyo kitabo kimo mufitabo fine mukipingo kipywa ikilondolola ubwikasi bwakwa Yesu Klistu. Ifi fitabo kila kimo bakita ilandwe. Ikileplibula Imbila Nsuma. Fyalembelwe panuma yamfwa yakwa Yesu kuli Mateyo, Mako, Luka na Yohani. Abamasambililo tabaisiba ubusiku bwakisinku buntu iki kitabito kyalembelwepo lelo kitunganisiwa ukuti nimunsita ya 60 AD. Kibili nenkende intu kyalembelwepo tayaisibikwa lelo kitunganisiwa ukuti ni mu Palesitini nangu mumusuba wa Yerusalem.

Kalemba ni Mateyo uwali kasonkesya wamusonko lintu Yesu talamwita ukuba umusambi. Limbi isina lyakwe bamwisibe nga Lebi. Mateyo ali niumo pabatumwa ikumi nababili kibili alembel bakabelenga baba Yuda. Ifi kuti fyamonwa fysuntinkanya amalembo yamukipingo kya kale. Ayalefwaya ukulangilila ukuti Yesu ali ni Klistu, Umupususi uwasalwa na Lesa, uo balesesemapo. Nakibili Mateyo alilembele ifingi Pabufumu bwakwa Lesa. Abayunda baleenekela Klistu ukwisaiba Imfumu yabufumu bwafikansa. Mateyo alesonsomba apakalamba fintu basum-inemo Abayuda mukulondolola Ubufumu bwakwa Lesa ubwamumupasi.

Imbila Nsuma ukulingana na Mateyo kitabo ikisuma ukwambilapo mukipingo kipywa pamulandu nafintu kyasuntinkanya kumalembo yamukipingo kyakale. Kyasuntinkanya ifipingo fibili. Abamasambililo basumina ukuti aleesa ukupasyanya imilembele yafitabo fyakwa Mose ifili fitabo fisano ifyabalilapo mukipingo kyakale.

### Imilandu yatantama ngefi

Mateyo ayambile Imbila Nsuma mukulondolola pakufyalwa kwakwa Yesu Klistu nokutendeka kwa bupyungisi ikipande (1-4)

Ikyakonkapo Mateyo aloondolola papubyungisi bwakwa Yesu nama-fundisyo ayengi ikipande (5-25)

Mukipande kyakulekelesya aalandile papubyungisi bwakwa Yesu mumfwa yakwe namukusykuka (26-28)

*Ifikolwe fyakwa Yesu Klistu  
(Luka 3.23-38)*

<sup>1</sup> Mu emwakananine ifikolwe fyakwa Yesu Klistu, umwana wakwa Davidi, uwali mwana wakwa Abulahamu.

<sup>2</sup> Abulahamu aafyele Isaaki na Isaaki aafyele Yakobo, na Yakobo aafyele Yuda nabamunina.

<sup>3</sup> Kibili Yuda aafyele Paresi na Zara uwaku Tama na Faresi aafyele Esrom, kabilo Esrom aafyele Ramu.

<sup>4</sup> Kibili Ramu aafyele Aminadabu, Na Aminadabu aafyele Naashoni, na Naashoni aafyele Salumoni,

<sup>5</sup> Na Salumoni aafyele Boazi muli Rahabu, na Boazi aafyele Obedi muli Ruti, na Obed aafyele Yesse,

<sup>6</sup> Na Yesse aafyele Davidi imfumu, kibili na Davidi imfumu aafyele Solomoni uwali mwana wamukasi wakwe uwaku Uriyasi.

<sup>7</sup> Kibili Solomoni aafyele Rehoboam, Rehoboam aafyele Abiya, na Abiya aafyele Asa,

<sup>8</sup> kibili Asa aafyele Yehoshafati, na Yehoshafati aafyele Yoram, na Yoram aafyele Usaya,

<sup>9</sup> Kibili Usaya aafyele Yotamu, na Yotamu aafyele Ahazi, na Ahazi aafyele Hezekiya,

<sup>10</sup> Kibili Hezekiya aafyele Manasse, kibili Manasse aafyele Amoni, kibili Amoni aafyele Yosiya,

<sup>11</sup> Kibili Yosiya aafyele Yekoniya nabamunina, munsita bapiitilwe mu Babiloni.

<sup>12</sup> Kibili panuma babapiita mu Babiloni, Yekoniya aafyele Shiyaliteli, na Shiyaliteli aafyele Zerubabele,

<sup>13</sup> Kibili Zerubabele aafyele Abiudi, na Abiudi aafyele Eliakimu, na Eliakimu aafyele Azori,

<sup>14</sup> Kibili Azori aafyele Zadoki, na Zadoki aafyele Akimu, na Akimu aafyele Eliyudi,

<sup>15</sup> Kibili Eliyudi aafyele Eleyaza, na Eleyaza aafyele Matani, na Matani aafyele Yakobo,

<sup>16</sup> Kibili Yakobo aafyele Yosefu muka Mariya, uwafyele Yesu uwitwa Klistu.

<sup>17</sup> Eikyo papitile inkulo ikumi nashine ukufuma pali Abulahamu ukufika pali Davidi, kibili ikumi nashine ukufuma pali Davidi ukufika mibusya mu Babiloni, kibili ikumi nashine ukufika mukufyalwa kwakwa Klistu.

*Ukufyalwa kwakwa Yesu Klistu  
(Luka 2.1-7)*

<sup>18</sup> Ifi efintu ukufyalwa kwakwa Yesu Klistu kwali. Nyina Mariya aimenwe kuli Yosefu, lelo ilyo tabalaupana asangilwe ukuti, ali nokukwata umwana ukupitila ku maka yakwa Mupasi Wamusilo.

<sup>19</sup> Yosefu ali mutu uwalekitia ifyalungama, eikyo talefwaya ukumukanina palwalala kibili aalepinga ukubwesya ubwimashi mubumfisolo.

<sup>20</sup> Kilya aletontonkanya palifi, malaika wa Mfumu amonekele kuli ena mukiloto

nokumweba ukuti, "Yosefu, wemwana wakwa Davidi, witiina ukuupa Mariya. Pantu umwana Mariya akakwata akafuma kuli Mupasi Wamusilo."

<sup>21</sup> Akakwata umwana umwaume kabiili ukamwinike ukuti, "Yesu pantu akapusya abantu bakwe kumembu syabo."

<sup>22</sup> Fyonse ifi fyakitike pakuti fintu Imfumu yalandile ukupitila muli kasesema fifikilisyen ukuti,

<sup>23</sup> "Nakisungu akemita nokukwata umwana umwaume kabiili akenikwa Imanuele" (ikileplibula ukuti, "Lesa ali nafwebo").

<sup>24</sup> Eikyo lintu Yosefu asibwike, akitile fintu malaika wa Mfumu amukonkomesye eikyo aupile Mariya.

<sup>25</sup> Lelo tabakumenepo mpaka umwana afyalwa elo Yosefu amwinika ukuti Yesu.

## 2

### *Abamano ukufuma kukabanga*

<sup>1</sup> Lintu Yesu afyelwe mu musumba wa Betelehemu mu Yudeya, munsita Herodi ali imfumu, abamano ukufuma ku kabanga baisile ku Yerusalemu

<sup>2</sup> nokwisaipwisya ukuti, "Alipi umwana afyelwe Imfumu yaba Yuda? Twakimona ulutanda lwakwe lintu lwakisa kukabanga, twaisa mukumusinsimuna."

<sup>3</sup> Lintu imfumu Herodi yaumfwile ifi, yalisakamene kumofye nabantu bambi mu Yerusalemu.

<sup>4</sup> Yaitile basimapepo mukalamba bonse naba kafundisya bamacfunde nokubepusya kuntu Klistu ali nokufyalilwa.

<sup>5</sup> Bayaswike ukuti, "Mumusumba wa Betelehemu mu Yudeya. Pantu ifi efintu bakasesema baalemba ukuti,

<sup>6</sup> "Iwe we Betelehemu mukyaloy kya Yudeya,

wilaimona ukukepesyapo pamisumba syamu Yudeya,

Pantu muli webo mukafuma intungulusi ikatungulula abena Israeli."

<sup>7</sup> Elo Herodi aitile abamano abafumine kukabanga mubumfisolo, ukuti awailisyen kuli bena insita ulutanda lwamoneke.

<sup>8</sup> Abatumine ku Betelehemu nokubeba ukuti, "Kabiyen'i kafwayeni umwana bwino bwino, ngamwamusanga mungisibisyen pakuti nanebo ndeyamusinsimuna."

<sup>9</sup> Abamano abafumine kukabanga baumfwile fintu imfumu yabebele nokuya. Kabiili nolutanda luntu bamwene kukabanga lwatampile ukubatangilila mpaka lwainina pankende apaali umwana.

<sup>10</sup> Balitemenwe ngansi lintu bamwene ulutanda.

<sup>11</sup> Baingile munjanda, kabiili lintu bamwene umwana nanyina Mariya

bafukeme pansi nokumusinsimuna. Bamuleetele ifyabupe baisile nafyo ifya golide, ububani na murrh.

<sup>12</sup> Pamulandu balisokelwe mukiloto ukuti bekabwelulukila kuli Herodi, baile ku kyalo kyabo ukubomfyia insila imbi.

### *Ukufukila ku Egipiti*

<sup>13</sup> Panuma abamano baaya, malaika wa Mfumu amonekele kuli Yosefu mukiloto nokumweba ati, "Herodi alatampa ukufwaya umwana pakuti amwipaye. Eikyo ima piita umwana na nyina myue ku Egipiti, mukekale kulya kwine mpaka nkankwebe ukufumako."

<sup>14</sup> Yosefu aimine nokupiita umwana nanyina nokuya ku Egipiti ubusiku,

<sup>15</sup> uko aikelle mpaka Herodi awfa. Ifi fyali kufikilisyen ifyo Imfumu yalandile ukupitila muli kasesema ukuti, "Naite Umwana wandi ukufuma mu Egipiti."

### *Ukwipaya kwabaana*

<sup>16</sup> Lintu Herodi ailwike ukuti abamano nabamuteya, alisakamene. Akonkomesye ukwipaya abana abaume mu Betelehemu nabapalamineko abakwete imyaka ibili nokuya pesamba, akitile ifi ukulingana nensita intu asambilile kubamano.

<sup>17</sup> Muli iyi nsila ifyalandile kasesema Yeremaya fyalifikilisyen ukuti,

<sup>18</sup> "Ikiunda kyaumfwikile mu Ramah, ikiunda kyaulelosya mubukali. Rashele alelila abaana, nakana ukumutalalika pantu nabafwa."

### *Ukubweluluka ukufuma ku Egipiti*

<sup>19</sup> Panuma Herodi awfa, malaika wa Mfumu amonekele kuli Yosefu mukiloto mu Egipiti

<sup>20</sup> nokumweba ukuti, "Ima, piita umwana nanyina ubwelelemo ku Israeli pantu abaalefwaya ukwipaya umwana nabafwa."

<sup>21</sup> Eikyo Yosefu aimine nokupiita umwana nanyina nokubwelela ku Israeli.

<sup>22</sup> Lelo lintu Yosefu aumfwile ukuti Ake-lausi napyana wisi Herodi pabufumu mu Yudeya, alitinine ukuyako. Kibili apo balimusokele mukiloto aile mukitungu kya mu Galili.

<sup>23</sup> Aileikala mu musumba wa Nasareti pakuti ifyalandile bakasesema fifikilisyen ukuti, "Aketwa umwina Nasarene."

## 3

### *Ubusimikilo bwakwa Yohani Kabatisya (Mako 1.1-8; Luka 3.1-18; Yohani 1.19-28)*

<sup>1</sup> Muli silya nsiku Yohani Kabatisya aisile alesimikila mukiswebebe kyamu Yudeya.

<sup>2</sup> Alandile ukuti, "Lapileni, pantu Ubu-fumu bwa mumulu nabupalama!"

<sup>3</sup> Yohani emuntu Ezaya aalelandapo ukuti,

"Isiwi lyaulebilikisa mukiswebebe liletí,  
'Pekanyeni insila ya Mfumu  
olololeni umwakupita!'"

<sup>4</sup> Insalu syakwa Yohani syapangilwe namasako yangamali, mumusana alekakamo umusipi wampapa kibili makanta nobuki efyakulya aleya.

<sup>5</sup> Abantu baisile kuli ena ukufuma ku Yerusalem, ku fitungu fyonse ifyamu Yudeya naku kyalo kyapalamina no mulonga wa Yodani.

<sup>6</sup> Baleyebelela imembu syabo kibili alebabatisya mumulonga wa Yodani.

<sup>7</sup> Lintu Yohani amwene Abafalise naba Saduki abengi baleisa mukubatisiwa abebele ukuti, "Mwensoka mwe! Ninani amyebele ati kuti mwafyuka ukukandwa kuntu Lesa ali nokutuma?

<sup>8</sup> Kiteni ifintu ifilelangisya ukuti mwafuma kumembu syenu.

<sup>9</sup> Kabilii mwilatontonkanya ati, kuti mwafyuka ukukandwa mukulanda ati Abulahamu kikikolwe kyenu. Ndemyeba nati Lesa muli aya mabwe kuti afumyamo abaana bakwa Abulahamu!

<sup>10</sup> Isembe naliyipekanya ukuputula ifimuti kumisila, fyonse ifimuti ifisitwala fisabo ifisuma kufitema nokufiposa mumulilo.

<sup>11</sup> Namibatisya namensi mukulanga ukuti namulapila imembu syenu, lelo uwamaka ukunkila alinokwisa kibili nebo nsilingile nokupiita indyato syakte. Akamibatisya na Mupasi Wamusilo elo nomulilo.

<sup>12</sup> Ali nolupe lwakwelelako muminwe yakwe. Akafumya imisungu pamusolo. Akatutila Injano mubutala bwakwe. Imisungu akoca mumulilo ushishima."

*Ukubatisiwa kwakwa Yesu  
(Mako 1.9-11; Luka 3.21,22)*

<sup>13</sup> Yesu afumine ku Galili nokuya kumulonga wa Yodani mukubatisiwa kuli Yohani.

<sup>14</sup> Lelo Yohani alyesesye ukuti amukanye. Amwebele ukuti, "Niwebo ulingile ukumbatisya, nomba nikinsi waisila kuli nebo?"

<sup>15</sup> Lelo Yesu ayaswike ukuti, "Leka kibe ififine pali nomba. Pantu muli iyi nsila ninsi twafikilisya ubulungami bonse." Elo Yohani asumina.

<sup>16</sup> Lintu Yesu abatisiwe, kilyafye afuma pamensi umulu walisiwe, kibili amwene Umupasi wakwa Lesa uletentemuka nge nkunda waikala napali ena.

<sup>17</sup> Nesiwi lyafumine mumulu ukuti, "Uyu mwana wandi untu natemwa kibili muli ena emombokelwa."

## 4

*Yesu atunkwa*

*(Mako 1.12-13; Luka 4.1-13)*

<sup>1</sup> Elo Umupasi watungulwile Yesu mumatalolo mukutunkwa kuli Kiwa.

<sup>2</sup> Panuma yakufunga insiku amakumi yane akasuba nobusiku, Yesu alyumfwile insala.

<sup>3</sup> Kiwa aisile kuli Yesu nokumweba ukuti, "Ngoli Mwana wakwa Lesa, eba aya ambwe yasanguke umukate."

<sup>4</sup> Lelo Yesu ayaswike ukuti, "Kyalembwa ukuti, 'Tekumukate kweka umuntu engabala no mweto, lelo nikwisiwi lyonse ilifuma mukanwa kakwa Lesa.'"

<sup>5</sup> Kabilii Kiwa apitiile Yesu ku Yerusalem mu musumba wamusilo, amuninike pamulu wamutenge we Tempele,

<sup>6</sup> nokumweba ati, "Ngoli Mwana wakwa Lesa ipose pansi, pantu kyalembwa ukuti, "Lesa akeba bamalaika bakwe ukukubaka; bakakwimya muminwe yabo, pakuti wikaipuntula kumabwe."

<sup>7</sup> Yesu ayaswike ukuti, "Kyalilembwa nakabili ukuti, 'Wilaesyia Imfumu Lesa obe.'

<sup>8</sup> Kabilii Kiwa atwele Yesu palupili ulitali nokumulangisya amabufumu yapesonde mubkalalamba bwayako.

<sup>9</sup> Nokumweba ati, "Fyonse ifi ndekupela ngawamfukamina nokunsinsimuna."

<sup>10</sup> Yesu amwaswike ukuti, "Kabiye uko, Kiwa! Kyalilembwa ukuti, 'Ulesinsimuna Imfumu Lesa obe kabilii ekafye eo ulepyungila.'

<sup>11</sup> Kiwa asile Yesu kibili nabamalaika baisile nokwisa mupyungila.

*Yesu atampa imilimo yakwe mu Galili  
(Mako 1.14-15; Luka 4.14-15)*

<sup>12</sup> Lintu Yesu aumfwile ukuti Yohani nabamwingisya mukifungo, aile ku Galili.

<sup>13</sup> Afumine mu Nasareti, ailekala mu Kapenamu, umusumba wakumbali ya munama wa Galili mukyalo kya Zebuluni na Nafutali.

<sup>14</sup> Ifi fyakitike mukufikilisya fintu kasessema Ezaya alandile ukuti,

<sup>15</sup> "We Zebuluni nawe Nafutali, mwefyalo fyabela mumbali ya Bemba, kwisilya lyamulonga wa Yodani. We Galili wa Bena fyalo!"

<sup>16</sup> Abantu abaikala mumfimfi nabamona ulubuto ulukalamba.

Abo abekala mukinsingwa kyamfwaa ulubuuto nalubasanikila."

<sup>17</sup> Ukufuma pali ilya nsita, Yesu ayambile ukusimikila ukuti, "Lapileni, pantu Ubumfumu bwamumulu nabupalama!"

*Yesu aita abasambi bakwe  
abakubalilapo*  
(*Mako 1.16-20; Luka 5.1-11*)

<sup>18</sup> Lintu Yesu aleenda mumbali yamuma wa Galili, amwene bamunina babil Simoni (uwaleitwa Petelo) namunina Andereya baleteya amakonde pantu baali bashila.

<sup>19</sup> Yesu abebele ati, "Nkonkeni nkamikita ukuba abashila babantu."

<sup>20</sup> Palyapene basile amakonde nokuya nao.

<sup>21</sup> Yesu aendelelekofye ikyalinga nakabili amona Yakobo na Yohani abana bakwa Zebedee. Baali mubwato na wisi Zebedee balelunda amakonde. Yesu alibetile,

<sup>22</sup> kabilo palya pene basile ubwato na wisi nokuya nao.

*Yesu afundisya, asimikila nokundapa  
(Luka 6.17-19)*

<sup>23</sup> Yesu aile mu Galili monse, mukufundisya muma sinagogi, ukusimikila Imbila Nsuma Pabufumu nokundapa amawele yamisango misango.

<sup>24</sup> Ilyasi lyapali ena lyasabankene munkyallo kya Silya kyonse, ikyakutu abantu balemuletela bonse abaali nabawala, abalekyusiwa kumalwele yamisango misango, abaakwete ingulu, abakifulubi nababulebe nao aalibondepe bonse.

<sup>25</sup> Ibumba lyalimukonkele ukufuma ku Galili namu Dekapolisi, ukufuma ku Yerusalem, ku Yudeya nabusilya bwa Yodani.

## 5

*Amafunde yapa lupili  
(5.1—7.29)*

<sup>1</sup> Lintu Yesu amwene ibumba ilikalamba aninie mumbali yalupili emo aile ikala. Abasambi bakwe balimukolongene,

<sup>2</sup> kabilo atampile ukubafundisya ukuti.

*Amapaaloo yakine  
(Luka 6.20-23)*

<sup>3</sup> Balipalwa abapiina mumupasi; pantu Ubufumu bwamumulu bwabo!

<sup>4</sup> Balipalwa abaloosya; pantu bakakoselesiya.

<sup>5</sup> Balipalwa abamutembo; pantu bakapokelela fintu Lesa alaya!

<sup>6</sup> Balipalwa abansala nekilaka kyakukita ubulungami;

pantu Lesa akalenga bakekute.

<sup>7</sup> Balipalwa abaluse, pantu nabo bakabelelwa uluse!

<sup>8</sup> Balipalwa abasanguluka imitima, pantu bakamona Lesa.

<sup>9</sup> Balipalwa abaapanga umutende; pantu baketwa abana bakwa Lesa!

<sup>10</sup> Balipalwa abo abapakasilwa pamulandu wabulungami,

pantu Ubufumu bwamumulu bwabo!

<sup>11</sup> Muli abapalwa, abantu ngabamituka nokumipakasa nokumibepesya ubufi bwamisango misango pamulandu wandi.

<sup>12</sup> Beni abansansa kabilo temweni pantu ikilambu kyenu ikikalamba kyasungilwa mumulu. Ifi efintu bakasesema abaliko kale bapakeswe.

*Umukele nolubuto  
(Mako 9.50; Luka 14.34-35)*

<sup>13</sup> Muli mukele wa pano isonde. Nomba umukele ngawaonaika kuti walowesiwa kuli kinsi? Taukwata milimo nakabili, kuoposafye abantu baunyantapo.

<sup>14</sup> Muli lubuto lwa pano isonde. Umusumba uwakulwa palupili teti ufiswe.

<sup>15</sup> Takuli uwasya ilampi nokukupikapo ulweso, lelo babika apasansasama pakutiibusye bonse munjanda.

<sup>16</sup> Lekeni ulubuto lwenu lusanike pa bantu, pakuti bamone ifintu ifisuma mukita nokulumbanya Wisinwe Mumulu.

*Amafundisyo yapa Mafunde yakwa Mose*

<sup>17</sup> Mwilatontonkanya ati naisa mukonaula Amafunde yakwa Mose nangu bakasesema, nsyaisa mukuyapwisa lelo naisa mukuyafikilisy.

<sup>18</sup> Ndemyeba ikine kine nati, umulu nekyalo fikapita lelo ndemilaya nati takwakonaike ikilembo nangu kalitonu mu Mafunde mpaka fyonse fikafikilisy.

<sup>19</sup> Eikyo kansi onse uwatobapo limo pamafunde nangu lingakyepa syani, nokufundisya abantu bambi ukukita fimofine aketwa umunono Mubufumu bwa mumulu. Lubali lumbi nakabili onse uwasunga ifipope nokufundisya baambi ukukita fimofine, akaba umukalamba Mubufumu bwa mumulu.

<sup>20</sup> Ndemyeba nati tamwakengile Mubufumu bwa mumulu ubulungami bwenu ngatabwakakile ubwaba Falise naba Kafundisya bamafunde.

*Ifundisyo pakufulwa  
(Luka 12.57-59)*

<sup>21</sup> Mwalyumfwा ukuti ifikolwe bafyebele ati, "Mwilaipaya kabilo naonse uwaipayana awfile atwalwa mukupingulwa."

<sup>22</sup> Lelo ndemyeba ukuti onse uwafulilwa munyina alingile ukumutwala mukupingulwa. Kabilo onse uwatuka munyina akatwalwa kukilye, naonse uwaita munyina ukuti kiwelewele akaba mubwafya bwa mulilo waku Gehena.

<sup>23</sup> Eikyo ngoli pakutula ikyabupe pakipailo kyakwa Lesa, elo waibusya ati munonko nakukwatila ikintu kumukosi,

<sup>24</sup> sya ikyabupe kuntansi yakipailo, kabiye muleyawikisyanya elo wise uutule ikyabupe kuli Lesa.

<sup>25</sup> Umfwaneni bwangu bwangu nomuntu ukweteko imilandu lintu mukili muleya nankwe mukulubulula. Pantu kuti ayakutwala kuli kapingula, nao kapingula akutwala kuli kapokola kabilii ukabikwa mukifungo.

<sup>26</sup> Ndimukumyeba ikine kine nati, ukekala mulya mpaka ukalipe nolupiya lobe lonse ulwakulekelesya.

#### *Ifundisyo pa bukende*

<sup>27</sup> Mwalyumfwa fintu kyalandilwe ukuti, "Mwilakita bukende."

<sup>28</sup> Lelo ndimukumyeba ati, onse uwalolesya umwanakasi nolunkumbwa lubi ninsi nakita kale ubukende mumutima wakwe.

<sup>29</sup> Eikyo ilinso lyobe ilya kukulyo ngalyakulenga ukubembuka, lilobole nokuliposa! Kyawamisyapo ukulufya ikilundwa kimo ikyakumibili obe ukukila umubili obe onse ukuposwa ku Gehena.

<sup>30</sup> Ukuboko kobe ukwa kukulyo Ngakwakulenga ukubembuka, kuputule nokukuposa! Kyawamisyapo ukulufya ikilundwa kimo ikyamubili obe ukukila umubili onse ukuposwa mu Gehena.

#### *Ifundisyo palwa kulekana mufyupo*

(Mateyo 19.9; Mako 10.11-12; Luka 16.18)

<sup>31</sup> Kyalilandwa nakabili ukuti, "Onse uwaleka umukasi wakwe awfile ukumupa ikipepela kyakupwilapo ikyupo."

<sup>32</sup> Lelo ndemyeba ukuti uyo onse uwasya umukasi wakwe pamulandu uusili wabukende ninsi amulenga ukuba umukende. Kabilii naonse uwaupa umwanakasi baleka nao ninsi akita ubukende.

#### *Ukufundisya pamilapo*

<sup>33</sup> "Kabili mwalyumfwa ukuti ifikolwe bafyebele ati, 'mwilalapa bufi lelo mulefikilisyia fintu mwalaya ku Mfumu ukukita.'

<sup>34</sup> Lelo ndemyeba ukuti, Mwiilalapa pakulaya, mwilalapa ku myulu pantu kipuna kya bufumu ikyakumibili.

<sup>35</sup> mwilalapa pesonde, pantu ekipuna kyamakasa yakwa Lesa, nangu pali Yerusalemu pantu musumba wa Mfumu nkalamba.

<sup>36</sup> Mwilalapa napamutwe wenu pantu tekuti mupange umusisi nangu umo ukubuta nangu ukufita.

<sup>37</sup> Mulelandefye ukuti, 'Ee' nangu 'Awe' ifintu fimbii fintu mulanda fifuma kumubifi."

#### *Ifundisyo palwa kilandushi*

<sup>38</sup> "Mwalyumfwa fintu kyalandwa ukuti, 'Ilinsio pe linso, kabiye iliino peliino.'

<sup>39</sup> Lelo ndemyeba ukuti, mwilalandula umuntu ngamilufyanya. Umuntu ngakuuma ulipi kwitobo lyakukulyo leka akume nakwitobo lya kukuso.

<sup>40</sup> Kabili umuntu ngakutwala kukilye pakufwaya ukukupoka insalu yobe leka apiite ne koti lyobe.

<sup>41</sup> Umuntu ngakupatikisyia ukuya nao umulundu umo, kabiye nao imilundu ibili (2 km).

<sup>42</sup> Umuntu ngakulomba ikintu mupele kabilii ngalefwaya ukumwasima ikintu mwasime."

#### *Ukutemwa abalwani*

(Luka 6.27-28,32-36)

<sup>43</sup> "Mwalyumfwa ati kyalandwa ukuti, 'Muletemwa ababiyo, mulepata abalwani benu.'

<sup>44</sup> Lelo ndemyeba ukuti temweni abalwani benu kabilii mulepepela abamipakasa,

<sup>45</sup> pakuti mube abaana bakwa Wisinwe mumulu. Pantu aleka akasuba kakwe ukubala pa bantu abaabi na paba-suma fimofine, kabilii alokesya imfula pa-balungami napababembu.

<sup>46</sup> Nikinsi Lesa engamilambwila ngamwatemwafye abamitemwa? Pantu nabakasonkesya bamusonko nabo balakita ifyofine!

<sup>47</sup> Kabili ngamuposyafye bakibusa benu busye ninsi namukitapo ubupusano? Nabenafyalo nabo balakita ifyofine!

<sup>48</sup> Mube abapwililika ngafintu Wisinwe mumulu aba uwawililika."

## 6

#### *Ifundisyo palwa kwafwako abalanda*

<sup>1</sup> "Kengeleni, mwilakita ubulungami pa menso ya bantu bambi pakuti bamimone, pantu ngamwakita ifyo tamwakapokelele kilambu kuli Wisinwe wa mumulu.

<sup>2</sup> "Eikyo kansi ilyo mwapelaa ikintu kumubusu, mwilasabankanya ngafintu bamumbimunda bakita mama sinagogi na mumisebo. Bakita ifi pakuti abantu babalumbanye. Ndemyeba ukuti balipokelela kale ikilambu ikyakumanina.

<sup>3</sup> Lelo lintu mulepela, mwileka ukuboko kwenu ukwa kukuso kwisibe ifilekita ukuboko kwa kukulyo.

<sup>4</sup> Pakuti ukupela kwenu kubo ukwa munkama kabilii na Wisinwe uumona munkama akamilambula."

#### *Ukufundisya pe pepo*

(Luka 11.2-4)

<sup>5</sup> "Lintu mulepepa, mwilaba nga babumbimunda abatemwa ukwiminina

mumisebo na muma Sinagogi, pakuti babamone kubantu. Ndemyeba nati balipokelela ikilambu kyabo mukukumanina.

<sup>6</sup> Lelo ilyo mulepepa, ingileni mukyumba kyenu mwisaleko ikiibi nokupepa kuli Wisinwe usimoneka. Kibili na Wisinwe umona ifyamunkama akamilambula.

<sup>7</sup> "Kibili ngamulepepa mwilabomfy amasiwi ayengi ayabula ubuyo ngafintu Abena Fyalo bakita. Batontonkanya ukuti Lesa elo engomfwa amapepo.

<sup>8</sup> Mwiba ngabena, pantu Wisinwe alisiba fintu mufwaya lintu tamulamulomba.

<sup>9</sup> Ifi nomba efyo mufwile ukupepa:

'Mwe Taata wesi uwamumulu,  
isina lyenu likindikwe,

<sup>10</sup> ubufumu bwenu bwise,  
ubufwayo bwenu bukitwe pesonde  
ngamumulu.

<sup>11</sup> Tupeleni lelo ikyakulya kyesu ikyu kila  
busiku.

<sup>12</sup> Teweleti fintu twalufyanya,  
ngafintu twelela abatulufyanya.

<sup>13</sup> Mwitutwala mukwesiwa ukukalamba,  
lelo mututule kufyabipa.'

<sup>14</sup> Pantu ngamulelela bambi fintu  
bamilufyanya, na Wisinwe mumulu nao  
akamyelela.

<sup>15</sup> Lelo ngatamulelela bambi, na Wisinwe takamyelele fintu mwalufyanya.

#### *Ifundisylo palwa kufunga*

<sup>16</sup> "Elo mulefunga, mwilaikala inkumbabulili ngafintu babumbimunda bakita. Balekelesya imimonekele yabo pakweba ati abantu bonse babamone ati balefunga. Ndemyeba ikinekine nati bena balipoka ikilambu kyabo kyonse.

<sup>17</sup> Lelo lintu mulefunga, mulesamba kumenso nokusuba amafuta mu mutwe,

<sup>18</sup> pakuti abantu bambi belaisiba ukuti mulefunga. Kanofye Wisinwe eka usimoneka. Kibili Wisinwe uumona fintu mukita munkama akamilambula.

#### *Ifyuma mumulu* (Luka 12.33-34)

<sup>19</sup> "Mwilasungila ifyuma fyenu pesonde apo ubuswa nenkuutu teti syonaule kibili apo abano bengengila no kwiba.

<sup>20</sup> Lelo Sungileni ifipao fyenu mumulu umo ubuswa nenkuutu teti syonaule kibili nabano teti bengile nokwiba.

<sup>21</sup> Pantu umutima wenu ukaba ukwaba ifyuma fyenu.

#### *Ulubuuto lwa mubili* (Luka 11.34-36)

<sup>22</sup> "Ilinsio elampi lyamubili. Amenso yobe ngayatuntulu ninsi umubili obe onse uli mulubuuto.

<sup>23</sup> Lelo amenso yobe ngateyatuntulu, umubili obe ukaba mumfimfi. Ngakyakuti ulubuto muli webo nimfimfi, ninsi nimfimfi yakipesya mano!

#### *Lesa nefyuma fyapano isonde* (Luka 16.13; 12.22-31)

<sup>24</sup> "Takuli umuntu uwingaba umusya wabasikulu babili, kuti apatapo umo nokutemwapo umbi, kuti anakilapo umo nokufupulapo umbi. Tekuti upyungile fyonsene pambo, Lesa nolupiya.

<sup>25</sup> "Eikyo ndimukumyeba ukuti, mwilasakamana pabwaki bwenu, fintu mukalya nafintu mukanwa, nangu pansalu syamubili wenu. Busye ubwikasi bwenu tabwakila ifyakulya? Kibili busye umubili tawakila insalu?

<sup>26</sup> Lolesyen'i pafyon'i fyamulwelele, ifisilima, tafisombola nangu ukusungila matala, lelo Wisinwe wamumulu alafilisaya! Busye tamwakindamapo ukukila ifyon'i?

<sup>27</sup> Ninani pali mwebo uwingalandapo insiku pamulandu wakusakamana?

<sup>28</sup> "Nikinsi musakamanina pansalu? Lolesyen'i pamaluba ya mumpanga fintu yakula, tayabomba nangu ukupangila ifyakufwala.

<sup>29</sup> Lelo ndemyeba nati, Nemfumu Solomoni nobunonshi bwakwe bonse tatalile fwikwapo ngalimo pali aya maluba.

<sup>30</sup> Ngakyakuti Lesa eufwika ifyani fyamumpanga, ifyakuti lelo epofili mailo fyaposwa mumulilo tekuti amifwike ukukishapo, mwe bantu bakitetekelo kinono?

<sup>31</sup> "Eikyo mwilasakamana nokuipusya ukuti: 'Busye nkalya insi? Busye nkanwa insi? Nangu busye nkafwala kinsi?'

<sup>32</sup> Pantu ifi, efyo abenafyalo bafwaya, lelo Wisinwe wamumulu alisiba ukuti mukakila fyonsene ifi fintu.

<sup>33</sup> Lelo intansi fwayeni Ubufumu bwa-mumulu Nobulungami bwabuko, kibili nafyonse ifi ifyasyala akamipeela.

<sup>34</sup> Eikyo mwilasakamikwa pabusiku bwa mailo, ubwamailo bukaisakamana ub-wine. Kila busiku bwalikwata isakamiko lyabuko.

## 7

#### *Ukupingula abanenu* (Luka 6.37-38,41-42)

<sup>1</sup> "Mwilapingula abanenu, pakuti mwikapingulwa,

<sup>2</sup> pantu insila mupingwilamo abanenu eyo mukamipingwilamo kibili nefipimo mubomfy'a efyo nemwe mukapiminwamo.

<sup>3</sup> Nikinsi umwena akasanga mulinso lyakwa munonko lelo wafilwa ukumona umulando mulinso lyobe?

<sup>4</sup> Kuti walanda syani kuli munonko ukuti, "Leka nkufumye akasanga mulinso," ilyo webo taulemona umulando mulinso lyobe?

<sup>5</sup> Webumbimunda we! Mbale fumya umulando mulinso lyobe elintu walamona fintu wingafumya akasanga mulinso lyakwa munonko.

<sup>6</sup> "Mwilapela ifyamusilo ku mbwa, kibili mwilaposesa inkumba ubulungu bwenu ubwa mutengo, pantu kuti syena syabunyantaula nokumyalukila.

*Lomba, Fwaya, Konkonsya*

(*Luka 11.9-13*)

<sup>7</sup> "Lomba kikapelwa kuli webo, fwaya walasanga, konkonsya kibili ikiibi kikeswilwa kuli webo.

<sup>8</sup> Pantu onse uwalomba akapeelwa, na onse uwafwaya akasanga kibili nekiibi kikeswilwa ku ukakonkonsya.

<sup>9</sup> Busye palimwebo nani engapeela umwaana wakwe ilibwe ngamulomba umukate?

<sup>10</sup> Nangu ukumupeela insoka ngamulomba isabi?

<sup>11</sup> Ngakyakuti mwebo nangu muli babi, mwaisiba ukupeela abaana benu ifisuma. Nga Wisinwe wamumulu tekuti akisyepo ukupeela ifintu ifisuma kubamulomba!

<sup>12</sup> "Eikyo mulifyonse, mulekitila bambi fintu mwingsfwaya bamikitila, ubu ebupilibulo bwa mafunde na bakasesema."

*Insila iinono*

(*Luka 13.24*)

<sup>13</sup> Ingilieni pamwinsi uunono. Pantu unono emwinsi lelo uwasalala ninsila iitwala kukonaulwa, kibili nabengi emo bengilia.

<sup>14</sup> Lelo umwinsi uutwala kumweo unono kibili walyafya nabausanga banono.

*Ikimuti nefitwalo fyaciko*

(*Luka 6.43-44*)

<sup>15</sup> Kengeleni kuli bakasesema babufi, besa kuli mwebo ngempaanga kunse, lelo mukati mimbulu iibi.

<sup>16</sup> Mukabesibila kufisabo. Kumyunga takuseeka imyangasi, nangu amakunyu tayaseeka ku nkololo.

<sup>17</sup> Ikimuti ikisuma kuseeka ifitwalo ifisuma, lelo ikimuti ikiibi kuseka ifitwalo iibi.

<sup>18</sup> Ikimuti ikisuma teti kitwale ifisabo ifiibi nangu ikimuti ikiibi ukutwala ifisabo ifisuma.

<sup>19</sup> Kibili nekimuti kyonse ikisitwala ifisabo ifisuma kukitema nokukiposa mu-mulilo.

<sup>20</sup> Eikyo kansi mukabesibila kufisabo.

*Nsyakwisiba*

(*Luka 13.25-27*)

<sup>21</sup> "Tebonse abangita ukuti, 'We mfumu, we Mfumu' abakengila Mubufumu bwamumulu kanofye abo abakita fintu Taata wamumulu afwaya ukuti bakite.

<sup>22</sup> Pali bulya busiku abengi bakatila kuli nebo ukuti, 'We Mfumu, we Mfumu! Busye tatwalesesema mwisina lyobe, no kutamfya ingulu Mwisisina lyobe, kabilii nokukita ifisungusyo ifingi mwisisina lyobe?'

<sup>23</sup> Elo nkabebea ukuti, 'Nsyamisiba. Fumeeni apa, mwebantu ababifi mwe! "

*Bakakula bamayanda bibili*

(*Luka 6.47-49*)

<sup>24</sup> "Eikyo, onse umfwa aya masiwi yandi nokuyakita aaba ngo muntu uwamano uwaakulile ijanda pelibwe.

<sup>25</sup> Imfula yalilokele, imilonga yaliiswile nomwela walipupile ku njanda lelo tayawile pantu yakulilwe pebwé.

<sup>26</sup> "Lelo umfwa amasiwi yandi nokuyakita aaba ngekipumbu ikyakulile njanda pa musenga.

<sup>27</sup> Imfula yalilokele, imilonga yaliswile, umwela walipupile kuli ilya njanda nayo yaliwile. Kabilii yawile bubi bubi!"

*Abantu bapapa imifundile yakwa Yesu*

<sup>28</sup> Lintu Yesu apwisisye ukulanda ifi, ibumba lyalipapile pa mafundisyo yakwe.

<sup>29</sup> Talefundisya ngabakafundisya bama-funde, lelo alefundisya nga umo uwakwata amaka.

## 8

*Yesu aundapa uwafibasi*

(*Mako 1.40-45; Luka 5.12-16*)

<sup>1</sup> Lintu Yesu atenemwike palupili, ibumba ilikalamba lyalimukonkele.

<sup>2</sup> Elo umuntu uwalekyusisa nobulwele bwafibasi aisile mufukamina nokulanda ukuti, "Mwemfumu ngamulefwaya kuti mwangundapa."

<sup>3</sup> Yesu atambulwile ukuboko amwikata, nokumwasuka ukuti, "Ndefwaya, pola!" Palya pene alipolele kubulwele bwakwe.

<sup>4</sup> Yesu amwebele ukuti, "Usininkisyé ukuti tawebaleko umuntu nangu umo, lelo kailange kuli basimapopo, upela nelambo lintu Mose akoncomesye ngo bunte kuli bena."

*Yesu aundapa umubomfi wamukalamba wabasilika*

(*Luka 7.1-10*)

<sup>5</sup> Lintu Yesu aingile mu Kapenamu, umukalamba wabasilika alimumukumenye nokumulomba ubwafwilisyo,

<sup>6</sup> aebele ati, "Wemfumu umubomfi wandi nalala pabulo, taleyenda kibili nakyusisa apakalamba."

<sup>7</sup> Yesu amwaswike ukuti, "Nalaya mundapa."

<sup>8</sup> Lelo umukalamba wabasilika ayaswike ukuti, "Iyoo Mwemfumu, nsilingile ukuti mwise munjanda yandi, lelo landenifye isawi umubomfi wandi alapola.

<sup>9</sup> Pantu nanebo nalikwata abonakila, kabiili nalikwata nabasilika abanakila. Ndeba umo ukuti, 'Kabiye!' Nao ayaa kabili naeba umbi ukuti, 'Isa!' Nao aisa, kabili ndebea umusya wandi ukuti, 'kiteef!' Nao akita."

<sup>10</sup> Lintu Yesu aumfwile ifi alisungwike nokweba abamukonkele ukuti, "Ndemyeba ikine kine, nsyasangapo uwakitetekelo mu Israeli ngoyu.

<sup>11</sup> Ndemyeba ukuti, abengi bakesa ukufuma kukabanga nakumasamba nokwikala pamo na Abulahamu, Isaaki na Yakobo pamutebeto Mubufumu bwamumulu.

<sup>12</sup> Lelo abana babufumu bakaposwa mumfimfi, ukukaba ukulila nokusumanya ameno."

<sup>13</sup> Yesu aebele umukalamba wabasilika ukuti, "Kabiye, kyalaba ngafintu usumine."

Kabili nomubomfi wamusilika alipolele pali kalyakene kasita.

*Yesu aundapa abantu abengi  
(Mako 1.29-34; Luka 4.38-41)*

<sup>14</sup> Lintu Yesu aile munjanda yakwa Petelo, amweene nyinafyala wakwa Petelo ali pabulo nalwala impepo.

<sup>15</sup> Amukwete kuminwe apopene nempepo yamuleka, aimine nokutampa ukubatangata.

<sup>16</sup> Ikyungulo, abantu abengi abakwete ingulu babaletele kuli Yesu. Yesu atamfisyе ingulu kwisiwi nokundapa bonse abali na-balwala.

<sup>17</sup> Ifi fyakitike pakufikilisa ifyalandile kasesema Esaya ukuti, "Aundepe amalwele yesu nokutuposya."

*Bamo abalefwaya ukukonka Yesu  
(Luka 9.57-62)*

<sup>18</sup> Nomba lintu Yesu amwene ibumba lyamukolongan aebele abasambi bakwe ukwabukila busilya bwamumana.

<sup>19</sup> Kafundisya wamafunde aisle kuli ena nokumweba ukuti, "Mwekafundisya, ningipekanya ukuya nemwe konse kuntu muleya."

<sup>20</sup> Kabili Yesu amwaswike ukuti, "Bamumbwe balikwata amendo, kabilii nefyoni fyalikwata ifinsa lelo Umwana Wamuntu takwata apakusamina umutwe."

<sup>21</sup> Naumbi uwali umusambi alandile kuli ena ukuti, "Wemfumu, leka mbale mbwelelemo ndeyasika taata."

<sup>22</sup> Lelo Yesu amwaswike ukuti, "Nkonka, kabili leka abafwa basike abafwa banabo."

*Yesu atatalika amaputa  
(Mako 4.35-41; Luka 8.22-25)*

<sup>23</sup> Kabili nalintu Yesu apateme mubwato, abasambi bakwe balimukonkole.

<sup>24</sup> Apopene akashululu kaima pamumana namaputa yalapumaula kubwato, Yesu ena ninsi ali mutulo.

<sup>25</sup> Abasambi baile kuli Yesu mukumusibusya. Bamwebele ukuti, "Tupususwyе we Mfumu, twalafwa!"

<sup>26</sup> Yesu abaswike ukuti, "Kinsi muletinina, mwebakitetekelo ikinono!" Aimine nokukalipila umwela namaputa, kabili kwali icilenga.

<sup>27</sup> Abasambi balipapile, nokulanda ukuti, "Busye mutu wamusango syani uyu? Nomwela namaputa nafyo filemumfwila!"

*Yesu atamfya ingulu mabantu babili  
(Mako 5.1-20; Luka 8.26-39)*

<sup>28</sup> Lintu Yesu afikile busilya bwamumana, kukyalo kyabena Gadara, bamukumenye kabantu babili abafumine munda. Aba bantu balikwete ingulu kabili bali nabakalipa ikyakuti tapali abalepita kuli ilya nsila.

<sup>29</sup> Palyapene balapunda ukuti, "Nifinsi ulefwaya kuli fwebo, Wemwana wakwa Lesa? Busye waisa mukutukanda ilyo insita yapekanisiwa tailafika?"

<sup>30</sup> Nomba akatalamukilafye kwali umukuni uwankumba uukalamba isyaleya.

<sup>31</sup> Kabili ingulu syapapete Yesu ukuti, "Ngawalatutamfyamo, ututume mu-mukuni wankumba."

<sup>32</sup> Kabili Yesu asyebele ukuti, "Kabiyen," Syafumine nokuya mumukuni wankumba kabili nomukuni wa nkumba watentemukila mumukonko wayawila mumumana nokufwa.

<sup>33</sup> Abantu abalesunga inkumba, balibutwike, baile mumusumba, mukulondola ilyasi lyonse nefyakitike kabantu abakwete ingulu.

<sup>34</sup> Bonse mumusumba baile mukukumanya Yesu, lintu bamumwene bamupapete ukuti afume mukyaloo kyabo.

## 9

*Yesu aundapa uwabulebe  
(Mako 2.1-12; Luka 5.17-26)*

<sup>1</sup> Yesu apatame mubwato nokubwelela busilya bwamumana kumusumba wakwe.

<sup>2</sup> Abantu bamo baletete kuli ena uwabulebe ninsi nalala pabutanda. Kabili lintu Yesu amwene ikitetekelo bakwete, aebele uwabulebe ukuti, "Sipa, wemwana wandi! Imembu syobe syaelelwa."

<sup>3</sup> Pali ifi, bakafundisya bamafunde bayebele abene beka ukuti, "Uyu mutu alepontela Lesa!"

<sup>4</sup> Lelo Yesu ikyo alisibe amatontonkanyo yabo, abepwisyé ukuti, "Nikinsi muleton-tonkanisisya ifyabubifi?

<sup>5</sup> Busye kinsi kyayangukapo pakulanda ati, 'Imembu syobe syaelelwa' nangu ukulanda ati, 'Ima nokwenda'?

<sup>6</sup> Lelo nalamilangisya nomba ukuti Umwana wa Muntu alikwata amaka yakwewela imembu." Eikyo aebele uwabulebe ukuti, "Ima, piita ubutanda bobe kabiye kunjanda"

<sup>7</sup> Kibili alimine nokuya kwakwe.

<sup>8</sup> Lintu abantu bamwene ifi, bakwetwe umwenso, kibili balumbenye Lesa pakuppeela amaka kubantu.

*Yesu aita Mateyo  
(Mako 2.13-17; Luka 5.27-32)*

<sup>9</sup> Lintu Yesu afumine kuli ilya nkende, amwene kasonkesya wamusonko, wesina ilya Mateyo, naikala muntu alebomba. Amwebele ukuti, "Nkonka."

Mateyo aimine nokumukonka.

<sup>10</sup> Kibili ilyo Yesu alelya munjanda yakwa Mateyo, bakasonkesya bamusonko abengi nababembu baisile yamba ukulya na Yesu kumo nabasambi bakwe.

<sup>11</sup> Lintu Abafalise bamu bamwene ifi, baipwisyé abasambi bakwe ukuti, "Kinsi Kafundisya wenu aliila pamo nabakan-kesya wamusonko elo nababembu bambi?"

<sup>12</sup> Lelo lintu Yesu abomfwile abaswike ukuti, "Abantu abatuntulu tabakabila shinjanga kano abalwele.

<sup>13</sup> Kabiyen'i musambilile umwalola ifi, 'Nkabilo uluse, telambo.' Pantu nsyaisa mukwita abalungami lelo nakonka ababe-mbu."

*Ilipusyo lyapakufunga  
(Mako 2.18-22; Luka 5.33-39)*

<sup>14</sup> Elo abasambi bakwa Yohani kabatisya baisile kuli Yesu nokumwipusya ati, "Nikinsi fwebo naba Falise tufungila, lelo abasambi bobe tabafunga?"

<sup>15</sup> Yesu abaswike ukuti, "Busye insindisi syakwa sibwinga kuti syaba syani nobulanda ilyo sikili nasibwinga? Lelo insita ikafika ilyo sibwinga akapiitwa pali bena lyena bakalafunga ukulya.

<sup>16</sup> "Takwaba uubika ikikamba ikipyä pansalu yakale, pantu ikikamba kipyä kuti kyalepula insalu nekipunda kyakulilako.

<sup>17</sup> Nangu ukubika umwangasi uusililaba munyambi isikote, umusango inyambi kuti syapuuuka, umwangasi wapongoloka menyambyi syonaika. Lelo babika umwangasi munyambi isipyä epakupususya fyone fibili."

*Yesu abusya umukasyana kibili aunda-pa nomwanakasi wamukunko  
(Mako 5.21-43; Luka 8.40-56)*

<sup>18</sup> Yesu palya akili alelanda ifi, kwaisile intungulusi yaba Yuda kuli ena, yamu-fukamina nokulanda ukuti, "Umwana wandi awfawife ililine, nomba twende umutambalikepo amaboko kibili alaba nomweo."

<sup>19</sup> Eikyo Yesu aimine nokumukonka kibili nabasambi bakwe baile nao.

<sup>20</sup> Umwanakasi uwalekyusiwa no-mukunko pamysaka ikumi limo naibili aisile kunuma yakwa Yesu, nokukumya kupela yansalu yakwe.

<sup>21</sup> Aebele mumutima wakwe ukuti, "Nganakumyafye kunsalu yakwe ndepola."

<sup>22</sup> Yesu apilibwike nokumona, alandile ati, "Sipa wemwana wandi umwanakasi," "Ikitetekelo kyobe kyakuposya." Pali ilya ine nsita umwanakasi alipolele.

<sup>23</sup> Yesu aingile mujanda yantungulusi yaba Yuda. Lintu amwene abalelisya imitolilo nebumba lyabantu abalelososa,

<sup>24</sup> alandile ukuti, "Bonse fumini panse! Yuu mukasyana tafwile alelefye!" Elo bonse bamuseka.

<sup>25</sup> Lelo lilyafye abantu bafuma panse, aingile ayamukwata pakuboko, kibili nao aima.

<sup>26</sup> Ilyasi lyapali ifi lyasabankene muli ilya nkende yakyalo.

*Yesu aundapa impofu sibili*

<sup>27</sup> Yesu afumine kuli ilya kende, kibili kilya aleya, abaume babili impofu batampile ukumukonka. Bapundile ukuti, "Mwana Davidi, tubelele uluse!"

<sup>28</sup> Lintu Yesu aingile munjanda, im-pofu syaisile kuli ena, kibili nao asipwisyé ukuti, "Busye namusumina ati, kuti nakitefi?"

Bayaswike ukuti, "Eee, Mwemfumu?"

<sup>29</sup> Yesu aikete amenso yabo nokulanda ukuti, "Nakikitwe, ukulingana ne kitetekelo kyuenyi!"

<sup>30</sup> Kibili namenso yabo yaliswike. Yesu abasokele ukuti, "Mwiebako nangu umo pali ifi!"

<sup>31</sup> Lelo bailesabankanya ilyasi pali Yesu muli ilya nkende yakyalo yonse.

*Yesu aundapa umuntu uusyalelanda*

<sup>32</sup> Lintu abaume babili baleya, baletele umuntu uusyalelanda kuli Yesu pantu alik-wete ikibanda.

<sup>33</sup> Kibili lintu ikibanda kyantafiwe muli ena, umuntu usyalelanda atampile ukulanda, kibili nabonse balisungwike. Ba-pundile ukuti, "Tatwatala monapo ifyaifi mu Israeli!"

<sup>34</sup> Lelo Abafalise balandile ukuti, "Mukalamba wafibanda eumupele amaka yakutamfya ifibanda."

*Yesu aumfwila abantu uluse*

<sup>35</sup> Kibili Yesu aile aletandala mu-misumba yonse nemisi. Afundisyemumasinagogi, abilile Imbila Nsumayabufumu, nokundapa abantu abalwele amalwele yamisango misango.

<sup>36</sup> Lintu amwene ibumba lyabantu aiketwe nobulanda, pantu baali nabasakama, ababula uwakubafwa ngempaanga isyabula kacema.

<sup>37</sup> Aebele abasambi bakwe ukuti, "Ubusombosi bukalamba, lelo ababomfi banono.

<sup>38</sup> Peppeni kuli Lesa wabusombosi ukuti atume ababomfi abengi mukusombola."

## 10

*Abatumwa ikumi limo nababili  
(Mako 3.13-19; Luka 6.12-16)*

<sup>1</sup> Yesu aitile abasambi bakwe ikumi limo nababili nokubupa amaka yakutamfya umipasi yakowela nokundapa amalwele yamisango misango.

<sup>2</sup> Aya emasina ya batumwa ikumi limo na bibili, Simoni (uwaleitwa Petelo) na munyina Andereya, Yakobo na munyina Yohani bamwana Zebede,

<sup>3</sup> Filipi na Batolomeo, Tomasi na Mateyo kasonkesya wamusonko, Yakobo mwana Alufeya, na Tadeyasi,

<sup>4</sup> Simoni umwina kenani, na Yudas Isikalyoti uwafutwike Yesu.

*Imilimo ya batumwa ikumi limo nababili*

*(Mako 6.7-13; Luka 9.1-6)*

<sup>5</sup> Yesu atumine aba batumwa ikumi limo nababili nokubeba ukuti, "Mwilaya ku be-nafyalo na mumisumba ya bena Samaliya.

<sup>6</sup> Lelo muleya ku mpaanga isyaluba isya mujanda yakwa Israeli.

<sup>7</sup> Kibili mukalesimikila ukuti, 'Ubufumu bwakwa Lesa buli mupepi!'

<sup>8</sup> Mukaleundapa abalwele, mukalebusya abafwa, mukaleundapa abafibasi, nokutamfya ifibanda. Mwapokelela ukwabula ukulipila, eikyo mukalelepela ukwabula ukulipilisya.

<sup>9</sup> Mwipiita ulupiya ululi lonse ulwa Siufele, golide nangu ulwa kyela mumifuko yenu,

<sup>10</sup> mwipiita akacola nangu imikansu ibili, insapato nangu inkonto. Ababomfi bafwile bapewla fintu balefwaya.

<sup>11</sup> "Kibili onse umusumba nangu umusi untu mwayamo, fwayenimo umuntu uulingile, mukalekala nao mpaka mukafume muli ilya nkende.

<sup>12</sup> Ngamwaya pañjanda, mulelanda ukuti, 'Umutende ube nemwe.'

<sup>13</sup> Muli iyo ḥanda nga bamipokelela, lekeni umutende wenu ube pañjanda, lelo nga bakana ukumipokelela umutende wenu umibwelelele.

<sup>14</sup> Kabilo umo ngakana ukumipokelela nangu ukumfwu ku masiwi yenu, kunteni ulukungu kunkasa syenu nokufuma muli ulya musumba nangu iyo ḥanda.

<sup>15</sup> Ndemyeba ikinsika ati pabusiku bwabupingusi, Lesa akalangapo uluse ulukulu ku bantu bamu Sodoma na Gomora ukukila uyo musumba.

*Ukopakaswa kuleisa  
(Mako 13.9-13; Luka 21.12-17)*

<sup>16</sup> "Moneni! Namituma nge mpaanga pakati ka mimbulu. Mukengele nge nsoka kibili mufuuke nge nkunda.

<sup>17</sup> Mukengele ku bantu, pantu bakamikwata nokumitwala mufilye, kibili bakamilopola mu masinagogi.

<sup>18</sup> Pamulandu wandi bakamitwala kubalasi nakuli basyamfumu, mukuba bakambone kuli beena, naku Benafyalo.

<sup>19</sup> Lelo ngabamikwata, mwikasakama pafyo mukalandu nangu ifyo mukafilandu, lintu insita ikafika mukapelwa ifyakulanda.

<sup>20</sup> Pantu amasiwi mukalandu tayakabe yenu, yakafuma ku mupasi wakwa Wisinwe ukalalandu muli mwebo.

<sup>21</sup> "Munina akepaisya munina, nawisi akakita fimofine kubana, nabaana nabo bakemina wisi nokumwipaisya.

<sup>22</sup> Kibili mukapatwa kuli bonse pamulandu nesina lyandi. Lelo onse ukasipikisyu ukufika kumpela akapusuka.

<sup>23</sup> Ngabamipakasa mu musumba umo, butukileni muli umbi. Ndemyeba ukuti tamwakapwisyu umulimo wenu mumisumba yonse iyamu Israeli ninsi Umwana Wamuntu aisa.

<sup>24</sup> "Umusambi tekuti akile kafundisyu, umubomfi teti akile imfumu yakwe.

<sup>25</sup> Umusambi kuti afika pakuba nga kafudisyu nomubomfi nge mfumu. Ngakyakuti umutwe wa ḥanda baleewita ukuti Beleezebu, abamujanda bakabeta amasina ayabi ukukilapo!

*Ninani uwakutiina  
(Luka 12.2-7)*

<sup>26</sup> "Mwilabatiina, pantu takuli ikyafimbwapo ikisyakasokoloke, nangu ikyafisama ikisyakesibkwe.

<sup>27</sup> Ifyo ndemyeba mumfimfi mukafilandu palubuto, nafyonse mwaumfwa mukumisonga imwe mukalefilanda pamulu wa ḥanda.

<sup>28</sup> Kibili mwilatiina abepaya umubili lelo teti beipaye umweo, lelo muletiina uwingonaula fyonse umubili nomweo mu Gehena.

<sup>29</sup> Busye utupele tubili tatusitisawa nolupiya lumo? Lelo tapali nangu kamo akengapona pansi ukwabula ubufwayo bwakwa Wisinwe.

<sup>30</sup> Imwe nemisisi yakumitwe yenu yalipendwa.

<sup>31</sup> Eikyo mwilatiina, pantu mwalikila utupele utwingi!

*Ukulumbula nokukana Yesu  
(Luka 12.8-9)*

<sup>32</sup> Bonse abalandia palwalala ukuti baba nanebo, nanebo nkakita fimofine pamenso yakwa Taata mumulu.

<sup>33</sup> Lelo onse uwankana pamenso ya bantu, nkamukana pamenso yakwa Taata mumulu.

*Temutende, lelo lupanga  
(Luka 12.51-53; 14.26-27)*

<sup>34</sup> Mwilatontonkanya ukuti naisa mukuleta umutende pesonde iyoo, nsyaisa mukuleta umutende lelo naleta ulupanga.

<sup>35</sup> Naisa mukupusanya umwana umwaume nawisi, umwana umwanakasi nanyina, umuko umwanakasi nanyina fyala,

<sup>36</sup> kibili abalwani ba muntu, bakaba ba munjanda yakwe.

<sup>37</sup> Onse uwatemwa wisi nanyina ukukila nebo tandingile, kibili naonse uwatemwa umwana wakwe umwaume no mwanakasi ukukila nebo tandingile.

<sup>38</sup> Onse usipiita umusalaba wakwe no kunkonka, talingile ukuba umusambi wandi.

<sup>39</sup> Onse uwasanga umweo wakwe aakulufya, kibili onse uwalufya umweo wakwe pamulandu wandi akausanga.

*Iflambu  
(Mako 9.41)*

<sup>40</sup> Onse uwamipokelela ninsi apokelela nebo, kibili naonse uwamipokelela ninsi apokelela uwantuma.

<sup>41</sup> Onse uwapokelela kasesema pamulandu wakuti ni kasesema, apokelela ikilambu kyakwa kasesema, kibili naonse uwapokelela umuntu umulungami pamulandu wakuti mulungami, apokelela ikilambu kya mulungami.

<sup>42</sup> Kibili naonse uwapeela kamo pali utu twaice ulukombo lwamensi yatalala pamulandu wakuti kamusambi kandi, ndemyeba ikinekine nati akapokelapo ikilambu kyakwe."

## 11

*Intumi syafumine kuli Yohani Kabatisya  
(Luka 7.18-35)*

<sup>1</sup> Lintu Yesu apwiile ukulangilila abasambi bakwe ikumi limo nababili ifyakukonka, afumine kuli ilya nkende nokuya mukufundsiya nokusimikila mumisumba yamu Galili.

<sup>2</sup> Nomba lintu Yohani Kabatisya mukifungo aumfwile pafintu fyonse Klistu aleekita, atumineko abasambi bakwe bamu kuli ena.

<sup>3</sup> Baipwisye Yesu ukuti, "Busye niwebo uuli nokwisa nangu tuloleleko umbi?"

<sup>4</sup> Yesu ayaswike ukuti, "Kamwebeni Yohani fintu muleumfwa nafintu mulemona,

<sup>5</sup> impofu silemona, ifilema fileyenda, abafibasi balepolo, bankomya matwi baleumfwa, abafwa balebusiwa, kibili ne Mbila Nsuma ilebilwa kubabusu.

<sup>6</sup> Alipalwa uusiipununa pamulandu wandi!"

<sup>7</sup> Lintu abasambi bakwa Yohani baile, Yesu atampile ukulanda pali Yohani kwi bumba ukuti, "Lintu mwaile kuli Yohani mukiswebebe, kinsi mwaleenekela ukumona? Busye litete lilepunga kumwela?

<sup>8</sup> Busye kinsi mwaile mukumona? Busye muntu uwafwele insalu syabusaka? Iyoo abantu abafwala ifyo bekala ku kipango!

<sup>9</sup> Busye kinsi mwaile mukumona? Busye nikasesema? Ee, lelo ndemyeba ukuti, mwamwene uwakila pali kasesema.

<sup>10</sup> Yohani emuntu amalembo yalandapo ukuti, 'Moneni, nkatumwa intumi yandi iyakuntangilila, iyakukupekanisisa insila.'

<sup>11</sup> Ndemyeba ukuti Yohani mukalamba ukukila bonse abaikalapo pakyalo. Lelo uwakepesya Mubufumu bwa mumulu mukalamba ukukila Yohani.

<sup>12</sup> Ukfuma pansita yakwa Yohani Kabatisya ukufika nandakai Ubufumu bwa mumulu bwaba bwakulwila, nababulwila pamaka ebabupoka.

<sup>13</sup> Pantu bakasesema bonse namafunde yalesesema ukufika pali Yohani,

<sup>14</sup> ngamulefwaya ukusumina imfila yabo, Yohani ni Eliya uo balandile ukuti ali nokwisa.

<sup>15</sup> Uli namatwi omfwe!

<sup>16</sup> 'Nomba, busye nipii ningapasyanya ino nkulo? Ili nga baike abaleyangala pakisankano. Ibumba limo lilebilisya iliankwe ukuti,

<sup>17</sup> Twalimilisisye inyimbo syapa bwinga, lelo tamwakindile! Twalimimbile cilolo, lelo tamwalilile!"

<sup>18</sup> Pantu lintu Yohani aisile talelya nokunwa, kibili nabonse balandile ukuti, 'Alikwata ikibanda!'

<sup>19</sup> Lintu Umwana Wamuntu aisile aliliile nokunwa, kibili bonse balandile ukuti, 'Moneni uyu muntu, alalisya,

kabili alanwa, nikibusu wabakasonkesya bamusonko na babembu! Nomba ifikitwa fyamano yakwa Lesa filasinina ukuti wakisinka."

*Imisumba iisyasumina  
(Luka 10.13-15)*

<sup>20</sup> Yesu atampile ukwebaula imisumba umo akitile ifipesyamano ifingi, lelo abantu tabalapile.

<sup>21</sup> "Walisyama, we Chorazini! Walisyama, we Betisaida! Ifisugusyo ifyakitwa muli webo fingakitwa mu Tare nangu Sidoni, abantu bamulya ngabalilapile akale mukufwala ifilanga nokusuba imito!

<sup>22</sup> Ndemyeba ukuti pabusiku bwa Bupingu Lesa akalangapo uluse ulukalamba kubantu bamu Tare na Sidoni ukukila mwебо!

<sup>23</sup> Kabili nawe Kapenamu! Busye walefwaya ukuisansabika ukufika mumulu? Ukaposwa ku Gehena! Ifisungusyo fyakitilwe muli webo fingakitwa mu Sodoma nandakai ngepoiil!

<sup>24</sup> Eikyo ndemyeba ukuti Pabusiku bwa bupingu Lesa akalangapo sodoma uluse ulukulu ukukila mwебо!"

*Iseni mutuusye kulinebo  
(Luka 10.21-22)*

<sup>25</sup> Pali iyoine nsita Yesu aebele ukuti, "Mwetaata, Imfumu ya mumulu napesonde! Namitotela pantu ifi fintu mwalififisa kubamano naku basambilila, mwafisokololoka ku bana.

<sup>26</sup> Ee, Mwetata ifi fyali bufwayo bwenu.

<sup>27</sup> "Tata alimpela ifintu fyonse. Kabili takwaba uwaisiba Umwana kanofye Wisi, kabili takwaba uwaisiba Wisi kanofye Umwana nabo bonse abo Umwana aasala ukusokolwela.

<sup>28</sup> "Iseni kuli nebo, mwebacutika, namweba fininwa nefisendo, nalamipeela ukutuusya.

<sup>29</sup> Piteeni ikoli lyandi, kabili nokusambilila kuli nebo, pantu ndiwamutembo kabili nalifuuka mu mutima, kabili mukasanga ukutuusya.

<sup>30</sup> Pantu ikoli lyandi talyayafya, nekisendo kyandi kyalyanguka."

## 12

*Ilipusyo lyape Sabata  
(Mako 2.23-28; Luka 6.1-5)*

<sup>1</sup> Yesu na basambi bakwe baaleyenda mwibala lya njano Pesabata. Abasambi bakwe bayambile ukusaba imisonso ya njano balalya pantu balyumfwile insala.

<sup>2</sup> Lelo lintu Abafalise bamwene ifi baebale Yesu ukuti, "Mona, abasambi bobe balekita ifyakanisiwa ukukita Pesabata!"

<sup>3</sup> Yesu ayaswiye ukuti, "Busye tamwabelenga fintu Davidi akiiti na bantu bakwe lintu baumfwile insala?

<sup>4</sup> Aingile munjanda yakwa Lesa na bantu bakwe nokulya umukate wapelwe kuli Lesa, nanguline takyalu nakisuminisiwa mumafunde bena ukulya, kanofye basimapepo ebaali nabasuminisiwa ukulya.

<sup>5</sup> Nangu busye tamwabelenga mwifunde ukuti basimapepo bamwi Tempele abalebomba pe Sabata bakaana ukusunga ikyebo kya pabusiku bwe Sabata, lelo bali abakaele?

<sup>6</sup> Ndemyeba ukuti pano pali uwakila pe Tempele.

<sup>7</sup> Mwingesiba umwalola ukuti, 'Ine mfwaya uluse telambo lyanama.' Ngatamupeela abakaele imilandu,

<sup>8</sup> pantu Umwana Wamuntu ni Mfumu ye Sabata."

*Yesu aundapa umuntu wakisansa kyalemana*

*(Mako 3.1-6; Luka 6.6-11)*

<sup>9</sup> Yesu afumine kuli ilya nkende nokuya ingila mu sinagogi lyabo,

<sup>10</sup> kabili kwali umuntu uwali nekisansa kyalemana. Baipwisye Yesu ukuti, "Busye kyalisuminisiwa ukundapa Pesebata?" Pakuti bamupele umalandu.

<sup>11</sup> Yesu ayaswiye ukuti, "Ngakyakuti umo pali mwebo naktawa Impaanga elo yawila mukilikolo Pesabata, busye tekuti ailobole?"

<sup>12</sup> Busye umuntu takindamapo ukukila Impaanga! Eikyo kyalisuminisiwa ukukita ikisuma pabusiku bwe Sabata."

<sup>13</sup> Elo aebele umuntu ukuti, "Tambalika ukuboko kobe."

Umuntu atambalike ukuboko, kabili kwalioplele nga kumbi ukwasyala.

<sup>14</sup> Elo Abafalise bafuma baya mukumfwana ifya kwipaya Yesu.

*Umubomfi uwasalwa uwakwa Lesa*

<sup>15</sup> Ikyo Yesu alisibe amapange yabo, alifumine kuli ilya nkende, kabili ne bumba ilikalamba lyalimukonkele nao alibondepe bose.

<sup>16</sup> Alibasokele ukuti beyebako bambi pali ena.

<sup>17</sup> Ifi fyali kufikilisya ifyalandile kaseseema Ezaya ukuti,

<sup>18</sup> "Uyu emubomfi wandi, uo nasala, uo natemwa, kabili uo mbekelwamo. Nkabika Umupasi wandi pali ena,

kabili akasimikila ubupingusi kufyalo.

<sup>19</sup> Takalekita fikansa nangu ukupuunda, tapakabe uukomfwa isiwi lyakwe mismebo.

<sup>20</sup> Takafunaule itete ilyafwantwa, nangu ukusimya ulukuni ululepya. Mpaka umulinganya ukakimfyе,

21 kabili ifyalo fikabika isubilo muli ena."

*Yesu na Belezebu  
(Mako 3.20-30; Luka 11.14-23)*

22 Baletele kuli Yesu umuntu uwali imopofu kabili talelelanda pantu alikwete ifibanda. Nao Yesu aundepo umuntu ayamba ukumona nokulanda.

23 Ibumba lyonse lyalipapile pali fintu Yesu akiitile. Baipwisye ukuti, "Busye kuti aba Mwana wakwa Davidi?"

24 Lintu Abafalise bema baumfwile ifi bayaswike ukuti, "Atamfyia ifibanda pamulandu umukalamba wafibanda Belezebu alamupeela amaka yakutamfyia."

25 Yesu alisibe fintu baletontonkanya eikyo abebele ukuti, "Ubufumu bonse ngabwayakanika nokwamba ukuilwisya teti bwiminine. Kibili nomusumba nangu ulupwa ulwayakanika mu mabumba nokwamba ukuilwisya lukonaika.

26 Kansi Satana ngakuti atamfyia Satana ninsi aimina umwine eka. Nomba busye ubufumu bwakwe kuti bwaiminina syani?

27 Ngantamfyia ingulu ukubomfyia Belezebu. Kansi ngabana benu bema batamfisia mu maka yakwani? Abana benu ebakampingula!

28 Umupasi wakwa Lesa ngeumpa amaka yakutamfyia ingulu ninsi Ubufumu bwakwa Lesa nabwisa palimwebo.

29 "Takuli umuntu uwingengilila umuntu uwamaka nokupiita ifyuma fyakwe, kano ayambilapo ukukaka umuntu uwamaka, elo engengila nokupiita ifyuma fyakwe.

30 "Onse usyaba nanebo ninsi mulwani, usingafwa ukukolonganika ninsi alasalan-ganya.

31 Kibili ndemyeba ukuti abantu kuti baelelwa imembu syonse nefyabubifi balaanda, lelo onse uwapontela Mupasi wamusilo takelelewé.

32 Nowalanda amasiwi yamusalalula pa Mwana Wamuntu kuti aelewá, lelo uwapontela Mupasi Wamusilo takelelewé pali ndakai nomuyayaya.

*Ikimuti nefitwalo fyakiko  
(Luka 6.43-45)*

33 "Pakukwata ikitwalo ikisuma kukwata ikimuti ikisuma, ngokwete ikimuti ikibi ukakwata ikitwalo ikibi. Ikimuti bakisibila kufitwalo kitwala.

34 Mwensonka mwe! Kuti mwalandá syani ifintu ifisuma mwe babifi? Pantu akanwa kalanda ifyaisula mumutima.

35 Umuntu umusuma afumya ifintu ifisuma ifyamukipao kyakwe ikisuma, kibili nomubifi afumya ifintu ifibi ifyamukipao kyakwe ikibi.

36 Lelo Ndimumukumyeba ukuti, pabusiku bwa bupingusi umuntu onse akalubulula peswi lyonse iyabula ubuyo aalandapo.

37 Amasiwi yenu yakabomfesiwa mukumipingula, kukulanda ati muli bakaele nangu muli bamilandu."

*Bafwaya ikisibilo kyakipesya mano  
(Mako 8.11-12; Luka 11.29-32)*

38 Elo bakafundisyá Bamafunde naba Falise bamo baeba Yesu ukuti, "Wekafundisyá, Tulefwaya ukumona ikisibilo kuli webo."

39 Lelo Yesu abaswike ukuti, "Inkulo iyabubifi kabili iyabukende ilomba ikisibilo, lelo tapali ikisibilo ikikapelwa kuli yena ukukila ikisibilo kyakwa kasesema Yona.

40 Filyafine Yona apwiile insiku sitatu, ubusiku nakasuba munda yakisabi, efintu no Mwana Wamuntu akapwa insiku sitatu, ubusiku nakasuba mu musili.

41 Pabusiku bwa bupingusi abantu baku Ninive bakeminina nokumipa umulandu, pantu alyendele ukufuma kukyalo kyakwe ukwisa umfwa kumafundisyo aymano ku mfumi Solomon, kibili ndemyeba nati, pano pali umukalamba ukukila Yona!

42 Pabusiku bwa bupingusi Namfumu waku Sheba akeminina nokumipa umulandu, pantu alyendele ukufuma kukyalo kyakwe ukwisa umfwa kumafundisyo aymano ku mfumi Solomon, kibili ndemyeba nati, pano pali umukalamba ukukila Solomon!

*Ukubweluluka kwa Mupasi Wakowela  
(Luka 11.24-26)*

43 "Ilyo umupasi wakowela wafuma mumuntu, ulaya ulelulumba umwabula amensi mukufwaya umwakutuusya kibili taumusanga.

44 Uyeba uwine weka ukuti, 'Nalabwelela munjanda yandi.' Ilyo wabwelelamo nokusanga tamuli nangu kimo, namupyangwa, nabamubika bwino, umwabusaka.

45 Ulaya wayapiita imipasi simbi isili kinelubali isyabipisypo ukuukila, nokwisa ikala mulya. Nomba imibeele yabumwalya mutu, iya pakulekelesya yabisipisypo ukukila iyantansi. Ifi efikakitika kuli ino nkulo iyibifi."

*Nyina nabamunyina bakwa Yesu  
(Mako 3.31-35; Luka 8.19-21)*

46 Lintu Yesu aalelanda na bantu, nyina na bamunyina bakwa Yesu balifikile. Baiminne panse balefwaya ukuti balande nao.

47 Umo pa bantu abaali kulya amwebele ukuti, "Banoko na bamunoko beminine panse balefwaya ukulanda nobe."

<sup>48</sup> Yesu amwaswike ukuti, "Busye bameayo nibani? Nangu bamuninane bandi nibani?"

<sup>49</sup> Elo asonta pabasambi bakwe nokulanda ukuti, "Moneni! Aba ebamayo nabamuninane!"

<sup>50</sup> Onse uukita ubufwayo bwakwa Taata emuninane, enkansi yandi kibili emayo."

## 13

*Umulumbe wakwa katanda wa mbuto  
(Mako 4.1-9; Luka 8.4-8)*

<sup>1</sup> Bulyabwine busiku Yesu afumine munjanda nokuya mumbali ya mumana eko aikele.

<sup>2</sup> Ibumba ilikalamba lyalimukolongene ikyakuti apateme mubwato emo aikala, kabili nebumba lyonse lyaiminine kunshiko.

<sup>3</sup> Abebele ifintu ifingi mumilumbe ukuti, "Katanda wa mbuto aile mukutanda.

<sup>4</sup> Nalintu atandile, imbuto simo syaponene mumbali yansila, kibili nefyoni fyaaisilelya.

<sup>5</sup> Simbi syaponene pansakalabwe, apaali iloba ilinono, inseke syatampile ukumena bwango bwango pantu umusili tawaile saana pansi.

<sup>6</sup> Lelo lintu akasuba katulile, fyonse fyapile nokubonsa pantu tafyakwete misila.

<sup>7</sup> Simbi syaponene mu myunga. Imyunga syalikulile nokwisa sitabilila.

<sup>8</sup> Lelo simbi syaponene mu musili uusuma, kibili syalikulile nokutwala ifisabo, imiku umwanda umo, simbi amakumi mutanda, nasimbi amakumi yataatu (30) ukukila isyabyelwe.

<sup>9</sup> "Uukwete amatwi naomfwe!"

*Umulandu wakubomfya imilumbe  
(Mako 4.10-12; Luka 8.9-10)*

<sup>10</sup> Elo abasambi baisile kuli Yesu bamwipusya ukuti, "Nikinsi ulandila nabantu mu-milumbe?"

<sup>11</sup> Yesu abaswike ukuti, Pantu ukwisiba inkama ya bufumu bwa mumulu kwalipewa kuli mwebo, lelo tekuli bena.

<sup>12</sup> Pantu umuntu uwakwatapo fimo akapelelwapo nafimbi, pakweba ati akakwate ifingi ukukilapo, lelo umuntu usyakwata nangu kimo akapokwa na kanono kantu akwata.

<sup>13</sup> Ifi efintu ndandila nabo mumilumbe, "Pakuti balolesye, lelo ukwabula ukumona kibili bomfwe lelo ukwabula ukwiluka.

<sup>14</sup> Ubusesemo bwakwa kasesema Esaya bwalifkilisyе kuli bena ukuti,

"Mukomfwa lelo ukwabula ukwiluka, mukalolesya lelo ukwabula ukumona,

<sup>15</sup> pantu imitima yaaba bantu tayakutulukwa,

kibili na matwi yabo yalikoma.

Kibili baalisala amenso yabo, Ngateifyo amenso yabo, ngayalamona, na matwi yabo ngayalomfwa, Ne mitima yabo ngaileluka kibili ngabalibwelela kuli nebo ukuti imbondape."

<sup>16</sup> "Lelo yalipalwa amenso yenu pantu yalamona, namatwi yenu pantu yalomfwa.

<sup>17</sup> Ndemyeba ukuti bakasesema abengi na bantu abalungami balefwaisya ukumona ifi, lelo tabafimwene, kibili balefwaisya ukumfwa ifi muleumfwa lelo tabafyumfwile.

*Yesu alondolola umwaloolele umulumbe  
(Mako 4.13-20; Luka 8.11-15)*

<sup>18</sup> "Umfweri nomba umulumbe wakwa katanda fintu ulepilibula.

<sup>19</sup> Umuntu ngaumfwa imbila yapa Befumu ukwabula ukwiluka, aba ngembuto syaponene mumbali yansila. Umubiifi alesa nokwisa sompolo ifyabyelwe mutimita wakwe.

<sup>20</sup> Imbuto syaponene pansakalabwe simininako, abantu abomfwa imbila kibili palye pene baipokelela ne nsansa,

<sup>21</sup> Lelo apo muli bena tamwaba misila. Basipikisyafye apalinga kibili lintu amafya no kupakaswa kwaisa pamulandu wambila balanenuka bwango.

<sup>22</sup> Imbuto syaponene mumyunga simininako abo bonse abomfwa imbila, lelo amasakamiko yabwikasi buno nomukonkelelo wafyuma watosya imbila, kibili tabatwala fisabo.

<sup>23</sup> Kibili nembuto syaponene mu musili uusuma simininako abo bonse abomfwa imbila nokwiluka, balatwala ifisabo, bamo imiku umwanda umo, bambi amakumi mutanda, kibili nabambi amakumi yataatu ukukila fintu babyele."

*Umulumbe wakalolo*

<sup>24</sup> Yesu abebele umulumbe naumbi ukuti, "Ubufumu bwa mumulu bwaba ngo muntu uwabyele imbuto isisuma mwibala lyakwe.

<sup>25</sup> Lelo lilya abantu bonse bali mutulo ubusiku, umulwani aisile byalamo kalolo munjano nokuya.

<sup>26</sup> Kilya imisonga yamena yapakula nokupakula, elo kalolo nayo yamoneka.

<sup>27</sup> Ababomfi baulya muntu baisile kuli ena nokumweba ukuti, 'Mwemfumu, busye tamwatandile imbuto isisuma mwibala?' Nga kalolo aafumine pi?

<sup>28</sup> Ayaswike ukuti, 'Umulwani ewakiti ifi. Busye ulefwaya tuleyanukulamo kalolo?'

<sup>29</sup> Abaswike ukuti, 'Awe, pantu ilyo mulenukula kalolo kuti mwanukwila pamo nejano.'

<sup>30</sup> Lekeni ijano na kalolo fikulile pamo mpaka pa busombosi. Nkeba abakalasombola ukunukulamo kalolo pakwamba, ukuikaka mufikuka nokuyokya, kabili nokulonganya ijano ukubika mubutala.'"

*Umulumbe wa luseke lwalubanga  
(Mako 4.30-32; Luka 13.18-19)*

<sup>31</sup> Yesu abebele umulumbe naumbi ukuti, "Ubufumu bwamumulu bwaba ngo luseke lwa lubanga ulo umuntu apitile nokuya byala mwibala lyakwe."

<sup>32</sup> Luseke ulunono panseke syonse, lelo ilyo lwakula, luba kimpunsa ikikalamba palifyonse mwibala. Kisanguka ikimuti, ikyakuti nefyoni fipanga ifinsa kumisambo yakiko."

*Umulumbe wantutumusi  
(Luka 13.20-21)*

<sup>33</sup> Kabili Yesu abeba naumbi umulumbe ukuti, "Ubufumu bwamumulu bwaba nge ntutumusi sintu namayo apitile angandwila mufipimo fitatu ifyabunga mpaka umufuba onse watutumuka."

*Kintu Yesu aalandile imilumbe  
(Mako 4.33-34)*

<sup>34</sup> Fyonse ifi Yesu abomfesye imilumbe pakweba amabumba, taalandile ikintu nangu kimo ukwabula ukubomfyा umulumbe.

<sup>35</sup> Akiitile ifi mukufikilisa fintu kasesema Ezaya alandile ukuti,

"Nkabomfyा imilumbe pakulanda nabo, nkabeba ifintu ifyafisama ukutula papubumbo bwe sonde."

*Yesu alondolola umulumbe wakalolo*

<sup>36</sup> Yesu afumine pa mabumba nokwingila munjanda, abasambi bakwe baisile kuli ena nokumweba ati, "Twebe fintu umulumbe wakalolo mwibala ulepililuba."

<sup>37</sup> Yesu abasuka ukuti, "Umuntu uwabyele inseke isisuma Mwana Wamuntu.

<sup>38</sup> Ibalu lisonde, inseke isisuma bantu aba Mubufumu, kalolo bantu bamubifi,

<sup>39</sup> kabilu nomulwani uwatandilemo inseke ni Kiwa. Ubusombosi nimpela yankulo, kabilu na babomfi babusombosi ni bamalaika.

<sup>40</sup> Ngafilya kalolo alonganikwa nokokewa mumulilo, efintu kikaba na pampela yakyalo.

<sup>41</sup> Umwana Wamuntu akatuma bamalaika mukukolonganika abo bonse abalenga abantu ukubembuka nabo bonse abakita ifintu ifibi, ukubafumya Mubufumu bwakwe,

<sup>42</sup> kabilu bakabaposa mwilungu lyamulilo, umukuba ukulila nokusumanya ameno.

<sup>43</sup> Elo abalungami bakabengesime nga kasuba Mubufumu bwakwa Tata. Uukwete amatwi naomfwe!

*Umulumbe wakipao kyafiswa*

<sup>44</sup> "Ubufumu bwa mumulu bwaba nge kipao kyafiswa mwibala kintu umuntu atutwila nokufimbapo, elo ayasansamuka ngansi, asitisya nafyonse fintu aakwata ayasitamo lily ibala.

*Umulumbe wa bulungu*

<sup>45</sup> "Nakabili Ubufumu bwa mumulu bwaba ngo muntu wamakwebo ulefwaya ubulungu ubwayemba.

<sup>46</sup> Kilya asanga ubwayembesa ayasitisya fyonse fintu aakwata nokuyabusita.

*Umulumbe wa Bukonde*

<sup>47</sup> "Kabili Ubufumu bwamumulu bwaba ngo bukonde ubwaposwa pamumana nokwipaya isabi lyamisango yonse.

<sup>48</sup> Lintu isabi lyaisula mubukonde abashila babutintila kunshiko baikala balasala, ilisuma babika mukitunga, ilibi baliposa.

<sup>49</sup> Efintu kikaba pakupwa kwakyalo, bamalaika bakesapatula abantu ababifi ukubafumya kubalungami

<sup>50</sup> nokuyabaposa mwilungu lyamulilo umo bakalila nokusumanya ameno yabo.

*Iciine cakale necipyा*

<sup>51</sup> "Elo Yesu abepusya ukuti, "Busye Namwiluka ifintu fyonse ifi?"

Nabo bamwasuka ukuti, "Ee".

<sup>52</sup> Kabili abebele ukuti, "Eikyo onse kafundisyा Wefunde uwaba umusambi wa Mubufumu bwa mumulu ali ngomwine wanjanda uufumya ifipao fyakwe ifipyा ne fyakale muntu afisungila."

*Yesu bamukana ku Nazareti*

*(Mako 6.1-6; Luka 4.16-30)*

<sup>53</sup> Lintu Yesu apwisisye ukulanda iyi milumbe alifumine kuli ilya nkende

<sup>54</sup> nokubwelulukila ku musumba wakwe. Aafundisyę musinagogi nabonse abauwmileko balisungwike. Baipwisye ukuti, "Busye nippii aafumya aya mano namaka yakukita ifisungusyo?"

<sup>55</sup> "Busye uyu temwana Kapopa wambao? Busye temwana Mariya? Busye Yakobo, Yosefu, Simoni na Yuda tebamunyina?

<sup>56</sup> Busye bankasi yakwe tatwikala nabo kuno? Nga nipi aafumya fyonse ifi fintu?"

Eikyo balimukene.

Lelo Yesu abebele ukuti, "kasesema kunkende syonse balamukindika ukufumyakofye mumusumba wakwe nakuli balupwa bakwe."

<sup>58</sup> Eikyo takitileko ifisungusyo ifingi pantu tabakwete ikitetekelo.

**14**

*Imfwa yakwa Yohani Kabatisya  
(Mako 6.14-29; Luka 9.7-9)*

<sup>1</sup> Pali ilya nsita Herodi imfumu yamu Galili, yaumfwile ululumbi pali Yesu.

<sup>2</sup> Yaebele bakilolo bakwe ukuti, "Ni Yohani Kabatisya eubukile kubafwa, ekintu akwatiile amaka yakukita ifisunguso."

<sup>3</sup> Pantu Herodi alikete Yohani, amukaka mu minyololo nokumubika mukifungo. Akitile ifi pamulandu na Herodyasi muka muninya Filipi.

<sup>4</sup> Yohani aebele Herodi ukuti, "Takyasuminisiwa webo ukupa Herodyasi!"

<sup>5</sup> Herodi alefwaya ukwipaya Yohani lelo aletina abantu, pantu bena balisumine Yohani ukuti ni kasesema.

<sup>6</sup> Lelo Pakusefya ubusiku bwa kufyalwa kwakwa Herodi, umwana wakwa Herodyasi umwanakasi alicindile ku ntansi ye bumba kibili alisekesye Herodi,

<sup>7</sup> ikyakuti alilapile ukumupela kyonse kintu engalomba.

<sup>8</sup> Lelo nyina ailemusonga, eikyo alandile ati, "Mpeni umutwe wakwa Yohani Kabatisya pansani!"

<sup>9</sup> Imfumu yalisakamene lelo pamulandu nomulapo yapangile pa meno ya bantu bonse yakoncomesye ukuti bamupele.

<sup>10</sup> Yatumine abakuyaputula umutwe wakwa Yohani mukifungo.

<sup>11</sup> Baletele umutwe pa nsani bapela akakasyana, nako kayapeela nyina.

<sup>12</sup> Abasambi bakwa Yohani bapiitile ikitumbi bayasika elo bayaea Yesu.

*Yesu apeela amakana ya bantu yane ifyakulya*

*(Mako 6.30-44; Luka 9.10-17; Yohani 6.1-14)*

<sup>13</sup> Lintu Yesu aumfwile ifyakitiike, afumine kulya nobwato nokuya kunkende yakwe eka. Lelo lintu ibumba lyaumfwile ifi, lyamukonkele ulwa pansi ukufuma mumisumba.

<sup>14</sup> Lintu Yesu afikile ku nshiko amwene ibumba ilikalamba, umutima wakwe waiswilemo inkumbu, kibili aundepa amalwele yonse.

<sup>15</sup> Mukungulo abasambi bakwe baisile kuli ena nokumweba ukuti, "Kuno tuli nikukiswebebe kibili nakasuba nakawa, eba abantu baye mumisi bayesita ifyakuti balye."

<sup>16</sup> Yesu nao abaswike ukuti, "Tabafwile ukuya, mwebobene bapeniko ifyakuti balye!"

<sup>17</sup> Bayaswike ukuti, "Tukwetefye imikate isano nesabi libili."

<sup>18</sup> Yesu alandile ukuti, "Leteni kuli nebo."

<sup>19</sup> Aebele amabumba ukwikala pafyani, elo abuula imikate isano ne sabi libili, aolesya mu mulu aapala ifyakulya. Aamokwele imikate isano apela abasambi, nabo abasambi bayakanya abantu.

<sup>20</sup> Abantu bonse balilile nokwikuta. Kabilo nabasambi bapiitile ifitunga ifyaisula ifyakulya fyasyelepo.

<sup>21</sup> Impendwa yabaume abalile yali amakana yasano (5,000) ukwabula ukupendelako abanakasi, na baana.

*Yesu aenda pamensi*  
*(Mako 6.45-52; Yohani 6.15-21)*

<sup>22</sup> Yesu aebele abasambi bakwe ukupatama mubwato bamutangilile busilya bwa mumana, ilyo ena alesalanganya abantu.

<sup>23</sup> Panuma ya kusalanganya abantu, apilukile pa lupili mukupepa. Lintu ikyungulo kyafikile aali kulya kwine eka,

<sup>24</sup> lelo pali iyi nsita ubwato bwali nabufika apatali, bwalesenkela namaputa pantu umwela walebusunka.

<sup>25</sup> Kuli kakula Yesu aisile ku basambi, aleyenda pamumana.

<sup>26</sup> Lintu abasambi bamumwene aleyenda pamumana balitiinine ngansi, baebele ukuti, "Kiwa!" Kabilo bapundile no mwenso.

<sup>27</sup> Lelo Yesu palyapene abeba ukuti, "Tekeni imitima, Ninebo mwitiina!"

<sup>28</sup> Petelo epakulanda ukuti, "Wemfumu, nganiwebo ngeba ingise kuli webo ndeyenda pamensi."

<sup>29</sup> Yesu nao amwaswike ukuti, "Isa!" Petelo akokele mubwato nokwamba ukwenda pamensi aleya kuli Yesu.

<sup>30</sup> Lelo lintu amwene umwela alitinine, ayamba nokwibila mumensi. Alilile ukuti, "Mwe Mfumu, mpususyenii!"

<sup>31</sup> Yesu palyapene atambulwile ukuboko amukwata nokulanda ukuti, "We mutu wakittekelo kinono! Kinsi wakitwiskila?"

<sup>32</sup> Lintu bapateme mubwato nomwela walala.

<sup>33</sup> Elo abaali mubwato basinsimwine Lesa ukuti, "Mukiine uli Mwana wakwa Lesa!"

*Yesu aundapa umulwele mu Genesareti*  
*(Mako 6.53-56)*

<sup>34</sup> Kabilo lintu bayabwike umumana, baisile kukyalo kya Genesareti.

<sup>35</sup> Lintu abantu bakuli ilya nkende baisibe Yesu, balaisye bonse muli ilya nkende ukuleta bonse abaali nabawala kuli Yesu.

<sup>36</sup> Balimupapatile ukuti, aleke abalwele bakumyekofye kumpela yansalu yakwe, kibili na bonse abakumisyeko balipolele.

## 15

### *Amafundisyo ya fikolwe (Mako 7.1-13)*

<sup>1</sup> Elo Abafalise bamo naba Kafundisya bamafunde bafumine ku Yerusalem baisa kuli Yesu nokumwipusya ukuti,

<sup>2</sup> "Nikinsi abasambi bobe baletobela intambi syafikolwe fyesu? Tabasamba ku minwe pakulya!"

<sup>3</sup> Yesu abaswike ukuti, "Nemwe nikinsi mutobela ifipope fyakwa Lesa, pamulandu nentambi syenu?

<sup>4</sup> Pantu Lesa alandile ukuti, 'Ulekindika wiso na noko,' kibili 'naonse uwalandia ifibi pali wisi nangu pali nyina, awfile ukwipaiwa.'

<sup>5</sup> Lelo mwebo mulanda ukuti umuntu nganakwata fintu engafwilisya wisi nangu nyina, mulanda ukuti, 'fyakwa Lesa,'

<sup>6</sup> eikyo tafwile ukukindika wisi, pamulandu nentambi syenu mulenga imbila yakwa Lesa ibe iyafye.

<sup>7</sup> Mweba bumbimunda! Ezaya alilungike lintu aseseme pali mwebo ukuti,

<sup>8</sup> 'Aba bantu bankindikafye pa kanwa, lelo imitima yabo yaba ukutali nanebo.

<sup>9</sup> Bansinsimunafye apafye, namafunde yabo yabuntunse!' "

### *Ifintu ifilenga umuntu ukukowela (Mako 7.14-23)*

<sup>10</sup> Yesu aitile abantu nokubebe ati, "Kutikeni nokwiluka!

<sup>11</sup> Ifingila mukanwa kamuntu tafimulenga ukukowela lelo iffuma mukanwa kamuntu efimulenga ukukowela."

<sup>12</sup> Elo abasambi baisile kuli ena nokumweba ukuti, "Busye namwisiba ukuti aba False nakibakalipa lintu bakyumfwa fintu mwakilanda?"

<sup>13</sup> Yesu ayaswike ukuti, "Kyonse ikimuti kintu Taata mumulu tabyala, kikanukulwa.

<sup>14</sup> Balekeni, nintungulusi impofu, kibili impofu ngayatungulula impofu inankwe bonse kuwiila mucikulo."

<sup>15</sup> Petelo aebele ukuti, "Tulondolweleni umwalolola uyu mulumbe."

<sup>16</sup> Yesu abepwisyе ukuti, "Busye nanomba tamwiluka?

<sup>17</sup> Busye tamumona ukuti kyonse ikingila mukanwa, kipita munda, elo kyafumina kunse ya mubili?

<sup>18</sup> Lelo iffuma mukanwa, fifuma mu mutima kabilifi efilenga umuntu ukukowela.

<sup>19</sup> Pantu mumutima mufuma imilangwe iibi, ukwipaya, ubukende, ubulalelale, ubuno, bukambone bwa bufi, no musalula.

<sup>20</sup> Ifi efikowesya umuntu, lelo ukulya ukwabula ukusamba kuminwe takukowesya umuntu."

### *Ikitetekelo kyakwa namayo waku Ke-nani*

*(Mako 7.24-30)*

<sup>21</sup> Kibili Yesu afumine kulya nokuya kufitngu fya Tare na Sidoni.

<sup>22</sup> Namayo waku Kenani uwaleikala muli ilya nkende aisile alebilisyा ukuti, "We Mfumu, Mwana Davidi mbelela uluse! Umwana wandi umwanakasi alekyusiwa nekibanda."

<sup>23</sup> Lelo Yesu tamwaswikepo isiwi nangu limo. Kibili abasambi baisile kuli Yesu no kumupapata ukuti, "Mwebeni aleya! Aletupangilafye ifyongo!"

<sup>24</sup> Yesu ayaswike ukuti, "Natumwafye kumpaanga isyaluba isya munjanda yakwa Israeli."

<sup>25</sup> Lelo namayo apalamine mupepi, afukama pansi nokumupapata ukuti, "Ngafwilisyen'i mwe Mfumu!"

<sup>26</sup> Yesu ayaswike ukuti, "Tekintu ikyayana ukupita umukate wabana ukuposela imbw'a."

<sup>27</sup> Nao ayaswike ukuti, "Kisinka mwe Mfumu, lelo nembw'a sine silalya ubufungau bupona kwitebulu lyakwa wisikulu."

<sup>28</sup> Yesu epakumwasuka ukuti, "Uli namayo wakitetele ikikalamba! Kintu wakilafwaya kyalakitwa kuli webo." Kibili pali ilya ine nsita, umwana wakwe alipolele.

### *Yesu aundapa abantu abengi*

<sup>29</sup> Kibili Yesu afumine kulya nokuya kumumana wa Galili. Aapilukile mumbali yalupili nokuyaikala kulya.

<sup>30</sup> Amabumba ayakalamba yaisile kuli ena nokumuleleta abantu aabali, abalema, impofu, ababulebe, bankomya matwi nabambi abantu abaali nabawala, bababikile pankasa syakwa Yesu, nao alibondepe.

<sup>31</sup> Abantu balipapile ukumona bakibulu balelanda, abalema baleyenda, nempofu silemona kibili balumbenye Lesa wabena Israeli.

### *Yesu alisha abantu amakana yane (Mako 8.1-10)*

<sup>32</sup> Yesu aitile abasambi bakwe abeba ukuti, "Nabomfwila inkumbu aba bantu, pantu baaba namebo pansiku sitatu nomba apa tabakwete ifyakuti balye. Nsilefwaya ukubatuma baye ukwabula ukulya pantu kuti bapona ulushile pakuya."

<sup>33</sup> Abasambi bamwipwisye ukuti, "Nipi twalasanga ifyakulisyা ili ibumba muno mukiswebebe?"

<sup>34</sup> Yesu abepwisyе ukuti, "Mukwete imikate inga?"

Nabo bamwaswike ukuti, "Tukwete imikate kinelubali nesabi iyalinga."

<sup>35</sup> Yesu aebele ibumba ukwikala pansi.

<sup>36</sup> Elo apiita imikate kinelubali nesabi, atasaya Lesa, amokola apela abasambi nabo bapeela abantu.

<sup>37</sup> Bonse balilile nokwiku faisyalanapo. Abasambi bapiitile ifitunga kinelubali ifyaisula ifyakulya faisyalepo.

<sup>38</sup> Impendwa yabaume abaalile ukwabula ukpendelako abanakasi nabana yali amakana yane.

<sup>39</sup> Panuma Yesu asalanganya abantu, apateme mubwato nokuya kukyalu kya Magadani.

## 16

### *Abafalise balomba ikisibili (Mako 8.11-13; Luka 12.54-56)*

<sup>1</sup> Kibili Abafalise naba Saduki baisile kuli Yesu mukumwesya, eikyo bamwipwisye ukuti abalange ikisibili ukufuma mumulu.

<sup>2</sup> Lelo Yesu abaswike ukuti, "Akasuba nga kawa, mulanda ukuti, 'lelo kwalaba bwino, pantu umulu uli uwakasika.'

<sup>3</sup> Kibili ulukyelo mulanda ukuti, 'yalaloka pantu umulu uli uwakasika kibili uwafita.' Mwalisiba ukwilula imimonekele ya mulu, lelo teti mwilule ifisibili fya nsita!

<sup>4</sup> Inkulo iibifi kibili iyabukende ifwaya ikisibili, lelo takuli ikisibili ikitapelwa kuli yena ukukila pa kisibili kyakwa Yona."

Eifyo Yesu alibasile nokuya.

### *Intutumusi syaba Falise naba Saduki (Mako 8.14-21)*

<sup>5</sup> Lintu bayabukile busilya bwamumana, abasambi balilabile ukupiita umukate.

<sup>6</sup> Yesu abebele ukuti, "Kengeleni ku ntutumusi syaba Falise naba Saduki."

<sup>7</sup> Bayambawile abene beka ukuti, "Aalandila ifi pamulandu tatupitile umukate."

<sup>8</sup> Lelo Yesu aisibe fintu baleyambaula, alandile ukuti, "Mwebakitekelo ikinono, kinsi muleyambawila pakukana kwata umukate?"

<sup>9</sup> Busye tamwailuka nandakai? Busye tamwibusya imikate isano fintu yalisise abantu amakana yasano? Busye mwaiswisye ifitunga finge, ifya fyakulya faisyalepo?

<sup>10</sup> Nga pamikate kinelubali iyo nalisise abantu amakana yane? Busye mwaiswisye ifitunga finge, ifya fyakulya faisyalepo?

<sup>11</sup> Nikinsi mwakifililwa ukwiluka ukuti nsyakilalanda pa mukate? Kengeleni kuntu musi syaba Falise naba Saduki."

<sup>12</sup> Elo abasambi bailewike ukuti taalelenda pa ntutumusi sya mumikate, lelo ni pamafundisyo yaba Falise naba Saduki.

*Petelo alanda ukuti Yesu ni Klistu  
(Mako 8.27-30; Luka 9.18-21)*

<sup>13</sup> Lintu Yesu aisile mukitungu kya Kaesaliya Filipi, aipwisye abasambi bakwe ukuti, "Busye abantu balanda ukuti Umwana Wamuntu ninani?"

<sup>14</sup> Bayaswike ukuti, "Bamo balanda ukuti ni Yohani Kabatisya, bambi balanda ati ni Eliya, elo bambi balanda ukuti ni Yeremaya nangu umo muli ba kasesema."

<sup>15</sup> Elo Yesu abepwisye ukuti, "Ngamwebo mulanda ukuti ninebo nani?"

<sup>16</sup> Simoni Petelo ayaswike ukuti, "Niwebo Klistu, Umwana wakwa Lesa uwamweo."

<sup>17</sup> Yesu amwaswike ukuti, "Walipalwa we Simoni mwana Yohani, pantu tekumuntu iki kisinka kyasokolwelwa kuli webo, lelo ni Taata uwamumulu ewakupela ubusokololo.

<sup>18</sup> Kibili nakweba ukuti niwebo Petelo, kibili napa ili libwe nkakulapo ulukuta lwandi nempongolo syamaka yamfwa tafyakalukinfye.

<sup>19</sup> Nkakupa imfungulo syabufumu bwa mumulu, kyonse kintu wakaka pesonde, namumulu kikakakwa, kibili nakyonse kintu wakakula pesonde na mumulu kikakakulwa."

<sup>20</sup> Elo Yesu asoka abasambi bakwe ukuti tabafwile ukwebako umuntu nangu umo ukuti ni Klistu.

### *Yesu asobela imfwa yakwe nokukyula (Mako 8.31—9.1; Luka 9.22-27)*

<sup>21</sup> Ukufuma pali ilya nsita Yesu ayambile ukweba abasambi bakwe ukuti, "Nkaya Yerusalemu mukukyula apakalamba ku bakalamba, kuli basimapepo bakindami nabakafundisya Bamatunde. Nkepaiwa, lelo panuma yansiku sitatu nkabusiwa kubafwa."

<sup>22</sup> Petelo apiitile Yesu pambali nokumakalipa ukuti, "Iyoo we Mfumu! Ifi tafyakamikitikile!"

<sup>23</sup> Yesu apiilibwike nokweba Petelo ukuti, "Fuma kuli nebo Satana! Uli kyakumpumfyanya munsila yandi, pantu amatotonkanyo yobe yabuntunse tayalefuma kuli Lesa."

<sup>24</sup> Yesu abebele abasambi bakwe ukuti, "Onse ulefwaya ukuba umusambi wandi, aikane umwine, apiite umusalaba wakwe nonkunkonka."

<sup>25</sup> Pantu onse upususya umweo wakwe akulufya, lelo onse ulufya umweo wakwe pamulandu wandi akausanga.

<sup>26</sup> Busye umuntu finsi engakwatamo, nganonka isonde lyonse, lelo alufya umweo wakwe? Takuli kintu umuntu engapela ukukabusya nomweo.

<sup>27</sup> Pantu Uwmuna Wamuntu alinokwisa mubukata bwakwa Wisi naba Malaika bakwe, mukulambula umuntu ukulingana nefikitwa fyakwe.

<sup>28</sup> Ndemyeba ikisinka ukuti bamo pano tabakafwe mpaka bakamona Uwmuna Wamuntu aleisa Mubufumu bwakwe."

## 17

### Yesu ayaluka

(Mako 9.2-13; Luka 9.28-36)

<sup>1</sup> Panuma yansiku mutanda Yesu apitiile Petelo, Yakobo namunyina Yohani pa lupili ulutali apo baileba beka.

<sup>2</sup> Yesu ayalwike pamenso yabo. Pamenso yakwe pabengesime nga kasuba. Nensalu syakwe syasangwike isyabuta ngo lubuuto.

<sup>3</sup> Kibili kwamonekele Mose na Eliya baleambaula na Yesu.

<sup>4</sup> Petelo epakweba Yesu ukuti, "We Mfumu kuti kyawama twaikala pano. Ngaulefwaya nalakula imitanda itatu, umo uobe, umo uwakwa Mose naumbi uwakwa Eliya."

<sup>5</sup> Lintu Petelo akili alelanda, awe inkumbi iyabeka lyabakupa, kibili nesiwi lyafumine mumakumbi nokulanda ukuti, "Uyu Mwana wandi untu natemwa, eombekelwamo mumfwileni!"

<sup>6</sup> Lintu abasambi baumfwile isiwi, bawile pansi ubunkupeme kibili baiketwe nomwenso.

<sup>7</sup> Lelo Yesu aisile kuli bena nokubakumya, elo abeba ukuti, "Imeni, mwitina!"

<sup>8</sup> Lintu bainwine amenso tabamwene nangu umo lelo Yesu ekafye.

<sup>9</sup> Lintu baletentemuka pa lupili, Yesu abakonkomesye ukuti, "Mwiyebak nangu umo ikimonwa, mpaka Uwmuna Wamuntu akabuswi kubafwa."

<sup>10</sup> Kibili abasambi bamwipwisyekuti, "Busye nikinsi bakafundisybamafunde balandila ukuti Eliya awfile abalilapo ukwisa?"

<sup>11</sup> Yesu nao abaswike ukuti, "Kisinka, Eliya ali nokwisapo bwangu kibili akesa mona ukuti ifintu fyonsenfyabelamuntufifwile ukubela.

<sup>12</sup> Lelo ndemyeba ukuti Eliya alisa kale kibili na bantu tabamwisisibe, bamukitile ukulingana nefyabasekesye. Efintu no Mwana Wamuntu bakamukyusya."

<sup>13</sup> Elo abasambi bailwike ukuti alebeba pali Yohani Kabatisya.

*Yesu aundapa akalumendo akakwete ikibanda*

(Mako 9.14-29; Luka 9.37-43a)

<sup>14</sup> Lintu babwelele kwibumba, umuntu aisilefukamina Yesu nokumweba ukuti,

<sup>15</sup> "We Mfumu belela umwana wandi uluse! Pantu alapona ikifulubi kabilialakyula ububi. Ilingi alaponena mumensi na mumulilo.

<sup>16</sup> Nakimuleta ku basambi bobe lelo tabakimundapa."

<sup>17</sup> Yesu ayaswike ukuti, "Mwenkulo iisyasumina, kabilia iyaumalala imitimai! Busye nkekala namwebo ukufika lisa? Busye nkasisipikisyekwikala namwebo ukufika lisa? Leteni akalumendo kuli nebo!"

<sup>18</sup> Yesu akalipile ikibanda, nakyo kyafumine mukalumendo napali kalya kene kasita kapola.

<sup>19</sup> Elo abasambi baisile kuli Yesu bamwipusya kumbali ukuti, "Busye nikinsi fwebo twakifililwa ukutamfyekibanda?"

<sup>20</sup> Abaswike ukuti, "Nipamulandu wa kitetekelo kyenu ikinono, ndemyeba ikisinka ukuti ngamwakwata ikitetekelo nga kaluseke ka lubanga, kuti mwalandu ku lupili ulu ukuti, 'Fuma apa selela kulya!' Nalo kuti Iwasela. Tapali ifikasyupa kuli mwebo."

<sup>21</sup> Lelo ifi tafiyafye kano kwi pepo nokufunga.

*Yesu asobela imfwa yakwe nakabili*  
(Mako 9.30-32; Luka 9.43b-45)

<sup>22</sup> Lintu abasambi bakolongene bonse mu Galili, Yesu abebele ukuti, "Uwmuna Wamuntu alaba pakupelwa mumaboko ya bantu

<sup>23</sup> bakamwipaya, lelo panuma ya nsiku sitatu akabusiwa kubafwa."

Kibili abasambi baiswilemo ubulanda.

### Umusonko we Tempele

<sup>24</sup> Lintu Yesu nabasambi bakwe baisile mu Kapenamu, bakasonkesya bamusonko wamwi tempele baisile ipusya Petelo ukuti, "Busye kafundisyewenu talipila umusonko wa mwi tempele?"

<sup>25</sup> Petelo nao abaswike ukuti, "alalipila."

Kibili lintu Petelo aisile parjanda, Yesu ewabalilepo ukumwipusya ukuti, "Simoni ngawebosyleti syani? Nibani balipila umusonko ku mfumu syapano kyal? Busye bana babo nangu bantu bambi?"

<sup>26</sup> Petelo alandile ukuti, "bantu bambi"

Yesu amwebele ukuti, "Ikilepilibula ukuti abana babo tabafwile ukulipila.

<sup>27</sup> Lelo tatulefwaya ukuleta ubwafya. Kabiye ku mumana uposepo indobani, isabi ulebalilapo ukuloba, wisule mukanwa ulesangamo ulupiya ulwalinga ukulipila umusonko wamwi tempele ulobe nolwandi. Ulupiite uleyabalipila umusonko wesu."

## 18

### Ninani umukalamba?

(Mako 9.33-37; Luka 9.46-48)

<sup>1</sup> Pali ilya nsita abasambi baisile kuli Yesu mukumwipusya ukuti, "Busye ninani umukalamba mu bufumu bwa mumulu?"

<sup>2</sup> Yesu aitile umwaike amwimika pakati kabo,

<sup>3</sup> nokulanda ukuti, "Ndemyeba ikisinka ukuti ngatamatupilibwike nokuba ngo mwana umunono tamwakengile mubufumu bwa mumulu.

<sup>4</sup> Onse uwaikefyia ngo mwana umunono, mukalamba mu bufumu bwa mumulu.

<sup>5</sup> Onse uwapokelela umwana umunono ngoyi mwisina lyandi, ninsi apokelela nebo.

*Mwilalenga bambi ukubifya  
(Mako 9.42-48; Luka 17.1-2)*

<sup>6</sup> Lelo onse uwalenga ukuti kamo pali utu twaike utwasumina muli nebo ukubembuka, kyamuwamina ukumukakila ilibwe lyia kupelelako mu mukosi nokumuposa pali bembba washika.

<sup>7</sup> Akalanda pesonde pamulandu wafintu ifilenga abantu ukupunku! Pantu ifi fintu fyalingile ukwisa, lelo akalanda ku muntu uwalenga fise!

<sup>8</sup> Ukuboko kobe nangu ulukasa lobe ngalwakulenga ukubembuka, kuputuleko nokukuposa! Kyawamapo ukwingila ku mweo ukwabula ukuboko nangu ulukasa ukukila na maboko yabili nangu amakasa yabili nokuposwa mu mulilo wamuyayaya.

<sup>9</sup> Ilinso lyobe ngalyakulenga ukubembuka, lilobole nokuliposa! Kyawamapo ukwingila ku mweo nelinso limo ukukila na meno yabili nokuposwa mu Gehena.

*Umulumbe wampaanga iyalubile  
(Luka 15.3-7)*

<sup>10</sup> Moneni ukuti tamusalwilepo nangu kamo pali utu twaike. Pantu ndemyeba ukuti bamalaika batuko mumulu, lyonse bamona ikinso kyakwa Taata mumulu.

<sup>11</sup> Pantu Umwana Wamuntu aisile mukupusuya abantu baluba.

<sup>12</sup> Busye mwebo muletipo syani? Umuntu ngalikwata impaanga umwanda umo elo paluba imo? Busye tekuti asye isili amakumi pabula napabula kulupili nokuyafwaya iilubile?

<sup>13</sup> Ndemyeba ikine kine ngaisanga, ala kuti ansansamukisya ngansi pali imo iyalubile ukukila pasili amakumi pabula napabula isisisilubile.

<sup>14</sup> Efintu na Wisinwe wamumulu tafwayapo ukuti nangu kamo pali utu twaike ukuloba.

*Ukwalulula munonko*

<sup>15</sup> "Munonko ngakubifya, kabiye kuli ena uleyamweba ikilubo uko muli babilo. Ngakumfwa ninsi mwawikisyanya na munonko.

<sup>16</sup> Lelo ngakana ukukumfwa, piitako umuntu umo nangu babili, pakuti ubwafya bonse busininkisiwe kuli bakambone babili nangu batatu.

<sup>17</sup> Kibili ngakana ukubomfwa, londolwelako abakulukuta. Ngakana ukumfwa ku lukuta lyena ninsi lekafye abe kuli webo ngo mwina fyalo nangu kasonkesya wamu sonko.

*Ukukanyako nokusuminisya*

<sup>18</sup> "Ndemyeba ikinekine ukuti, kyonse kintu mwakaka pesonde na mumulu kikakakwa, kibili na kyonse kintu mwakakula pesonde na mumulu kikakakulwa.

<sup>19</sup> "Kibili ndemyeba ukuti, ngakyakuti pabili pali mwebo basuminisyanya pano isonde pali kintu balomba, Taata wamumu akabakitila.

<sup>20</sup> Pantu ponse apo babili nangu batatu bakolonganwa mwisina lyandi nanebo nkaba pakati kabo."

*Umulumbe wamusya wabula uluse*

<sup>21</sup> Petelo aisile kuli Yesu amwipusya ukuti, "We Mfumu busye miku inga ningelela munynane uwandufyanya? Busye miku kinelubali?"

<sup>22</sup> Yesu amwaswike ukuti, "Nsakwebe ukuti imiku kinelubali lelo ndelanda ukuti," "amakumi kinelubali, imiku Kinelubali,

<sup>23</sup> eikyo ubufumu bwa mumulu bwaba nge mfumu iyalefwaya ukwisiba abasya bakwe fintu babomfesye ulupiya Iwakwe.

<sup>24</sup> Lilya yatampa ukupitulukamo, bailetela umusya umo uwamukongwele ulupiya lwa golide amakana ikumi limo.

<sup>25</sup> Uyu musya takwete ifyakuti alipile, eikyo imfumu yapingwile ukumusitisya pamo nomukasi wakwe, abana bakwe pamo nafyonse fintu akwete pamulandu wakulipila imisya.

<sup>26</sup> Uyu musya afukeme ku mfumu nokupapata ukuti, 'Ndoeleniko, nkamilipila fyonde!'

<sup>27</sup> Imfumu yalimumfwilile uluse, eikyo yalimwelele imisya nokumuleka aya.

<sup>28</sup> "Lelo uyu musya lilyafye afumapo, akumanya umusya mubiye uwamukongwele ulupiya lwa golide umwanda umo. Epakumukwata pamukosi alamweba ukuti, 'Ndipila fintu wankongola!'

<sup>29</sup> Umusya mubiye afukeme nokumupapata ukuti, 'Mpelako akasita, nkakulipila!'

<sup>30</sup> Lelo alikene ukumumfwa, asukwa amuposa mukifungo mpaka akamulipile imisya.

<sup>31</sup> Lintu abasya babiye bamwene ifyakiti, balifulilwe kibili baile kumfumu bayayeba ifintu fyonde.

<sup>32</sup> Eikyo imfumu yaitile umusya nokumweba ati, 'We musya umubi we!' 'Nalikwelele ulupiya wankongwele lonse pamulandu walimpapete ukuti nkwelele.

<sup>33</sup> Busye webo tekuti umfwile umubiyu uluse ngafintu nakubelele uluse.'

<sup>34</sup> Imfumu yalifulilwe ngansi, ikyakutu yaposele uyu musya mukifungo umo bali nokumukyusya mpaka akalipile ulupiya lonse.'

<sup>35</sup> "Ifi efintu Taata wa mumulu akakita kuli onse, ngatamwelela bamunonko ukufuma pansi yamitima yenu."

## 19

*Yesu afundisya pakulekana mufyupo  
(Mako 10.1-12)*

<sup>1</sup> Lintu Yesu apwisisye ukulanda aya masiwi, afumine mu Galili, aile kukyalokya Yudeya busilya bwa mulonga wa Yodani.

<sup>2</sup> Amabumba ayakalamba yalmukonkele kabilo alibondepe kulya kwine.

<sup>3</sup> Abafalise bamo baisile kuli Yesu bamwipusya ilipusyo lyakumwesya ukuti, "Busye kyalisuminisiwa umwaume ukuleka umukasi wakwe pamulandu uli onse?"

<sup>4</sup> Yesu abaswike ukuti, "Busye tamabelenga ukuti uwababumbile ukutula mukutendeka, abumbile umwaume no mwanyakasi?

<sup>5</sup> Kabilo nokweba ati, 'Pamulandu waiki umwaume akasya wisi nanyina nokuya-suntinkana pamo nomukasi wakwe, kabilo aba babili bakaba umibili umo.'

<sup>6</sup> Nomba tabali babili lelo baba umo. Eikyo ikyabika Lesa pamo tapali umuntu uwingalekanya."

<sup>7</sup> Abafalise bamwipwisye ukuti, "Busye kinsi Mose aebele umwaume ukulembela umukasi kalata yakupwilapo ikyupo nokumutamfy?"

<sup>8</sup> Yesu abaswike ukuti, "Nipamulandu wakumalala kwa mitima Mose amisuminisyte ukuleka abakasi benu, lelo mukuten-deka takyali ngefi.

<sup>9</sup> Kabilo ndemyeba ukuti, onse uwaleka umukasi wakwe, pamulandu uusili wabulalelale, aupa naumbi ninsi akita ubukende."

<sup>10</sup> Abasambi bakwe bamwebele ati, "Ifi ngefintu kyaba pamulume nomukasi wakwe, ninsi kyawamapo ukukana upa."

<sup>11</sup> Yesu abaswike ukuti, "Tebantu bonse abengasumina aya mafundisyo, lelo kanofye kuli abo kyapelwa.

<sup>12</sup> Pantu kwaliba imilandu iyingi iyo abaume teti bopile, bamo nipamulandu efintu bafyelwefye, bambi teti bope pamulandu abantu ebabalenga ukuba muli

iyi nsila, kabilo nabambi basalapofye ukuti teti bope pamulandu no bufumu bwa mu-mulu. Lekeni uwingapokelela ili fundisyo alipokelele."

*Yesu apaala abana banono  
(Mako 10.13-16; Luka 18.15-17)*

<sup>13</sup> Abantu baletele abana abanono kuli Yesu, ukuti abatambalikepo amaboko nokubapepela. Abasambi balibakalipile.

<sup>14</sup> Lelo Yesu alandile ukuti, "Lekeni abana abanono bese kuli nebo mwibakanaya, pantu ubufumu bwa mumulu bwabo."

<sup>15</sup> Kabilo abatambalikepo amaboko nokufuma kulya.

*Umulumendo wafyuma  
(Mako 10.17-31; Luka 18.18-30)*

<sup>16</sup> Elo umuntu umo aisile kuli Yesu amwipusya ukuti, "We kafundisya, kisumansi ningakita pakukwata umweo wamuyaya?"

<sup>17</sup> Kabilo Yesu amwebele ukuti, "Kinsi ikyo wangitila ati umusuma? Lesa fye eka emusuma. Ngolefwaya ukukwata umweo wamuyaya, ulekonna ifipope fyakwe."

<sup>18</sup> Umulumendo aipwisye ukuti, "Busye nifisa?"

Yesu amwaswike ukuti, "Wilaiapaya, wilikita ubukende, wilaiba, wilabepesyabanta ubufu,

<sup>19</sup> ulekindika wiso na noko, kabilo uletemwa umubiyu ngafitu waitemwa."

<sup>20</sup> Umulumendo ayaswike ukuti, "Nalikonka ifipope fyonse ifi, busye nikinsi kimbi mfwile ukukita?"

<sup>21</sup> Yesu amwaswike ukuti, "Ngaulefwaya ukuba uwawpilikika, kabiyi uyesitisya fyonse fintu wakwata! Upele ulupiya kubapina, lyena ukakwata ifyuma mumulu. Elo wise unkonke."

<sup>22</sup> Lintu umulumendo aumfwile ifi, aile uwabulanda pantu ali nanonkesya.

<sup>23</sup> Kabilo Yesu aebele abasambi bakwe ukuti, "Ndemyeba ikinekine ukuti, kintu kyasupa uwafyuma ukwingila mu bufumu bwa mumulu.

<sup>24</sup> Nakabilo ndemyeba ukuti, kyayan-gukapo Ingamilia ukupula mu linsolyansindano ukukila uwafyuma ukwingila mu bufumu bwakwa Lesa."

<sup>25</sup> Lintu abasambi baumfwile aya masiwi balipapile umupwilapo. Baipwisye ukuti, "Nomba busye kansi ninani uwingapusuka?"

<sup>26</sup> Lelo Yesu abalolesye nokubasuka ukuti, "Ifi fintu fyayafya kabantu, lelo kuli Lesa fyonse fyalyanguka."

<sup>27</sup> Petelo ayaswike ukuti, "Mona fwебо twalisya ifintu fyonse nokukukonka. Busye nifinsi tulakwatamo?"

<sup>28</sup> Yesu abebele ukuti, "Ndemyeba ikinekine ukuti, lintu Uwmana Wamuntu akekala pakipuna kya bufumu ikyabukata

Mukyalo kipyä, namwebasambi bandi ikumi limo na babili, mukekala pafipuna fya bufumu mukupingula imikowa ikumi limo nasibili isya bena Israeli.

<sup>29</sup> Kibili naonse uwasya amayanda, bamunyina, bankasi yakwe, bawisi, banyina, abana nangu amabala pamulandu wandi, akapelelwapo pali fyonsye imiku umwanda umo kibili akakwata nomweo wamuyaya.

<sup>30</sup> Lelo abengi abantansi bakaba abanuma, kibili na bengi abanuma bakaba abantansi.

## 20

### *Umulumbe wa babomfi mwibala*

<sup>1</sup> “Pantu ubufumu bwa mumulu bwaba ngo mwine wa njanda, uwafumine kumakya ukuya fwaya abakubomba mwibala lya myangasi.

<sup>2</sup> Panuma baumfwana nabankito ukubalipila ulupiya lwa busiku bumo, abatumine mwibala mukubomba.

<sup>3</sup> Munsita ya naini koloko ya luchelo amwene na bambi nabemina ukwabula ifyakukita pa kisankano,

<sup>4</sup> nabo abebele ukuti, ‘Kabiyeni mubombe mwibala lya myangasi, ndemilipila ulupiwi ulwalinga.’

<sup>5</sup> Efintu baile. Aya nakabili mu kasuba pakati elo namunsita ya fiftini koloko, ayakita fimofine.

<sup>6</sup> Kilya akasuba kaba mukuwa muma seventini koloko asanga nabambi bemi-ninefye. Abepusya ukuti, ‘Kinsi mwimini-nine pano akasuba konse ukwabula ukulakita nangu kimo?’

<sup>7</sup> Nabo bamwaswike ukuti, ‘Nikyo tapali abakutwingisa inkito.’ Elo abeba ukuti, ‘Nemwe bene kabiyen i kabombeni mwibala lya myangasi.’

<sup>8</sup> ‘Lantu ikyungulo kyafikile, umwine we bala aebele kangalila wa bankito ukuti, ‘Ita abankito bonse ubalipe amalipilo yabo, wambile ku bakingila inuma, ulekelesye kuba kingila intansi.’

<sup>9</sup> Lantu Abankito abayambile ukubomba pantsia ya seventini koloko baisile, bafolele amalipilo yabusiku bumo.

<sup>10</sup> Lantu abaingile intansi baisile, baletontonkanya ati balefolapo amalipilo ayakulu pali bonse. Lelo bonse bafolele lumolwine.

<sup>11</sup> Lantu bapokele bayambile ukuilisyanya ku mwine we bala.

<sup>12</sup> Bamwebele ukuti, ‘Aba abanuma bakibombakofye insita imo. Lelo mwabala ipofine nafintu mwakitulipa. Twakilabomba mukasuba ninsi nakabalal!’

<sup>13</sup> Umwine we bala ayaswikepo umo pabankito ukuti, ‘Mune nsikufyengele, milipile amalipilo yabusiku bumo yantu twakyumfwana.

<sup>14</sup> Piita amalipilo yobe uleya! Nemwine ndefwaya ukulipila uyu uwanuma ngafintu nkulipile.

<sup>15</sup> Busye nsyakwata insambu sya kukita fintu ndimukufwaya no lupiya lwandi? Nangu waumfwaa akalumwa pantu ndi wabupe?’”

<sup>16</sup> “Eikyo abanuma bakaba abantansi, kibili na bantansi bakaba abanuma.”

*Yesu alanda pamfwa yakwe ulwa miku itatu*

(Mako 10.32-34; Luka 18.31-34)

<sup>17</sup> Kibili lintu Yesu aleya ku Yerusalem, apiitile abasambi bakwe ikumi limo na bibili pambali kibili munsila abebele ukuti,

<sup>18</sup> “Moneni, tulimukuya ku Yerusalem uko UMWANA WAMUNTU alaya pelwa kuli basimapepo bakindami naba kafundisya bamafundie. Balaya mupingwila ukufwa.

<sup>19</sup> Kibili bakamupela kubenafyalo abakamupunika, ukumulopola, kibili nokumutanika, lelo panuma yansiku sitatu akabusiwa ku bafwa.”

*Nyina alombela abaana bakwe ubukalamba*

(Mako 10.35-45)

<sup>20</sup> Elo nyina wa bana bakwa Zebede aisile kuli Yesu nabana bakwe, nokufukama, amulomba ifintu fimo.

<sup>21</sup> Kibili Yesu amwipwisyé ukuti, “Nikinsi ulefwaya?”

Nao alandile ukuti, “Suminisya abana bandi, mubufumu bobo umo akekale kukulyo kobe naumbi akekale kukuso kobe.”

<sup>22</sup> Yesu ayaswike ukuti, “TAMWISIBE KINTU MULELONBWA. BUSYE KUTI MWANWA ULUKOMBO LUNTU NALANWA?”

Nabo bamwaswike ukuti, “Ee kuti twanwa.”

<sup>23</sup> Yesu abebele ukuti, “Ee mukanwa mulukombo lwandi, lelo ukwikalaka kukulyo kwandi nangu kukuso tenebo uwakusum-inisya. Isi nkende syabo Taata apekanisisya.”

<sup>24</sup> Lantu abasambi ukumi limo abasyala baumfwile aya masiwi, balifililwe bamunyina babil.

<sup>25</sup> Yesu abetile pamo bonse nokubeba ukuti, ‘MWALISIBA UKUTI BANSYAMFUMU BA BENAFYALO BALIKWATA AMAKA PA BUFUMU BWABO, NENTUNGULUSI SYABO SILABOMFYA AMAKA SYAKWATA PABANTU.

<sup>26</sup> Lelo mwebo mwilakita nga bena. Umo pali mwebo ngalefwaya ukuba umukalamba, abe umubomfi wababiye,

<sup>27</sup> nakabili umo ngalefwaya ukuba uwantansi, abe umusya wenu

<sup>28</sup> kwati Mwana WAMUNTU TAISILE UKUTI BAMUPWINGILE LELO AISILE MUKUPYUNGA NOKUPELA UMWEO WAKWE MUKULUBULA ABANTU ABENGU.”

*Yesu aundapa impofu sibili  
(Mako 10.46-52; Luka 18.35-43)*

<sup>29</sup> Lintu balefuma ku Yeriko, ibumba ilikalamba lyalibakonkele.

<sup>30</sup> Abantu babili abaali impofu abaali nabekala mumbali yamusebo lintu baumfwile ukuti Yesu alepita babilisyse ukuti, "We Mfumu Mwana Davidi! Tubelete uluse!"

<sup>31</sup> Ibumba lyalibakalipile nokubeba ukuti bekale tondolo. Lelo bena bakonkenyepofye ukubilisyse ukuti, "We Mfumu, Mwana Davidi tulangulukileko!"

<sup>32</sup> Yesu aiminine nokubeta alabepusya ukuti, "Kinsi mulimukufwaya imikitile?"

<sup>33</sup> Nabo bamwaswike ukuti, "We Mfumu, tulimukufwaya ukumona!"

<sup>34</sup> Yesu abomfwilile inkumbu kibili abakwete mumenso, palyapene balimwene nokwamba ukumukonka.

## 21

*Yesu aingila mu Yesrusalemu nomukinsi  
(Mako 11.1-11; Luka 19.28-40; Yohani 12.12-19)*

<sup>1</sup> Kibili lintu Yesu na basambi bakwe bapalamine ku Yerusalem, baisile ku Betifage pa lupili lwa Miolife. Yesu atumine abasambi bibili,

<sup>2</sup> nokubeba ukuti, "Kabiyen'i mumusi uli kuntansi, kibili mwalaya sanga impunda naikakilwa pamo nakana, mukakule mundetele.

<sup>3</sup> Ngakyakuti umo amipusya, mumwebe ukuti, 'Imfumu ileffifwaya' Nao alemileka mupiite impunda."

<sup>4</sup> Ifi fyakitike mukufikilisa fintu kaseseema alandile ukuti,

<sup>5</sup> "Eba umwana umwanakasi Ziyoni ukuti, 'Mona Imfumu yobe ileisa kuli webo! Naifuka kibili ininine pali punda. Napa kana ka punda.'

<sup>6</sup> Abasambi baile nokuyakita fintu Yesu abebele ukukita.

<sup>7</sup> Baletele impunda nakana, bayansikepo insalu panuma ya mpunda, elo Yesu apilukilapo.

<sup>8</sup> Ibumba lyabantu abengi lyaambile ukwansika insalu syabo mumusebo, bambi nabo baleteta imisambo yafimuti baleyansika mumusebo.

<sup>9</sup> Ibumba ilyali kuntansi yakwa Yesu nelyali kunuma lyayambile ukubilisyse ukuti, "Lumbanyeni Mwana Davidi! Alipalwa uwisila mwisina lya Mfumi!"

<sup>10</sup> Lintu Yesu aingle mu Yerusalem, mu musumba monse mwakabile nasee! Ku fyongo kibili baleipusyafye ukuti, "Nani uyu?"

<sup>11</sup> Abantu mwibumba bayaswike ukuti, "Ni Yesu kasesema uwafuma ku Nazareti mu Galili."

*Yesu atamfyia abamakwebo mwi Tempele*

*(Mako 11.15-19; Luka 19.45-48; Yohani 2.13-22)*

<sup>12</sup> Yesu aingile mumusolo wetempele nokwamba ukutamfyia abantu bonse abalesitisya nokusita. Apilibwile amatebulo yabalekabusya ulupiya nefipuna fyabalesitisya inkunda.

<sup>13</sup> Abebele ukuti, "Kyalilembwa ukuti, 'injanda yandi iketwa injanda yamapepo.' Lelo mwebo mwaipanga umwakufisama abano!"

<sup>14</sup> Impofu nabalema baisile kuli Yesu mwitempele, nao alibondepe.

<sup>15</sup> Lelo lintu basimapepo mukalamba naba kafundisyia Bamafunde yakwa Mose bamwene ifisungusyo nokumfwa abaana balebilisyse ukuti, "Hosanna kuli Mwana Davidi!" Balifulilwe.

<sup>16</sup> Baipwisye Yesu ukuti, "Busye naumfwa fintu aba bana balelanda?"

Yesu nao abaswike ukuti, "Ee ningumfwa, busye tamwabelenga ilembo ililanda ukuti, 'Kutunwa twabana naku bakwibele kwafumine amalumbo?'"

<sup>17</sup> Kibili alibasile, afumine mu musumba aya ku Betani, uko ashikilwe ubusiku bonse.

*Yesu atiipa umukunyu  
(Mako 11.12-14,20-24)*

<sup>18</sup> Kumakya, lintu Yesu alebwelulukila ku musumba wa Yerusalem, ali naumfwa insala.

<sup>19</sup> Amwene ikimuti kya mukunyu mumbali yamusebo, lelo lintu aileko ailesanga takuli nangu kimo kwallifye amabula. Eikyo alandile kukimuti ukuti, "Tawakatwalepo ifisabo nakabili!" Palyapene ikimuti kya mukunyu kyauma.

<sup>20</sup> Lintu abasambi bamwene ifi, bali-papile ngansi. Baipwisye ukuti, "Busye umukunyu wauma syani apapene?"

<sup>21</sup> Yesu abaswike ukuti, "Ndemyeba ukuti, nganamukwata ikitetekelo kibili tamutwisi, teifi fyaka nakita mwingakita lelo, kuti mwaeba nolu lupili ukuti, 'Ima, ipose muli bemb'a nalo lukaiposa.

<sup>22</sup> Nganamusumina, mukapokelela kyonse kintu mwalomba mwipepo."

*Ilipusyo lya insambu syakwa Yesu  
(Mako 11.27-33; Luka 20.1-8)*

<sup>23</sup> Yesu aile mumusolo we Tempele kibili lilya alefundisyia, abakalamba na basimapepo mukalamba baisile mwipusya ukuti, "Ninsambunsi wakwata isyakukita ifi fintu? Ninani wakupela isi nsambu?"

<sup>24</sup> Yesu abaswike ukuti, "Nalamipusy ilipusyo limo, kabi ngamwangasuka nalamyeba insambu nakwata isyakukita ifi fintu.

<sup>25</sup> Busye nipi insambu syakwa Yohani isyakubatisya syafumine, busye nikuli Lesa nangu niku bantu?"

Bantampile ukwambaula abene beka ukuti, "Busye twalalandia syani? Ngawayasuka ati, 'Nikuli Lesa,' aletweba ukuti, 'Nikinsi tamwasuminine Yohani?'

<sup>26</sup> Lelo ngatwalanda ukuti, 'Niku bantu,' Tuletina fintu abantu bengakita, pantu bonse balisininwe ukuti, Yohani ali ni kasesema."

<sup>27</sup> Eikyo bayaswike Yesu ukuti, "Tatwisibe."

Nao abebeba ukuti, "Nandibo nsyamyeba kuntu mfumya insambu syakukita ifi fintu."

#### *Umulumble wa bana abaume babili*

<sup>28</sup> "Busye muletipro syani? Kwali umuntu uwakwete abana abaume babili, aile kuwantansi amweba ukuti, 'Wemwana kabiye ulyabomba mwibala lya myangasi lelo.'

<sup>29</sup> Alandile ukuti nsileyako lelo panuma yansita apilubula imilangwe aya bomba.

<sup>30</sup> Elo Wisi aile kabiili ku mwana umbi ayamweba fimoine. Ayaswike ukuti nalaya lelo taileko.

<sup>31</sup> Busye mwanansi wakitile ifyalefwaya wisi?"

Bayaswike ukuti, "Uwantansi."

Eikyo ndemyeba ikinekine ukuti, bakasonkesya bamusonko naba kilende balemitangilila ukwingila mubufumu bwamumulu.

<sup>32</sup> Pantu Yohani Kabatisya aisile kuli mwebo mukumilanga insila yabulungami, tamwamusumine. Lelo bakasonkesya wamusonko nabakilende balimusumine. Kabiili nalintu mwamwene ifi tamwalapile nokusumina.

#### *Umulumble wa balesonkela mwibala lya myangasi*

(Mako 12.1-12; Luka 20.9-19)

<sup>33</sup> Kutikeni kumulumble naumbi, kwali umwine wakisonso uwalimine ibala lya myangasi, akulilileko ulubango, aimbile umwakufinina imyangasi kabiili aakula no lupungu. Elo asonkesya ibala kubalimi nokuya mu kyalo kimbi.

<sup>34</sup> Lintu insita yakusombola yafikile, atumineko abasya bakwe ukuyapiita ifisabo fyakwe.

<sup>35</sup> Lelo abalesonkelamo bakwete aba abasya bakwe, baumapo umo, umbi bamwipaya kabiili naumbi bamutoba amabwe.

<sup>36</sup> Kabiili atumineko abasya nabambi abengi ukukila abantansi, nakibili nabo babakitile fimoine.

<sup>37</sup> Mukulekelesya umwine webala atumineko umwana wakwe, ukuti, 'Ikinekine uyu bakaya mukindika.'

<sup>38</sup> Lelo lintu abalesonkela bamwene umwana bandalile ukuti, 'Iyi nimpyni, iseni tumwipaye! Nebala likaba yesu.'

<sup>39</sup> Eikyo bamukwete, bamuposa kunse yebala nokumwipaya.

<sup>40</sup> Yesu abepwisyen ukuti, "Busye ilyo umwine webala akesa, nikinsi akesa kita kuli aba bantu?"

<sup>41</sup> Bayaswike ukuti, "Akesaipaya abo bantu ababifi, nokusonkesya ibala kubantu bambi abakalamupa ikyakaniko kyakwe pansita yabusombosi."

<sup>42</sup> Yesu abebele ukuti, "Busye tamwabelenga fintu ikyalembwa kilanda?

'Ilibwe lintu bakakula basulile ngelyabula ubuyo  
elyaisileba ilikankala pali yonse.

Uku kubomba kwakwa Lesa,  
kabiili kipapusyo mu meno yesu!"

<sup>43</sup> Ndemyeba ukuti ubufumu bwakwa Lesa bukapokololwa kuli mwebo nokupelwa ku bantu abatwala ifisabo.

<sup>44</sup> "Umuntu onse untu ili libwe lyaponena akaputaulwa mutupimfyia naonse uwaponena pali ili libwe akashonaulwa."

<sup>45</sup> Lintu basimapepo bakindami naba Falise baumfwile imilumbe yakwa Yesu balisibe ukuti ebantu alelandapo,

<sup>46</sup> eikyo bafwaiile insila yakumwikatilamo. Lelo baletina ibumba, ilyasumine Yesu ukuti nikasesema.

## 22

#### *Umulumble wa matebeto ya bwinga* (Luka 14.15-24)

<sup>1</sup> Nakabili Yesu abebele mu milumbe ukuti,

<sup>2</sup> "Ubufumu bwa mumulu kuti bwapasyanisiwa ku mfumu iyapekanisisye umwana wakwe umwaume amatebeto ya bwinga.

<sup>3</sup> Yatumineko abasya bakwe ukuyaeba abalalikwe ukwisa kumatebeto, lelo balikene ukwisa.

<sup>4</sup> Elo yatuma abasya nabambi ukuti, 'Kebeni abalalikwe ukuti, nimpekanisa amatebeto nefintu fyonse nafipekanisiwa. Iseni kumatebeto ya bwinga!'

<sup>5</sup> Lelo tabaposeleko amano bayangilwe-  
ye imilimo yabo, umo aya kwibala lyakwe,  
umbi aile kuntu alebombelo amakwebo,

<sup>6</sup> elo bambi bakwete abasya, baboma nokubepaya.

<sup>7</sup> Imfumu yalifulilwe. Yatumineko abasilika ukuyaipaya abo bantalamisoka nokokya umusumba wabo.

<sup>8</sup> Elo yaeba abasya ukuti, 'Ubwinka nabupekanisiwa, lelo abantu abalalikwe balikenekwa ukwisa.

<sup>9</sup> Eikyo kabiyen'i mumisebo muleyalalika abantu bonse bantu mulesanga kumatebeto.'

<sup>10</sup> Abasya baile mumisebo nokuya kolanganika bonse abantu basangilemo, ababi na basuma. Kibili mujanda mwaiswile insalu syapa bwinga.

<sup>11</sup> Lelo lintu imfumu yaisile mukomona abalalikwe, yasangilemo umo uusyafwele insalu syapa bwinga?" Lelo takwete ifyakulanda.

<sup>12</sup> Yamwipwisye ukuti, "Kibusa, busye wakingila syani muno ukwabula ukufwala insalu syapa bwinga?" Lelo takwete ifyakulanda.

<sup>13</sup> "Elo imfumu yaebele abasya ukuti, 'Mukakeni amaboko namolu mumupose panse mumfimfi. Umukaba ukulila nokusumanya ameno."

<sup>14</sup> "Abalalikwa bengi lelo abasalwa banono."

#### *Ukulipila umusonko*

(Mako 12.13-17; Luka 20.20-26)

<sup>15</sup> Abafalise bakolongene balaumfwana fintu bengakofya Yesu.

<sup>16</sup> Batumine abasambi babo naba kwa Herodi ukuyalande ukuti, "Wekafundisya twalisiba ukuti fintu ulanda fyakisinkia, ufundisya ikine pabufwayo bwakwa Lesa pabantu, kibili tautiina muntu nangu umo, pantu tawaba nakapatulula.

<sup>17</sup> Twebe, busye webo uletipo syani? Busye tufwile ukulipila umusonko kuli Ke-salo nangu iyoo?"

<sup>18</sup> Lelo apo Yesu alisibe imilangwe yabo iyabubifi abebele ukuti, "Imwe babumbimunda, kinsi mulengesesyta.

<sup>19</sup> Ndangen'i ulupiya lwakulipa umusonko!"

Bamuletele ulupiya lwamuseke,

<sup>20</sup> elo abepusya ukuti, "Busye iki kinsone sina fyakwa nani?"

<sup>21</sup> Bayaswike ukuti, "Fyakwa Kesalo."

Elo Yesu abeba ukuti, "Peleni kuli Kesalo ifyakwa Kesalo, kibili peleni kuli Lesa ifyakwa Lesa."

<sup>22</sup> Balipapile lintu baumfwile aya masiwi, kibili bamusile nokuya.

#### *Ilipusyo lyapa kubuka kubafwa*

(Mako 12.18-27; Luka 20.27-40)

<sup>23</sup> Bulya bwine busiku, Abasaduki abasumine ukuti takwakabe ukubuka kubafwa baisile ipusya Yesu ukuti,

<sup>24</sup> "Wekafundisya, Mose atwebele ukuti umwaume uwaupa ngafwa ukwabula ukufyalapo abana, munina afwile aupa

mukamfwilwa pakuti afyalileko munina abana.

<sup>25</sup> Nomba kwaliko bamunina kinelubali abaleikala kuno. Uwantansi alyupile, kibili afwile ukwabula ukufyalapo abana eikyo umukasi wakwe asyele namunina.

<sup>26</sup> Ikintu kimokine kyakitike kuwabubili, nakuwabutatu namukulekelesya kuli bonse kinelubali.

<sup>27</sup> Napampela umwanakasi nao afwa.

<sup>28</sup> Nomba pakubuka kwabafwa, busye akaba mukasi wakwani apo bonse bamunina kinelubali balimupilepo?"

<sup>29</sup> Yesu abaswike ukuti, "Mwaliluba! Pantu tamwaisiba ifyo amalembo ya-fundisya kibili tamwaisiba namaka yakwa Lesa.

<sup>30</sup> Pakubuka kwabafwa, abantu tabakaleupa nangu ukupwa lelo bakaba nga bamalaika mumulu.

<sup>31</sup> Lelo pamulandu wakubuka kwabafwa, busye tamwabelenga fintu Lesa amyebele ukuti,

<sup>32</sup> 'Ninebo Lesa wakwa Abulahamu, Isaaki na Yakobo.' Ni Lesa wabamweo te Lesa wabafwa."

<sup>33</sup> Ibumba lyalipapile pakumfwa aya ma-fundisyo.

#### *Ikipope ikikalambapo*

(Mako 12.28-34; Luka 10.25-28)

<sup>34</sup> Lintu Abafalise baumfwile ukuti Yesu atalalika Abasaduki, balikolongene pamo.

<sup>35</sup> Umo pali bena uwali ni kafundisya wamafunde aesesye Yesu mulipusyo ukuti,

<sup>36</sup> "Wekafundisya, busye kipopensi ikikalamba mu Mafunde?"

<sup>37</sup> Yesu amwaswike ukuti, " 'Uletemwa Imfumu Lesa obe, nomutima obe onse, nomwebo obe onse kibili namano yobe yonse.'

<sup>38</sup> Iki ekipope kyantansi kibili ikikalamba.

<sup>39</sup> Ikyabubili niki, 'Uletemwa umubiyi ngafintu waitemwa.'

<sup>40</sup> Amafunde yonse naba kasesema bashinta pali ifi fipope fibili."

#### *Ilipusyo lyapali Mesiya*

(Mako 12.35-37; Luka 20.41-44)

<sup>41</sup> Ilyo Abafalise bakili nabakolongana Yesu abepwisye ukuti,

<sup>42</sup> "Busye mwebo mutontonkanyapo syani pali Mesiya? Busye mulanda ukuti nimwana nani?"

Bayaswike ukuti, "Nimwana Davidi."

<sup>43</sup> Yesu abepwisye ukuti, "Busye nikinsi Davidi, uwaletungululwa no Mupasi amwitile ukuti 'Imfumu'? Pantu Davidi alandile ukuti,

<sup>44</sup> 'Imfumu yalandile ku Mfumu yandi ukuti,  
ikala kukulyo kwandi

mpaka inkabike abalwani bobe pansi  
yamakasa yobe.'

<sup>45</sup> Davidi ngamwitile ukuti 'Imfumu,' Busye  
kuti aba syani umwana wakwa Davidi?"

<sup>46</sup> Tapaali uwamwaswike, kibili ukutula  
pali bulya busiku, tapali uwaipwisyepo  
Yesu amepusyo nayambi.

## 23

*Kengeleni ku Bafalise na kuli Bakafundisa bamafunde*

(Mako 12.38-39; Luka 11.43,46; 20.45-  
46)

<sup>1</sup> Elo Yesu aeba amabumba na basambi  
bakwe ukuti,

<sup>2</sup> "Abafalise na bakafundisa bamafunde  
bekala mukipuna kyakwa Mose.

<sup>3</sup> Eikyo muleumfwila nokukonka  
fyonse fintu balemyeba, lelo mwilakita  
fintu bakita, pantu bena tabakita fintu  
basimikila.

<sup>4</sup> Bakaka ifipe ifyafinisa, babika  
pafipeya fyabantu, ifyo bena tabekatako  
nomunwe wabo pakwimya.

<sup>5</sup> Ifintu fyonse fintu bakita, bakitila  
ukubamona kubantu. Bakaka utupande  
utwamalembo bafwala pampumi na kum-  
aboko utwalepa. Elo namasenkebele  
yansalu syabo balayalefy!

<sup>6</sup> Batemwa inkende syamukinsi pamalila  
elo nefipuna ifyakindamisyapo mu masin-  
agogi,

<sup>7</sup> kibili batemwa ukulabaposya no-  
mukinsi pafisankano, nokubeta ukuti  
'Bakafundisa'.

<sup>8</sup> Lelo mwebo mwilaitwa ukuti, 'Ka-  
fundisa' pantu mwakwatafy Kafundisy  
umo, kibili muli bamunina.

<sup>9</sup> Kabilo mwilaitwa uuli onse pano isonde  
ukuti, 'Taata', pantu mwakwatafye Wis-  
iniwe umo uwamumulu.

<sup>10</sup> Mwilaitwa ukuti, 'kafundisa' pantu  
mwakwatafy kafundisa umo uuli ni  
Klistu.

<sup>11</sup> Umukalamba pali mwebo, awfile aba  
umubomfi wenu bonse.

<sup>12</sup> Pantu bonse abaisansabika bakakefe-  
siwa, nabonse abaikefyा bakasansamikwa.

*Yesu alapisya Abafalise na baka-  
fundisa bamafunde*

(Mako 12.40; Luka 11.39-52; 20.47)

<sup>13</sup> "Akalandia kuli imwe bakafundisa  
bamafunde namwe Bafalise, mwe-  
babumbimunda! Mwalisalila abantu  
pakuti beingila mu bufumu bwa mumulu.  
Mwe bene tamwingilamo elo mwalesya  
nabambi abalefwaya ukwingilamo.

<sup>14</sup> Akalandia kuli imwe, bakafundisa  
bamafunde namwe Bafalise! Mwe-  
babumbimunda! Muliila bamukamfwilwa  
ifyuma fyabo, kibili mwatemwa ukuilanga

mukupepa amapepo ayatali. Ala Lesa  
akamikandisa ukukilapo!

<sup>15</sup> "Akalandia kuli imwe Bakafundisa  
bamafunde namwe Bafalise! Mweba  
bumbimunda! Mwenda ba bembra ne-  
milundu pakutife munasyepo umo abe  
umusambi wenu. Kibili ngamwfakil-  
isa mulenga umuntu abipisyapo ukuk-  
ila pakwamba, awaminafye ukuya kumbo  
ngamwebo!

<sup>16</sup> "Akalandia kuli mwentungulusi impofu  
mwe! Mulanda ukuti umuntu ngalapa  
pe Tempele ninsi tapali mulandu. Lelo  
ngalapa pali golide wamwi Tempele ninsi  
awfile afikilisya umulapo wakwe.

<sup>17</sup> Mwempofu isipumbu mwe! Kinsi  
kyakindamapo pali golide ne Tempele  
lilenga golide ukuba iyamusilo?

<sup>18</sup> Kibili mulanda ukuti, umuntu ngalapa  
pa kipalo temulandu, lelo umuntu ngalapa  
pafyabupe fili pakipailo ninsi mulandu.

<sup>19</sup> Mwempofu mwe! Ikyakindamapo  
kinsi pabupe nangu ikipailo ikilenga  
ikyabupe ukuba ikyu musilo?

<sup>20</sup> Eikyo onse uwalapa pakipailo ninsi  
alapa napali fyonse ifili pakipailo,

<sup>21</sup> Kibili naonse uwalapa pe Tempele  
ninsi alapa pali lyena napali Lesa  
uwikalamo,

<sup>22</sup> kibili naonse uwalapa pamylu,  
ninsi alapa pakipuna kyakwa Lesa napa  
waikalapo.

<sup>23</sup> "Akalandia kuli imwe bakafundisa  
Bamafunde namwe Bafalise! Mwe  
babumbimunda mwe! Mulapela Lesa  
ikyekumi napamisalufye iyakuwamyia  
ifyakulya ifili nga Minti, dilli nakumuni,  
lelo mwalisula ukukonka amafundisyo  
ayakkala mu Mafunde yakwa Mose  
ayali ngo, umulinganya, uluse nekisinka.  
Ifi efintu mufwile ukulakita ukwabula  
ukusula ayantansi.

<sup>24</sup> Mwentungulusi impofu mwe! Mususa  
akasisi akanono, lelo mumina ingamila!

<sup>25</sup> "Akalandia kuli imwe bakafundisa  
Bamafunde namwe Bafalise! Mwe  
babumbimunda mwe! Musamfyia  
inkombo nensani kunse, elo ninsi mukati  
mwaisulafye ubulili no bukakasi.

<sup>26</sup> Mwe Bafalise impofu mwe! Mbale  
samfyeni mukati kalukombo, kibili  
nakunse nako kulewarama!

<sup>27</sup> "Akalandia kuli imwe bakafundisa  
Bamafunde namwe Bafalise! Mweba  
bumbimunda mwe! Mwaba nge manda  
bashingulako ulupemba, kunse simoneka  
isyayemba lelo mukati mwaisula amafupa  
yabafwa, nafimbi fyonse ifyakowela.

<sup>28</sup> Munsila imoine, kunse mumoneka  
abasuma kubantu bonse, lelo mukati kenu  
mwaisulamo bubumbimunda kibili ne  
membu.

*Yesu asobela ukukandwa kwabo  
(Luka 11.47-51)*

<sup>29</sup> "Akalanda kuli imwe bakafundisya Bamafunde namwe Bafalise! Mweba bumbimunda mwe! Mukulilila imanda syaba kasesema, nokuwaminisya imanda syabalungami,

<sup>30</sup> kabili mulanda ukuti, twingaba nifwebo ngatataktille fintu ifikolwe fyesu fyakitile mukusumya umulopa waba kasesema.

<sup>31</sup> Kansi mwaliisinina ukuti muli lupwa lwa fipondo fyaipeye bakasesema!

<sup>32</sup> Kansi pitilisyeni, pwisyeni fintu ifikolwe fyenu fyatampile!

<sup>33</sup> Imwe mwensoka! Imwe mwebana bansoka! Kuti mwafyuka syani ukuya ku Gehena?

<sup>34</sup> Eikyo nalamitunga bakasesema, abaume bamano naba kfundisya, bamo mukabepaya, bambi mukabatanika, kabili bambi mukabalopola musinagogi nokubatamfyia mu musumba nomusumba.

<sup>35</sup> Kansi pali mwebo pakaponena umulopa onse uwabalungami, uwasumine pesonde ukufuma pamulopa wakaele uwakwa Abeli, ukufika pamulopa wakwa Sakariya mwana Belekiya, untu mwaipaile pakati ke Tempete nekipailo.

<sup>36</sup> Ndemyeba ikinckine ukuti, fyonse ifi fikaponena pabantu baino nkulo!

*Ikitemwiko kyakwa Yesu pali  
Yerusalemu  
(Luka 13.34-35)*

<sup>37</sup> "We Yerusalemu, we Yerusalemu! Wipaya bakasesema, nokwipaya kumbabwe intumi sintu Lesa aakutumine! Miku inga nalefwaya ukufukatila abana bobe ngafintu inkoko ifukatila utwana mumapindo, lelo tawansuminisyie!"

<sup>38</sup> Mona injanda yobe ikaba umwabula nangu kimo.

<sup>39</sup> Pantu ndekweba ukuti, tawakatale mbonapo nakabili mpaka ukalande ukuti, 'Alipalwa uwisila mwisina ly a Mfumu.'

## 24

*Yesu alanda pakonaulwa kwe Tempete  
(Mako 13.1-2; Luka 21.5-6)*

<sup>1</sup> Panuma yaifyo Yesu afumine Mwitempele alaya, abasambi bakwe baisile kuli ena nokwisa musontelela ifikulwa fye tempele.

<sup>2</sup> Yesu abepwisye ukuti, "Busye namumona ifintu fyonse ifi? Ndemyeba ukuti tapakasyale ilibwe nangu limo palibiye, yonse yakabongoloka."

*Amafya nokupakaswa  
(Mako 13.3-13; Luka 21.7-19)*

<sup>3</sup> Lintu Yesu ali naikala pa Lupili lwa Miolife, abasambi baisile kuli ena pambali. Bamwipwisye ukuti, "Busye nilisa ifi fyonse fikakitika, kabili kilangilonsi ikyakwisa kobe nekyampela yesonde."

<sup>4</sup> Yesu abaswike ukuti, "Kengeleni, pakuti umuntu nangu umo emibepe.

<sup>5</sup> Pantu abantu abengi bakesila mwisina lyandi, bakalaitunga ukuti 'Ninebo Klistu!' Kabili bakabepa abengi.

<sup>6</sup> Mukomfwa inkondo nefintinya fyankondo, lelo mwikatiina. Fyonse ifi fintu fikakitika, lelo impela ninsi tailafika.

<sup>7</sup> Ifyalo fikemina ifyalo fibiye, ubufumu bukemina ubufumu bubiyi. Konse kukaba ifipowe na bamakumba mukende isyalekana lekana.

<sup>8</sup> Lelo ifi fikabafye ngobukali bwakwambilapo ubwapakupapa.

<sup>9</sup> "Bakamipakasa no kumpaya, kabili mukapatwa kubantu mufyalo fyonse pamulandu wandi.

<sup>10</sup> Abantu abengi bakalufya ikitetekelo pali iyi nsita, bakalafutuka nokupata ababiye.

<sup>11</sup> Elo bakasesema babufi abengi bakanomeka nokubepa abantu abengi.

<sup>12</sup> Pamulandu wakufula kwabubifi, ukutemwa kukafubalila.

<sup>13</sup> Lelo abakasipikisyia ukufika kumpela bakapusuka.

<sup>14</sup> Kabili iyi Mbila Nsuma yapa bufumu ikasisimikilwa mwisonde lyonse ngobunte kufyalo fyonse, elo impela ikafika.

*Amakyusi yakafula  
(Mako 13.14-23; Luka 21.20-24)*

<sup>15</sup> "Kansi lintu mukamona umupamba wabonausi untu kasesema Daniele alaandilepo nawiminina umwamusilo." (Onse uulebelenga eluke, muntu ifi fyalola!)

<sup>16</sup> Abakaba mu Yudeya bakabutukila mumpili.

<sup>17</sup> Uukuba pamutenge wa njanda ekekila ukuyapiita ifili fyonse mu njanda.

<sup>18</sup> Uukuba mwibala, ekabwelelamo mukupiita insalu syakwe.

<sup>19</sup> Akalanda muli silya nsiku kuli bana-mayo abakaba pabukulu na kubakalaonsya!

<sup>20</sup> Mulepepa ukuti fikakitika munsita yampepo, nangu pabusiku bwe Sabata!

<sup>21</sup> Pantu kukaba amakyusi yakipesya mano ayasyatala bako ukufuma kunten-dekelo yesonde ukufika nandakai kabili ayasyakatale bako nakabili.

<sup>22</sup> Isyo nsiku singakana ukwipifiwa ngat-apali uwapuswike, lelo pamulandu wa basalwa bakwe isyo nsiku syalipifiwa.

<sup>23</sup> Pali iyo nsita umuntu ngalanda ukuti, "Mona Klistu uyu pano nangu uyo apo" Mwikasumina.

<sup>24</sup> Pantu ba krisitu babufi na bakasesema babufi bakamonekela, bakalakita ifisibili ifikalamba nefisungusyo pakuti bakabepo na basalwa ngafingakitika.

<sup>25</sup> Moneni! Namyebela limo ifi lintu insita tailaisa.

<sup>26</sup> "Kansi, abantu ngabamyeba ukuti, 'Uyo ali mukiswebebe, mwikayako!' Kabili ngabalanda ukuti, 'Uyu ali munjanda!' Mwikasumina.

<sup>27</sup> Pantu Umwana Wamuntu akesa ngakalumba akabyasya mumulu monse ukufuma kukabanga ukufika ku masamba.

<sup>28</sup> "Amakubi yakolongana konse ukuli ikitumbi.

*Ukwisa kwa Mwana Wamuntu  
(Mako 13.24-27; Luka 21.25-28)*

<sup>29</sup> "Panumafye yamakyusi yaisyo nsiku, akasuba kakafita no mwensi tawakabale, intanda sikapona mumulu, kabili ne-faikala mumulu fikasunkansiwa.

<sup>30</sup> Elo kukamoneka iksibilo kya Mwana Wamuntu mumulu. Elo abantu bapano isonde bonse bakalosya, lintu bakamona Umwana Wamuntu aleisa pamakumbi ya-mumulu, namaka nobukata ubukalamba.

<sup>31</sup> Lintu impenga ilikalamba likalila, akatuma bamalaika bakwe ukuyakolonganika abasalwa bakwe ukufuma mutupinda tune utwapesonde, ukufuma kumpela iyamulu ukufika kumpela.

*Isambililo lyapakimuti kyamukunyu  
(Mako 13.28-31; Luka 21.29-33)*

<sup>32</sup> "Nomba sambilileni ku kimuti kya mukunyu. Imisambo ngayaamba ukufuma ubuluba mulesiba ukuti amainsa yapalama.

<sup>33</sup> Nalintu mukamona ifintu fyonse ifi, mukesibe ukuti insita yapalama, ilifye pamwinsi.

<sup>34</sup> Ndemyeba ikikine ukuti, iyi nkulo tayakapite ninsi ifintu fyonse ifi fyakitika.

<sup>35</sup> Umulu nesonde fikapita lelo amasiwi yandi tayakapite.

*Takwaba uwaisiba ubusiku nakasita  
(Mako 13.32-37; Luka 17.26-30)*

<sup>36</sup> "Lelo tapaba uwaisiba ubusiku nakasita, bamalaika ba mumulu tabaisiba kabilii Nomwana Wamuntu wine taisiba, Tatafye eka ewaisiba.

<sup>37</sup> Ngafintu kyali munsiku yakwa Noa, efintu kikaba nalintu Umwana Wamuntu akesa.

<sup>38</sup> Lintu ilyeshi talilaisa, abantu balelya nokunwa, baleupa nokupwa, mpaka pa busiku buntu Noa aingile mu bwato.

<sup>39</sup> Tabaisibe nangu fimo ifyalekitika mpaka ilyeshi lyaisa balofya bonse. Efintu kikaba napakwisa kwa Mwana wa Muntu.

<sup>40</sup> Abaume babili bakaba mwibala, umo akapiiwa umubiye akasyala.

<sup>41</sup> Abanakasi babili bakalapela pelibwe, umo akapiiwa umbi akasyala.

<sup>42</sup> Eikyo kengeleni, pantu tamwisibe ubusiku Imfumu yenu ikesa.

<sup>43</sup> Lelo ilukeni ifi, umwine wa njanda ngaisiba insita intu umunjo aleisilapo, teti alale kuti alalolelafye kabili tekutu aleke umunjo amwingilile.

<sup>44</sup> Eikyo namwebo beni abaipekanya lyonse, pantu Umwana Wamuntu akesa pakasita kantu musyenekele.

*Umusya wakisinka nomusya wabula kisinka  
(Luka 12.41-48)*

<sup>45</sup> "Busye umusya wakisinka kabili uwamano ninani? Nyuyo, sikulu wakwe abika ukwanganlila ababomfi babiye, ukulabapela ifyakulya pansita iyayana.

<sup>46</sup> Kikamuwamina uyo umubomfi, ilyo sikulu wakwe abwela ngamusanga alekita ifyofine.

<sup>47</sup> Ndemyeba ikinekine ukuti, sikulu wakwe akabika uyu mubomfi bukangalila pampintu fyakwe fyonse.

<sup>48</sup> Lelo umusya ngamubifi, kuti aayeba umwine mumutima wakwe ukuti sikulu wakwe takabwele bwangu,

<sup>49</sup> kabili nokwamba ukuma ababomfi babiye, nokwamba ukulya nokunwina pamo nabakyakolwa.

<sup>50</sup> Sikulu wauyo musya akabweluluka ubusiku ubo umubomfi tenekele kabili napansita intu tesibe.

<sup>51</sup> Akaputaula umubomfi mutupimfy, kabili akamuposa kunkende akayakyulila pamo nababumbimbunda. Ukukaba ukulila nokusumanya ameno.

## 25

*Umulumbe wa banakisungu ikumi limo*

<sup>1</sup> "Pali ilya nsita Ubufumu bwa mumulu bukaba ngabanakisungu ikumi limo, abapiitile utulampi twabo ukuya mukukunya manya sibwinga.

<sup>2</sup> Basano pali aba bali nimpelwamano, kabili nabasano bali bamano.

<sup>3</sup> Impelwamano syapiitile utulampi ukwabula ukupiita amafuta ayengi.

<sup>4</sup> Abamano bena bapiitile amafuta ayengi mutusupa ayamutulampi twabo.

<sup>5</sup> Abakasyana bayambile ukusipula basukwa baponena mutulo pantu sibwinga alikokwele ukwisa.

<sup>6</sup> "Pakati kabusiku baumfwile utumpundu ukuti, 'Sibwinga uyu aisa! Iseni mumupokele!'

<sup>7</sup> Elo abakasyana bonse babuka bayasya utulampi twabo.

<sup>8</sup> Abakasyana impelwamano baebele abamano ukuti, 'Tupeleniko amafuta yenu fwebo utulampi twesu twalasima.'

<sup>9</sup> Abamano bayaswike ukuti, 'Awee, tayatukumane mwebo nafwebo. Kabiyeni kubasitisya amafuta musiteko ayenu.'

<sup>10</sup> Lelo lintu baleya mukusita amafuta, sibwinga nao afika. Banakisungu basano abaali nabaipekanya baingile nankwe munjanda yabwinga nefiibi fyaisalika.

<sup>11</sup> "Mukasitafye abakasyana impelwa mano nabo babweluluka balapunda ukuti, 'We Mfumu, we Mfumu! Twiswileniko ikiibi!'

<sup>12</sup> Lelo sibwinga abaswike ukuti, 'nde-myeba ikinekine ukuti nsimisibe.'

<sup>13</sup> Eikyo kengeleni, pantu tamwisibe ubusiku nakasita.

#### *Umulumbe wabasya batatu*

(Luka 19.11-27)

<sup>14</sup> "Nakibili ubufumu bwa mumulu bukaba ngomuntu uleya pabulendo, uwaitile ababomfi bakwe abapela bukangalila pafyuma fyakwe.

<sup>15</sup> Apeela kila umo ukulingana napapele amaka yakwe, umo amupela ulupiya lwa golide amakana yasano, umbi amupela ulupiya lwa golide amakana yabili, naumbi amupela ulupiya lwa golide ikana limo. Elo aimu ubulendo aya.

<sup>16</sup> Umubomfi uwapokele ulupiya amakana yasano, apiitile ulu lupiya aya lubomfy, akwatiilamo nalumbi amakana yasano.

<sup>17</sup> Nowapokele ulupiya amakana yabili akwatilepo nalumbi amakana yabili.

<sup>18</sup> Lelo umubomfi uwapokele ulupiya umwanda umo, aileimba icikulo emuntu asika ulupiya lwakwa sikulu wakwe.

<sup>19</sup> "Panuma yansita iitali sikulu wabo alibwelulwike. Alibetile alabepusya fintu babomfesye ulupiya.

<sup>20</sup> Umubomfi uwapokele ulupiya lusano ulwa golide, aisileletelapo nalumbi lusano nokulanda ukuti, 'Moneni mwesikulu, mwampele ulupiya lusano ulwa golide, nanebo ninkwatilapo nalumbi lusano.'

<sup>21</sup> Sikulu wakwe alandile ukuti, 'Wabomba, wemubomfi umusuma kabili uwakisinka. Wali uwakisinka mukusugilila tunono tuntu nakupele, eikyo nalakupela ukwangalila ifintu ifingi. Isa usansamukile pamo na sikulu obe!'

<sup>22</sup> "Umusya uwapokele ulupiya lubili ulwa golide nao aisilelanda ukuti, 'Mwe sikulu, mwampele ulupiya lubili ulwa golide, moneni ninkwatilapo nalumbi lubili.'

<sup>23</sup> Sikulu wakwe alandile ukuti, 'Wabomba, wemubomfi umusuma kabili uwakisinka. Wali uwakisinka mukusugilila ulupiya ulunono luntu nakupele, eikyo nalakupela ukwangalila ifintu ifingi. Isa usansamukile pamo na sikulu obe!'

<sup>24</sup> "Elo umubomfi uwapokele ulupiya lumo ulwa golide aisilelanda ukuti, 'Mwe sikulu, nalisiba ukuti mwalisyupa, musombola muntu tamwalimine, mukolonganika ifisabo umo tamwatandile.'

<sup>25</sup> Naletiina, eikyo nailesika ulupiya musili. Moneni ulupiya lwenu ulu.'

<sup>26</sup> "Sikulu wakwe amwaswike ukuti, 'Wemubomfi umubi kabili umunajani we!' Kansi waisibe ukuti nsombola muntu nsyalima nokuseepa umo nsyatanda?

<sup>27</sup> Kilifye, nomba kansi ngawambikile kulya basungila ulupiya, pakuti nakwatamo ulwakumbikilapo.

<sup>28</sup> 'Eikyo mupokeni ulupiya mupele umubomfi uukwete ulupiya ikumi limo.

<sup>29</sup> Pantu Onse uukwete akapelelwapo nafimbi, kabili akakwata ifingi ukukilapo, lelo onse uusikwete nangu kimo, akapokololowa nakanono kantu akwata.

<sup>30</sup> Uyu mubomfi uwabula ubuyo, muposeni kunse mumfimfi, umukuba ukulila nokusumanya ameno.'

#### *Ubupingusi bwakulekelesya*

<sup>31</sup> "Lintu Umwana Wamuntu akesa mubukata nabamalaika bakwe, akekala pakipuna kyakwe ikyabukata,

<sup>32</sup> kabili nabantu mufyalo fyonse bakamukolongana. Elo akapatula abantu ngafintu kacema apatula impaanga ku mbusi.

<sup>33</sup> Akabika impaanga kukulyo kwakwe elo imbusi kukuso kwakwe.

<sup>34</sup> Elo Imfumu ikalandia ku bantu abakaba kukulyo ukuti, 'Iseni, mwebapalwa kuli Tata! Iseni mupoke Ubufumu ubo mwali namuteyanisa ukutula kububumbo bwesonde.'

<sup>35</sup> Nali nensala mwalmipole ifyakulya, nali nekilaka mwalmipole ifyakunwa, nali umweni mwalmipokelele mumayanda yenu,

<sup>36</sup> 'Nsakyawete ifyakufwala mwalmifwile, nalilwewe mwaliinsakamene, nali mukifungo mwaisile mpempula.'

<sup>37</sup> "Abalungami bakamwasuka ukuti, 'Mwe Mfumu nilisa twamimwene namumfwa insala twamipela ifyakulya, nangu namumfwa ikilaka twamipela ifyakunwa?'

<sup>38</sup> Nilisa twamimwene umweni twamipokelela mumayanda yesu, nangu ukwabula ukufwala twamifwi?'

<sup>39</sup> Nilisa twamimwene namulwala, nangu mukifungo twaisa mimpempula?'

<sup>40</sup> Imfumu ikasuka ukuti, 'Ndemyeba ikinkekine ukuti, lyonse lintu mwayafwile munina umo mulifi uwamulupwa lwandi nangu munono syani, ninebo mwayafwile!'

<sup>41</sup> "Elo akeba abakukuso ukuti, 'Fumeni kuli nebo, mwebatipwa! Kabiyen mu-mulilo wamuyayaya uwapekanisiwa Kiwa naba malaika bakwe!'

<sup>42</sup> Nali nensala lelo tamwampele ifyakulya, nali nekilaka lelo tamwampele ifyakunwa,

<sup>43</sup> nali umweni lelo tamwampokelele mumayanda yenu, nali ukwabula ukufwala lelo tamwampele ifyakufwala, nali nindwala kabili nali mukifungo lelo tamwansakamene.'

<sup>44</sup> "Nabo bakasuka ukuti, 'Mwe Mfumu, nilisa twamimwene muli nensala, nelyo nekilaka, nangu umweni, nelyo ukwabula ukufwala, nangu namulwala, nangu mukifungo twakana ukumyafwa?'

<sup>45</sup> Imfumu ikabasuka ukuti, 'Ndemyeba ikinkekine ukuti, lyonse lintu mwakene ukwafwa onse pabantu bandi, nangu abe umunono syani mwakene ukwafwa nebo.'

<sup>46</sup> Elo bakaye mukakandwa umuyayaya, lelo abalungami bakaya kumweo wamuyayaya."

## 26

*Baumfwana ukwipaya Yesu  
(Mako 14.1-2; Luka 22.1-2; Yohani 11.45-53)*

<sup>1</sup> Lintu Yesu apwisisye ukulanda ifintu fyone ifi, aebele abasambi bakwe ukuti,

<sup>2</sup> "Namwisiba ukuti kwasyalafye insiku sibili, ninsi busiku nkulu bwe Pasaka. Kabilii Umwana Wamuntu akapelwa minwe yabalwani mukumutanika."

<sup>3</sup> Basimapepo bakindami na bakalamba babantu bakolongene mukipango kyakwa simapepo mukalamba Keyafasi,

<sup>4</sup> kabilii baumfwene fintu bengakwata Yesu mubumfisolo no kumwipaya.

<sup>5</sup> Lelo baalandile ukuti, "Twikakita ifi pe Pasaka, abantu kuti baimya ifimfulunganaya."

*Yesu bamusuba amafuta ku Betani  
(Mako 14.3-9; Yohani 12.1-8)*

<sup>6</sup> Lintu Yesu ali mu Betani mujanda yakwa Simoni uwafibasi,

<sup>7</sup> kwaisile namayo napiita amafuta mwibotolo ayanunkila ayamutengo ukalamba ngansi, aitwlipa wa mutwe wakwa Yesu ninsi ali pakulya.

<sup>8</sup> Lelo lintu abasambi bakwe bamwene ifi balifilwé batampa ukulailisyanya ukuti, "Busye bonausi bwa musango syani ubu?

<sup>9</sup> Pantu aya mafuta kuti yasitisawa palupiya ulwingi sana nokupela abalandia!"

<sup>10</sup> Lelo Yesu pakwisiba fintu baleton-tonkanya abebele ukuti, "Kinsi mulekyusisa yuu mwanakasi? Nankitia ikintu ikisuma.

<sup>11</sup> Pantu abalandia mukalaba nabo lyonse lelo tamwakaleba nanebo lyonse.

<sup>12</sup> Lintu akitulwila amafuta yanunkila pamubili wandi, akimpekanya mukusikwa.

<sup>13</sup> Ndemyeba ikisinka ukuti, konse kuntu Imbila Nsuma ikabilwa mwisonde lyonse, ifi fyakita yuu mwanakasi fikalalandwapo mukumbubikisya."

*Yuda asumina ukufutuka Yesu  
(Mako 14.10-11; Luka 22.3-6)*

<sup>14</sup> Yuda Isikalyoti umo pabasambi ikumi limo na babilii aile kuli basimapepo mukalamba

<sup>15</sup> aya bepusya ukuti, "Busye mukampela finsi nganamiletela Yesu?" Nabo bamulipile ulupiya lwa siufele amakumi yatatu (30).

<sup>16</sup> Ukufuma apo Yuda atampile ukufwaya akasita akasuma akakufutuki-lapo Yesu.

*Yesu balila pamo nabasambi bakwe ipasaka*

*(Mako 14.12-21; Luka 22.7-13,21-23;  
Yohani 13.21-30)*

<sup>17</sup> Pabusiku bwakwambilapo ub-wakulyamo umukate uusyatutumuka abasambi baisile kuli Yesu mukumwipusya ukuti, "Busye nipi ulefwaya tukupekanisiye ukwakulila Ipasaka?"

<sup>18</sup> Alandile ukuti, "Kabiyenii mumusumba kumuntu umo, muleya mweba ukuti Kafundisyia alanda ati, 'Insita yandi naipalama! Ndimukufwaya ukwiscalila Ipasaka munjanda yobe na basambi bandi.'"

<sup>19</sup> Kansi abasambi bakitile umo Yesu abebele, bapekanya ne Pasaka.

<sup>20</sup> Mukungulo, Yesu na basambi bakwe ukumi limo nababili bakubeme petebulo.

<sup>21</sup> Kabilii ilyo balelya Yesu alandile ukuti, "Ndemyeba ikisinka ukuti, umo pali mwebo alemfutuka."

<sup>22</sup> Abasambi baiketwe ubulanda batampa ukulamwipusya umo, umo ukuti, "Busye ninebo mwe Mfumu?"

<sup>23</sup> Yesu abaswike ukuti, "Uo nalaingisisya nao pamo iminwe mumbale eulemfutuka.

<sup>24</sup> Umwana Wamuntu akafwa ngafintu amalembo yalandia, lelo akalanda ngansi kumuntu uulemfutuka Umwana Wamuntu! Ngakyaliwemepo kuli uyo muntu ukukana fyalwa!"

<sup>25</sup> Yuda, uwamufutwike aipwisye ukuti, "Busye ninebo mwe Kafundisya?"

Yesu amwasuka ukuti, "Wemwine wai-landila"

*Umulalilo wa Mfumu  
(Mako 14.22-26; Luka 22.14-20; 1 Kolinti 11.23-25)*

<sup>26</sup> Ilyo balelya, Yesu abulile umukate, aupaala aumokola apela abasambi bakwe nokulanda ukuti, "Buleni mulye, uyu emubili wandi."

<sup>27</sup> Kabilil abula nolukombo, atotela Lesa elo abapa ukuti, "Nwenimo bonse,

<sup>28</sup> uyu mulopa wandi uwakipangano kipyu uwalusumiina pabengi kukwelelwa kwa membu.

<sup>29</sup> Ndemyeba ukuti nsyakanwepo ifyakufisabo fyamyangasi nakabili, mpaka bulya busiku nkansa ifyakufisabo fya myangan-gasi ifipyu pamoo namwebo mu bufumu bwakwaa Tata."

<sup>30</sup> Lintu baimbile ulwimbo balifumine bayo kulupili lwa Miolife.

*Yesu aeba Petelo ukuti ulenkana  
(Mako 14.27-31; Luka 22.31-34; Yohani 13.36-38)*

<sup>31</sup> Yesu aebele abasambi bakwe ukuti, "Buno bwine busiku bonse mulembutuka nokunsa, pantu amalembo yalandia ukuti, 'Nkoma kacema no mukuni wa mpaanga ukasalangana.'

<sup>32</sup> Lelo panuma nabusiwa kubafwa, nkamitangilila ku Galili."

<sup>33</sup> Petelo aebele Yesu ukuti, "Nebo nsyakamisyenango bambi bakamisyen!"

<sup>34</sup> Yesu aebele Petelo ukuti, "Ndekweba ikisinka ukuti, buno bwine busiku ulenkana imiku itatu ukuti tawangisiba linto mukolwe talalila."

<sup>35</sup> Lelo Petelo ayaswike ukuti, "Nebo nsyakukane ngakufwa ndefwa nobe!"

Nabonse abasambi balanda fimo-fine.

*Yesu apepa mu Getiseman  
(Mako 14.32-42; Luka 22.39-46)*

<sup>36</sup> Yesu aile na basambi bakwe kunkende yaleitwa Getiseman, aebele abasambi bakwe ukuti, "Ikalen pano, nebo naya kulya mukupepa."

<sup>37</sup> Yesu apiitilepo Petelo na bamwana Zebedee babili Yakobo na Yohani aya nabo. Elo asakamikwa kabilil aba uwabulanda.

<sup>38</sup> Elo abeba ukuti, "Umutima wandi waisulamo ubulanda nicinggafe imfwie. Ikalen pano mulelolaa nanebo."

<sup>39</sup> Aendelekofoye ikyalinga awa pansi ubunkupeme alapepa ukuti, "Mwe Tata, nga nakyanguka lekeni ulu lukombo lumpite, lelo tekufwaya kwandi kano ukufwaya kwenu."

<sup>40</sup> Elo abwelulwike asangile abasambi bakwe balimutulo, eikyo aebele Petelo ukuti, "Busye tekuti mulole namebo pankoloko imo?

<sup>41</sup> Loleni no kupepa pakuti mwiwila mutatunko. Umupasi ulefwaya lelo umubili naunaka."

<sup>42</sup> Nakabili Yesu aile mukupepa ukuti, "Mwe Tata, ngakyakwebati ulu lukombo teti lufumepo mpaka ndunwe, ubufwayo bwenu nabukitwe."

<sup>43</sup> Nakabili abweluluka asanga nabalala. Ameno yabo yali nayafina kutulo.

<sup>44</sup> Abasile nakabili ayapepa ilya butatu, apepele ipepo limoline.

<sup>45</sup> Abwelulukile ku basambi bakwe no kubeba ukuti, "Busye mukili namulala muletusya? Moneni! Insita naifika iya Mwana Wamuntu ukuposwa mumaboko ya babembu.

<sup>46</sup> Imeni tuleya. Uulemfutuka uyo aleisa!"

*Yesu bamwikata*

*(Mako 14.43-50; Luka 22.47-53; Yohani 18.3-12)*

<sup>47</sup> Lintu Yesu akili alelanda, Yuda umo pabasambi ikumi limo na babili nao afika. Aali nebumba ilikalamba ilyafumine kuli basimapepo bakindami na bakalamba ba bantu, abaali ne mipanga nenkoto.

<sup>48</sup> Uwamufutwike alipele ibumba ikisibili ukuti, "Untu ndetomona emuntu mulefwaya. Mumukwate!"

<sup>49</sup> Kabilil Yuda aile kuli Yesu nokumweba ukuti, "Mwapoleni mwe Kafundisya," nokumutomona.

<sup>50</sup> Yesu epakumweba ukuti, "Ale kibusa kita fintu ukonkele!"

abantu abali na Yuda bapalamama, bafokokela Yesu bamukwata.

<sup>51</sup> Umo pabali na Yesu asomwene umupanga akoma umusya wakwa simapepo mukalamba amuputula ukutu.

<sup>52</sup> Yesu amwebele ukuti, "Bwesesywa umupanga mukitubo, onse uwanga nomupanga akafwa ku mupanga.

<sup>53</sup> Busye muletontonkanya ati teti ngebe Taata, kabilil nao apapene kuti antumina ifita fyaba mailaka ukukila ikumi limo na babili?

<sup>54</sup> Lelo, kuti yafikilisya syani amalembo ayalandia ukuti ifi fifwile fyakitikila muli iyi nsila?"

<sup>55</sup> Pali kalya kasita Yesu aebele ibumba ukuti, "Busye ndikipondo, pakuti mwise nemipanga ne nkonto mukundikata? Kila busiku naleikala mwi Tempele nedefundisya, tamwalendikata.

<sup>56</sup> Lelo ifi fyonse fyalikitika pakuti ifyalembelwe kuli bakasesema fifikilisye."

Elo abasambi bonse bamusya babutuka.

*Yesu mukilye*

(*Mako 14.53-65; Luka 22.54-55,63-71; Yohani 18.13-24*)

<sup>57</sup> Abo abakwete Yesu bamutwele kuli Kayafasi simapepo mukalamba, uko baka-fundisya ba mafunde na bakalamba ba bantu baali nabakolongana.

<sup>58</sup> Lelo petelo alekonkamo akatalamukila mpaka afika na mumusolo wakwasimapepo mukalamba. Alingile nokwikala pamo na bamalonda amone ifyalakitika.

<sup>59</sup> Basimapepo bakindami na basikilye bonse balefwallisyia ifyakubepesyia Yesu pakuti bamwipaye.

<sup>60</sup> Lelo tabafisangile nangu abantu abengi baimine nokumubepesyia ubufi. Kwaiminine abaume babili

<sup>61</sup> nokulanda ukuti, "Uyu muntu alandile ati, 'Nalikwata amaka yakubongolola item-pele lyakwa Lesa nokulikula munsiku sitatu.'"

<sup>62</sup> Simapepo mukalamba aiminine nok-weba Yesu ukuti, "Ngawewe tauelandapo?" Ngobu bunte aba bantu balekutunganya?

<sup>63</sup> Lelo Yesu aikelefye tondolo. Simapepo mukalamba amwebele ukuti, "Mwisiña lyakwa Lesa uwamweo, lapafye ngan-iwebo Klistu Uwmwana wakwa Lesa."

<sup>64</sup> Yesu amwaswike ukuti, "Naulanda ukuti ninebo. Lelo ndimukumyeba mwebonse ukuti, ukufuma pali ino nsita mukamona Uwmwana wa Muntu naikala kukuboko kwakukulyo ukwa Wamaka, kabilo aleisa pamakumbi ya mumulu!"

<sup>65</sup> Elo simapepo mukalamba alepwile insalu yakwe nokulanda ukuti, "Napontela Lesa! Nikinsi tulefwaila bakam-bone nabambi! Nomba mwayuumfwila imiponto yakwe!

<sup>66</sup> Ngamwebo muletipo syani?"

Bayaswike ukuti, "Nalinga ukufwa."

<sup>67</sup> Bamufwisile amate pamenso no kumupuma, elo bambi balemuma amapi

<sup>68</sup> nokulamweba ukuti, "Klistu, sesema kuli fwebo. Ninani wakuma!"

*Petelo akaana Yesu*

(*Mako 14.66-72; Luka 22.56-62; Yohani 8.15-18,25-27*)

<sup>69</sup> Nomba Petelo ali naikala panse pa-musolo, umwanakasi umubomfi wakwa simapepo mukalamba aisile kuli ena noku-landa ukuti, "Nobe wine, wakiba na Yesu waku Galili."

<sup>70</sup> Lelo alkene pamenso yabantu bonse ukuti, "Nsisishe fintu ulelandapo,"

<sup>71</sup> Elo afuma mumusolo aya pamwinsi, naumbi umubomfi amumona aeba abantu abaali nabeminina kulya ukuti, "Uyu Muntu akiba na Yesu waku Nazareti."

<sup>72</sup> Nakabili Petelo alkene ukuti, "Ndela-pafye akalumba nsyamwisiba uyu muntu!"

<sup>73</sup> Panuma yakasitafye akalinga abantu abaali nabeminina kulya bapalamine kuli Petelo nokulanda ukuti, "Ikinekine nobe wine uli wamulibena, pantu nemilandile yobe ine yabena Galili."

<sup>74</sup> Petelo ayambile ukuitipa nokulapa ukuti, "Ulya muntu nsyamwisiba!"

Palyapene na mukolwe alila

<sup>75</sup> kabilo Petelo aibwisyey fintu Yesu amwebele ukuti, "Lintu mukolwe talalila, ulenkana imiku itatu ukuti tawangisiba." Elo afumina panse nokuya mukulila ngansi.

**27***Yesu bamutwala kuli Pilato*

(*Mako 15.1; Luka 23.1-2; Yohani 18.28-32*)

<sup>1</sup> Ulukelo basimapepo bakindami bonse na bakalamba ba bantu balikumene baum-fwana fintu bengepaya Yesu.

<sup>2</sup> Balimukakile bamupiita bamutwala ku mulashi Pilato.

*Imfwa yakwa Yuda*

(*Imilimo 1.18-19*)

<sup>3</sup> Lintu Yuda uwamufutwike amwene ukuti Yesu bamupingwila imfwa, alilangulwike pali fintu akitile. Abweseyemo ulupiya lwa siufele amakumi yatatu kuli basimapepo bakindami nentungulusi,

<sup>4</sup> ukuti, "Nalibembwike, pantu nafutwike umuntu uwakaele!"

Bamwaswike ukuti, "Uyo Mulandu obel!"

<sup>5</sup> Yuda aposele ulupiya mwi Tempele nokuyaikulika.

<sup>6</sup> Basimapepo bakindami batolele ulupiya nokulanda ukuti, "Ulu lupiya Iwamulopa, takyasuminisiwa mwifunde Iyesu ukulubika mukipao kya mwi Tempele."

<sup>7</sup> Eikyo baumfwene ukusitamo ibala lyakwa kabumba wa nongo, umwakulasika bamwisa.

<sup>8</sup> Ekintu iyi nkende nandakayi itilwa ukuti "Ibala lya mulopa."

<sup>9</sup> Ifyalandilwe kuli kasesema Yeremia fyalfikilisyey ukuti, "Bapiitile ulupiya lwa siufele amakumi yatatu emutengo untu abena Israeli bamusitisisyepo,

<sup>10</sup> bailesitamo ibala lyakwa kabumba wa nongo ngafintu Imfumu yalandile."

*Yesu na Pilato*

(*Mako 15.2-5; Luka 23.3-5; Yohani 18.33-38*)

<sup>11</sup> Yesu bamutwele kumulashi Pilato uwamwipwisye ukuti, "Busye uuli Mfumu yaba Yuda?" Yesu ayaswike ukuti, "Naulanda."

<sup>12</sup> Lelo lintu basimapepo bakindami na bakalamba balemwebelela, tayaswikepo nangu kimo.

<sup>13</sup> Pilato amwipwisye ukuti, "Busye tauleumfwa ifintu fyonsen ifi fintu balekwebelela?"

<sup>14</sup> Lelo Yesu alikene ukwasukapo isowi nangu limo, iki kyalengele Pilato ukupapa.

*Yesu bamupingwila ukufwa*

(*Mako 15.6-15; Luka 23.13-25; Yohani 18.39—19.16*)

<sup>15</sup> Lyonse pe Pasaka, umulashi alebakakwilapo umufungwa umo untu abantu balefwaya.

<sup>16</sup> Pali iyi nsita kwali umufungwa umo uwali naisibikwa uwaleitwa ukuti Balaba.

<sup>17</sup> Lintu ibumba lyaklongene, Pilato abepwisye ukuti, "Busye ninani mulefwaya imikakwile pali Balaba na Yesu uwitwa Klistu?"

<sup>18</sup> Pilato alisibe ukuti baaletele Yesu kuli ena pamulandu nomufimbila.

<sup>19</sup> Lintu Pilato ali naikala pakipuna kya bupingusi umukasi wakwe amutumine amasiwi ukuti, "Wikita nangu kimo pali uyo muntu wakaele, ninkyusiwa apakalamba mukiloto pamulandu noyo muntu."

<sup>20</sup> Lelo basimapepo bakindami naba kalamba basongelekenye abantu ukuti balombe ukubakakwila Balaba elo Yesu ena bamwipaye.

<sup>21</sup> Pilato aipwisye ibumba nakabili ukuti, "Busye pali aba babili, ninani mulimukufwaya imikakwile?"

Bayaswike ukuti, "Balaba!"

<sup>22</sup> Pilato abepwisye ukuti, "Busye nomba inkite syani kuli Yesu uwitwa Klistu?"

Bonse bayaswike ukuti, "Mutanikeni!"

<sup>23</sup> Lelo Pilato abepwisye ukuti, "Malandu nsi akitile?"

Batampile ukubilisyia nomba ukukilapo ukuti, "Mutanikeni"

<sup>24</sup> Lintu Pilato amwene ukuti tapali kintu engakita kuti ifimfulunganya fyaimafye, aabulile amensi, asamba kuminwe pamenso yabantu bonse nokulanda ukuti, "Nsiliimo muli iyi mfwa ya uyu muntu, mulandu wenufye!"

<sup>25</sup> Ibumba lyonse lyayaswike ukuti, "Lekeni umulopa wakwe ubi pali fweto napabana besu!"

<sup>26</sup> Pilato abakakwilile Balaba, kibili panuma alopola Yesu abapele ukuti bayemutanika.

*Abasilika bapunika Yesu*

(*Mako 15.16-20; Yohani 19.2-3*)

<sup>27</sup> Abasilika ba mulashi batwele Yesu mukipango, elo bakolonganika nempuka ya basilika yonse.

<sup>28</sup> Yesu bamufulile insalu syakwe nokumufwika umwingila wakasika.

<sup>29</sup> Bapikwile injana yamyunga bamufwika kumutwe, nokumufumbatika itete kukulyo. Balemufukamina nokumupunya ukuti, "Mulopwe kanabesa wemfumu ya Bayuda!"

<sup>30</sup> Balemumfwisila amate, bamupoka itete balamuma ku mutwe.

<sup>31</sup> Lintu bapwisisye ukumupunika, bamufulile umukansu bamufwika insalu syakwe, Elo bamutwala mukumutanika.

*Yesu bamutanika*

(*Mako 15.21-32; Luka 23.26-34; Yohani 19.17-27*)

<sup>32</sup> Lintu baleyha, bakumenye umwaume uwalefuma ku Sirene isina lyakwe ni Simoni, kibili abasilika bamupatikisyeyekupiita umusalaba wakwa Yesu.

<sup>33</sup> Bafikile kunkende iyaleitwa Gologota, ikilepilibula ukuti, "Inkende ya Fipaanga".

<sup>34</sup> Bapele Yesu umwangasi wasankana nendusya ukuti anwe, lelo panuma abika palulimi, alikene ukunwa.

<sup>35</sup> Lintu bamutanike, balependula pakwakanwa insalu syakwe.

<sup>36</sup> Nokwikala pansi balamulinda.

<sup>37</sup> Pamulu wamutwe wakwe babikilepo akapampa apalembelwe umulandu unto bamwipailepo ukuti, "Uyu ni Yesu Imfumu ya Bayuda."

<sup>38</sup> Batanikepo notupondo tubili kamo kukulyo nakambi kukuso.

<sup>39</sup> Abapita nsila balepukunya imitwenokutuka Yesu insele,

<sup>40</sup> balelanda ukuti, "Ewebo walelanda ati kuti wabongolola itempele nokulikula nakabili munsiku sitatu! Ngoli Mwana wakwa Lesa ipususye! Ikila pamusalaba!"

<sup>41</sup> Mu musango umowine basimapepo bakindami na bakafundisyia ba Mafunde na bakalamba ba bantu balemupunika ukuti,

<sup>42</sup> "Alepususya bambi, lelo ena teti ai-pususye! Nga nimfumu yabena Israeli, akoke pamusalaba! Elintu twalamusumina!

<sup>43</sup> Aketekele muli Lesa, ale Lesa namapususye ngalimutemwa, pantu alelandati, 'Ndimwana wakwa Lesa!'

<sup>44</sup> Notupondo tubili utwatanikwe pamo nao twalemusalula.

*Imfwa yakwa Yesu*

(*Mako 15.33-41; Luka 23.44-49; Yohani 19.28-30*)

<sup>45</sup> Ukuftuma lintu akasuba kafikile pamutwe pansita ya 12 koloko mukyalo monse mwafitile nafititi, ukufika napansita ya 15 koloko.

<sup>46</sup> Pansita ya 15 koloko Yesu alilile mwisiwi ilikalamba ukuti, "Eloi, Eloi, Lama

sabakatani?" Ikilepilibula ukuti, "Lesa wandi, Lesa wandi, Nikinsi mwandekelesesya?"

<sup>47</sup> Lintu bamo pabaali nabeminina palya baumfwile ifi, balandile ukuti, "Aleita Eliya."

<sup>48</sup> Palyapene, umo pali bena abutwike ayapiita umwepu atubika mu mwangansi wakantuka, autunga kwitete nokupa Yesu ukuti anwe.

<sup>49</sup> Lelo bambi balandile ukuti, "Tulolele, tumone Eliya ngalaisa mupususya!"

<sup>50</sup> Kibili luntu Yesu apundile isiwi lyapamu, awe aleka nomweo.

<sup>51</sup> Pali ilya nsita insalu baali nabatanika mwi Tempel yalepwike pabili ukufuma pamulu ukufika pansi. Isonde lyalitentele, amabwe yalilepawike,

<sup>52</sup> imanda syaliswike, abantu bamusilo abengi abali nabafwa balibusiwe.

<sup>53</sup> Bafumine mu manda, napanuma yakubuka kwakwa Yesu baile musumumba wamusilo, nokuyamonekela kubantu abengi.

<sup>54</sup> Lintu umukalamba wabasilika nabasilika abalelinda Yesu baumfwile makumba nokumona ifintu fyonse ifyakitike, bakwetwe nomwenso nokulanda ukuti, "Mukisinka uyu muntu aali Mwana wakwa Lesa!"

<sup>55</sup> Kwali banamayo abengi, abaletamba akatalamukila, bakonkele Yesu ukufuma ku Galili kukulamatangata.

<sup>56</sup> Pali bena pali Mariya Mangadelena, Mariya nyina wakwa Yakobo na Yosefu, manyina wabana bakwa Zebedee.

#### *Ukusikuka kwakwa Yesu*

(Mako 15.42-47; Luka 23.50-56; Yohani 19.38-42)

<sup>57</sup> Lintu kyali ikyungulo, kwaisile umukankala ukufuma ku Alimateya isina lyakwe ni Yosefu, kibili nao ali musambi wakwa Yesu.

<sup>58</sup> Aile kuli Pilato mukulomba ikitumbi kyakwa Yesu. Pilato apele insambu ukuti bapele Yosefu ikitumbi.

<sup>59</sup> Eikyo Yosefu apitiile umubili wakwa Yesu aupomba munsalu iyipy,

<sup>60</sup> aubika namumanda yakwe iipyia intu afonkwele mwilibwe. Elo akunkulussiyapo ilibwe ilikalamba pamwinsi wamanda aya nokuya.

<sup>61</sup> Mariya Magadalena na Mariya mubiye bali nabekala kulyakwine apalungatene nemanda.

#### *Balonda imanda*

<sup>62</sup> Ubusiku bwakonkelepo, panuma yabusiku bwakupekanya, basimapepo bakindami naba Falise baile kuli Pilato.

<sup>63</sup> Balandile ati, "Mwemfumu, natwibusya fintu ulya muntu wabufi

alelanda luntu ali umumi ukuti, 'Nkabuka nakabili panuma yansiku sitatu.'

<sup>64</sup> Peleni abakulonda imanda yakwe bwino bwino mpanka nobusiku bwabutatu, pakuti abasambi bakwe bekeyamwiba elo bakaleyeba abantu ukuti nabuka kubafwa. Ubu bufi bwakulekesyapo ukukapipo ukukila ubwakwambilapo."

<sup>65</sup> Pilato abebele ukuti, "Piiteni abakulonda, musininkisyе ukuti balonda bwino bwino imanda ngafintu mwisibe."

<sup>66</sup> Efintu bailefenenkesyapo, basyapo nabasilika bakulonda.

## 28

### *Ukusikuka kwakwa Yesu*

(Mako 16.1-10; Luka 24.1-12; Yohani 20.1-10)

<sup>1</sup> Nomba panuma yabusiku bwe Sabata, kumakya pamulungu, Mariya Magadalena na Mariya mubiye baile mukumona imanda.

<sup>2</sup> Kwapitile makumba, pantu malaika wa Mfumu alikile ukufuma kumulu. Ailuwilepo ilibwe pa manda aikala napalya pene.

<sup>3</sup> Imimonekele yakwe yali ngakalumba, nefyakufwala fyakwe fyali ifyabuta tuutu nge mfula yamabwe.

<sup>4</sup> Abalelonda bayambile ukututuma kumwenso, bawile pansi ngabafwile.

<sup>5</sup> Malaika aebele banamayo ukuti, "Mwitiina! Ningisiba mulimukufwaya Yesu untu batanike.

<sup>6</sup> Talimo Lesa namubusya kubafwa ngafintu alandile. Iseni mumone pantu bamulalike.

<sup>7</sup> Kabiyeni mukwangufyanya, muleya eba abasambi bakwe ukuti, 'Nabuka kubafwa, apa alimukuya ku Galili natangilako, ekuntu mukayamonana!' Efintu nakisa mukumyeba."

<sup>8</sup> Eikyo banamayo bafumine kumanda mukwangufyanya, nabesulamo nensansa uku nomwensomo, balebutukila mukweba abasambi bakwe.

<sup>9</sup> Mukupumikisyा Yesu abakumanya nokubeba ukuti, "Umutende ube nemwe," Bapalamine kuli ena baikata ku makasa yakwe balamusinsimuna.

<sup>10</sup> Elo Yesu abebele ukuti, "Mwitiina, kabiyeni mwebe bamuninane ukuti baye ku Galili, ekuntu balaisa mbona."

#### *Akasebo ka bamalonda*

<sup>11</sup> Lintu banamayo baley, abasi-likia bamo abalelonda babwelelemo kumusumba. Baileyebla basimapepo bakindami ifyakitike fyonse.

<sup>12</sup> Basimapepo bakindami bakolongene na bakalamba babantu balaumfwana fintu balakita. Bapele abasilika ulupiya ulwingi

<sup>13</sup> nokubeba ukuti, "Mulelanda ati, 'Abasambi bakwe bakisaiba umubili wakwe ubusiku lintu twakiba mutulo.'

<sup>14</sup> Kibili ngakyakweba ati Umulashi aumfwa ifi, mwikasakamana nelyo kimo tukesiba fintu tukamweba mpaka tukamifumye mubwafya."

<sup>15</sup> Abasilika bapiitile ulupiya bakita ne-fyo babebele ukukita. Ukufika nalelo ili elyasi lyasabankana ku Bayuda.

*Yesu amoneka kubasambi bakwe  
(Mako 16.14-18; Luka 24.36-49; Yohani  
20.19-23; Imilimo 1.6-8)*

<sup>16</sup> Abasambi ikumi limo na umo baile mu Galili palupili pantu Yesu abebele ukuya.

<sup>17</sup> Lintu bamumwene balimusinsimwine, nangu bambi balemutwisika.

<sup>18</sup> Yesu apalamine kuli bena nokubeba ukuti, "Amaka yonse mumulu napano isonde nayapelwa kuli nebo.

<sup>19</sup> Kabiyen'i muleyalenga abantu bonse ukuba abasambi bandi, mulebabatisya mwisina lyakwa Tata, ilya Mwana, nelyakwa Mupasi wamusilo,

<sup>20</sup> kibili mulebafundisya ukulakonka fyonge fintu namikonomesye. Kibili nakulaba namwebo insita yonse, mpaka nakumpela yakyalo."

## Kalata yakibili iyalembelé Paulo kubena TESALONIKA

### UBULONDOLOSI

Inkalata yakibili iyaku Tesalonika yalembelwe na Paulo umutumwa (1.1). Alembelé iyi kalata mukwangufanya panuma alemba kalata yakubalilapo ku Tesalonika, mumyaka amakuni yasano naumo panuma yakufyalwa kwakwa Klistu. Paulo ali akili mu Korinto lintu alembelé iyi kalata ku lukuta mu Tessalonika, ulukuta luntu asangile lintu ali pabulendo bwabubili ubwakusabankanya Imbila (imilimo yabatumwa 17.1-10). Ibuuku lyamilimo yabatumwa lyalandu ukuti ulukuta lwapangilwe naba Yuda bamo bamo elo naba Giriki abaengi.

Ulukuta lyamutesalonika lwalipos-esyeko amano pamulandu wansita yampela elo nokwisa kwakibili ukwakwa Klistu, pantu Paulo alilembelé ifingi pali iyi ilandu muli syonse inkalata sibili isyaku Tesalonika, mupepi napakati kakalata yakibili iyaku Tesalonika yaba pansita yampela. Kabilo Paulo akonkomesye pakukana ikalafye ukwabula ukubomba. Umuntu onse awfile ukubombela ifyakulya fyakwe 3.6-10.

### Imilandu yatantama ngefi

1. Paulo pakulemba iyi kalata atampilepo ukuilondolola umwine elo nabantu bakwe. 1.1-2.
2. Elo atotela Lesa palukuta mu Tessalonika nokubapepela 1.1-12.
3. Mukipande kyabubili, Paulo alanda pansita yampela.
4. Elo alanda pakukana ikala ukwabula ukubomba 3.1-15.
5. Paulo alekelesye mukuposya ulukuta nakabili 3.16-18.

<sup>1</sup> Ninebo Paulo, Sailasi elo na Timote twamilembela mwelukuta lwamu Tessalonika mwebaba muli Lesa shifwe kabilo Nemfumu Yesu Klistu.

<sup>2</sup> Ukusenaminwa elo nomutende fibe namwebo ukufuma kuli Tata elo Nemfumu Yesu Klistu.

### Ubupingusi bwapakwisa kwakwa Klistu

<sup>3</sup> Mwebabwananyina, fwebo tulatotela Lesa lyonsefye pali mwebo, pantu ekilungeme kuli fwebo ukulakita, umusango wakitetelekyo kyenu kilekula apakalamba kabilo nekitemwiwo mwakwatila kila umo naumo kileya kilekulilako.

<sup>4</sup> Eikyo fwebo tulaitakisya mukulanda kwesu pali mwebo, munkuta syakwa Lesa.

Tutasya pafyo mwakonkanyapo ukusumina elo nokushipikisyia lintu mwapita mukayusi nangula ukupakaswa.

<sup>5</sup> Iki kyone kilangililo kyakweba ati ubupingusi bwakwa Lesa bwamulinganya, pakweba ati mwaba abalinga kubufumu bwakwe buntu mukyulila.

<sup>6</sup> Ikyakine Lesa wamulinganya, akakyusya abobonse abamikyusya,

<sup>7</sup> akapwisya amakyusi yenu elyo namakyusi yesu yene. Akakita ifi, ilyo Imfumu Yesu ikamonekela ukufuma mumulu nabamalaika bakwe ababulamba.

<sup>8</sup> Akesa nolubingu lwamulilo ulwakwisa kanda abo bonse abasyaisiba Lesa kabilo nabo bonse abashumfwila Imbila Nsumya Mfumu yesu Yesu.

<sup>9</sup> Bakakyula umuyayaya, kabilo akabafumya namuceni kyakwe elyo namubukata bwabulamba bwakwe,

<sup>10</sup> Lintu akaba nabwela pali bulya busiku, abamusilo bakalamulumbanya, elo abamutetekela nabo bakamukindika, kabilo namwebo mukaba nabena pantu mwalisumina amasiwi yabukambone bwesu.

<sup>11</sup> Eikyo lyonsefye tulamipepela, ukuti mube nemibeele yalinga kubwite buntu Lesa amitako. Pakuti kumaka yakwe engafikilisyia ifisuma fyonsé fintu mufwaya ukukita nokupwilikisyia imilimo yenu yonse intu mubomba mukisumino,

<sup>12</sup> pakweba ati isina lya Mfumu Yesu likatamikwe muli mwebo, namwebo mukatamikwe muli ena, ukulingana ukusenaminwa kwakwa Lesa wesu elyo ne Mfumu yesu Yesu Klistu.

## 2

### Umubifi

<sup>1</sup> Nomba, ukulolenkana nokwisa kwa Mfumu yesu Yesu Klistu kabilo nokukumania kwsu kyapamo nankwe, tulemipata mwe babwananyina ukuti,

<sup>2</sup> tamufwile ukutunsa imitima nangu ukusakamana pamabusesemo yamo, inkalata nelyo utusebo tumo, utulanda ati nifwebo twalandile ati ubusiku bwa mfumu nabwisa kale.

<sup>3</sup> Mwileka uuli onse amilufye munsila ili yonse, pantu bulya busiku tabwakese mpakafye abantu ngabayalukila Lesa kabilo nomuntu mubifi akasokoloke,

<sup>4</sup> uupinkana kabilo uunsansabiukukila pali fyonsé ifitwa tulesa nafyonse fintu abantu bapepa, pakuti akapiite apakwikala mwitempele lyakwa Lesa, nokulalamda ukuti ninebo Lesa.

<sup>5</sup> Busye tamwibusya ukuti ilyo nali namwebo nalimyebele ifi?

<sup>6</sup> Kibili nomba mwalisiba ikyalenga ukuti kwaliba ikyamwikatilila pakuti akaisikolole pansita iyalinga.

<sup>7</sup> Pantu amaka yankama yakwa mpulamafunde, kibili ikili ilabomba kibili fintu nandile ukuti fikakitika, tekuti fikitike kanofye Lesa afumyapo uulenga ifi fintu ukukitika.

<sup>8</sup> Kibili elo mpulamafunde aka-sokoloka, uo Imfumu Yesu ikakifya kumupu wakukanwa kakwe nokumonaula kubukata bwakwisa kwakwe.

<sup>9</sup> Ukwisa kwakwa mpulamafunde kuk-abafye nge mibombele yakwa Satana, ak-abomfyia imisango yonse iyakulangilamo amaka yakwe ukupitila mufisibili ne fipa-pwa ifi fikaba fyabufi.

<sup>10</sup> Kibili akabomfyia nensila syonse isyo umubifi abepelamo abo abaleloba. Bakaloba pantu balikene ukutemwa ikisinka kibili nokupusuka.

<sup>11</sup> Pamulandu waifi Lesa alatuma amaka yakubafulunganya, mukubalenga basumine ifyabufi,

<sup>12</sup> pakuti bonse bakasekwe, pantu balikene ukusumina ikisinka lelo bale-bekelwa mububifi.

#### *Mwalisalwa ukuti mukapusuke*

<sup>13</sup> Lelo lyonse tulatotela Lesa pamulandu wenu mwebatemwikwa ku Mfumu, pantu pakutampa Lesa amisalile ukuti mukabé abantansi ukupusuka, ukupitila mukusan-gululwa kwa Mupasi elo nokusumina muk-isinka.

<sup>14</sup> Lesa amitile pamulandu wa Mbila Nsuma twamisimikile, pakuti mukwateko ubukata bwa mu Mfumu Yesu Klistu.

<sup>15</sup> Eikyo kansi mweba bwananyina beni abashipa nokwikatililila kuntambi twamishilile isyo twamifundile, ukupitila mumasiwi yantu twamyebefye pakanwa, nyantu twamilembele munkalata.

<sup>16</sup> Imfumu yesu Yesu Klistu umwine, na Lesa Tata uwatutemenwe, nokutupela ikikoselesi kyamuyayaya, nokusumina ukusuma ukupitila mukusenaminwa,

<sup>17</sup> akoselesye imitima yenu nokumikosya pakweba ati mulebomba imilimo iisuma yonse nokulalandia ifisuma.

### 3

#### *Muletupepelako*

<sup>1</sup> Mukulekelesya, mwebamunyanane muletupepela ukuti amasiwi yakwa Lesa yatwalilile ukusabankana elo nokupokelelwa nomukinsi, ngefyo kyali pali mwebo.

<sup>2</sup> Kibili mulepepa nokutila twingapokololwa, kubalwani, elyo nabantu ababifi pantu tebonse abakwata ikitetekelo.

<sup>3</sup> Lelo Lesa wakisinka, akamikosya kibili nokumikingilila kububifi.

<sup>4</sup> Kibili twalisintilila mu Mfumu, ukuti mulakita, kibili mwakulakita fintu twamwebele.

<sup>5</sup> Imfumu naitungulule imitima syenu mukutemwa ukwakwa Lesa namukusupikisywa kwakwa Klistu.

<sup>6</sup> Nomba tulemikonomesya mweba bwananyina, mwisina lya Mfumu Yesu Klistu, ukuti talukeni kuli munyina uuli onse uwikala mubunajani, kibili uushikala ukulingana namafundisyo mwapokelele ukufuma kuli fwebo.

<sup>7</sup> Pantu imwe mwebene mwalisiba fintu mufwile ukulatupasyanya, pantu tatwali banajani lintu twali namwebo,

<sup>8</sup> tatwalilepo umukate wamuntu uuli onse ukwabula ukulipa, lelo twale-bombesya kibili twalebomba ubusiku nakasuba pakuti twiba ikisendo ku uli onse pali mwebo.

<sup>9</sup> Tepamulandu wakweba ati tatwakwata isyo nsambu, isyakuti muletutungilila, lelo nipamulandu wakumipela ikilangililo ikisuma ikyakulatupasyanya.

<sup>10</sup> Pantu nelyo twali namwebo, twal-imipele iki ikipope ukuti, "Uwakana ukubomba nokulya elalya".

<sup>11</sup> Pantu tulomfwa ukuti bambo pali mwebo banajani, tababomba inkito baikalilafye ulwambo.

<sup>12</sup> Nomba abantu bapalefyo tulabakonomesya kumaka ya Mfumu Yesu Klistu ukuti balekita fintu bafwile ukulakita pakuti balepanga ubwikasi bwabo.

<sup>13</sup> Mweba bwananyina, mwilatendwa ukulakita ifisuma.

<sup>14</sup> Ngakyakuti uuli onse akana ukukonka fintu twalanda muli iyi inkalata, mumwisibe bwino uyo muntu kibili mwilasangwa nao, pakuti abe nesonni.

<sup>15</sup> Mwilamumona ngo mulwani wenu, lelo mulemusoka ngamunonko.

#### *Amasiwi yakulekelesya*

<sup>16</sup> Nomba lekeni Imfumu yamatende iyine, imipe umutende munsita syonse kibili namusila yonse. Imfumu ibe namwebo bonse.

<sup>17</sup> Nebo ne Paulo nailemba aya amaposyo namaboko yandi. Ngekisibili ku nkalata sintu nemba.

<sup>18</sup> Ukusenaminwa kwa Mfumu yesu Yesu Klistu kube namwebo bonse.

## Kalata yakwa YAKOBO

### UBULONDOLOSI

Ikitabo kyakwa Yakobo kyalembelwe ku muntu wesina ly a Yakobo. Uyu Yakobo ni munyina wakwa Yesu, ulya wali intungulusi mulukuta lwa pakutampa kabil ali mukiliny kya mu Yerusalem (Imili 15.13). Umutumwa Polo nao amwitile ukuti, "Ikisinte" kya lukuta muli Galatiya 2.9. Abamasambililo basumina ukuti ikitabo kyakwa Yakobo kyalembelwe Lintu imyaka amakumi yasano tayalakumana panuma Yesu afyalwa. Apo Yakobo ali intungulusi mulukuta lwamu Yerusalem, alembele ikitabo ninsi aleikala mulya mwine.

Yakobo alembele ikitabo kyakwe "Ku mikowa ikumi limo na sibili isyasangan-gana ikyalo kyonse" (1.1). Amasambililo yamuli Yakobo yabomba ku bena Klistu bonse lelo ifi abomfesye amasiwi yakuti Imikowa ikumi limo na sibili kilangilila ukuti Yakobo alembela abena Klistu aba Yuda. Pantu iki kitabo kyalu nokusabankana amabumba yaba kabellenga, pantu kyalandile pa fikomo ifingi. Yakobo atontele pabwampano bwaba pa kitetekelo ne milimo. Ikitetekelo kyakine kikamonekela mu milimo (2.17). Kabil alandile na pakulakindamikapo abanonka 2.1-4 nokutweba ukuti tulengelela muli fintu tulanda 3.1-12.

### Fyatantama ngefi

Yakobo aposya bakabelenga bakwe mu 1.1

Ikyakonkapo akoselesya abena Klistu ukulasipikisyamafya mu (1 na 2 na 7)

Elo alanda na pafyo kyalinga ikitetekelo ukumonekela mu milimo mu (2 vs 1 na 26).

Panuma yaifyo alanda na pamaka amasiwi yawkwata mu 3.1-12.

Yakobo alondole ifyo amano yakwa Lesa yapusana na mano yapesonde 3.13—4.10.

Ikyakonkapo asoka bakabelenga bakwe pamulandu wakuyumfwa 4.11—5.6.

Yakobo apeisia ikitabo kyakwe mu 5.7—20 mukupeela ifyakulakonka.

<sup>1</sup> Ninebo Yakobo, umubomfi wakwa Lesa ne Mfumu Yesu Klistu namiposya mwemikowa ikumi limo nasibili isyasangan-gana ifyalo fyonse.

### Muleba aba kitetekelo na mano

<sup>2</sup> Mwebabwananina mulekimona ngesyuko amakyusi ya misango misango ngayamisila,

<sup>3</sup> pantu mwalisiba ukuti ukwesiwa kwa kitetekelo kyenu kuleta ukusipikisyam.

<sup>4</sup> Lekeni ukusipikisyam kupwisye umulimo wakuko, pakweba atti muleba abakula, kabil abapwiliilika ukwabula ukubulisyam akantu nangu kamo.

<sup>5</sup> Umo pali mwebo ngaabulisyam amano, alombe kuli Lesa ukuti amupele. Lesa nao uupelesya nensansa kuli onse uwamulomba akamupela.

<sup>6</sup> Lelo pakulomba awfile aketekela ukwabula ukutwisika, pantu onse uutwisika aba nge bimbi ly pali bembamili sunkanisiwa nokupitwa nomwela.

<sup>7</sup> Umuntu uutwisika eenekaza ukupokelela ikintu ikili kyonse ku Mfumu.

<sup>8</sup> Abafye uwabula ukusininkisyam fintu ali nokukita, imilangwe yakwe yaluka alukafye.

### Ubupina nobukankala

<sup>9</sup> Uwabwananyina umupina awfile ukumfwa bwino palifintu Lesa amukindamika.

<sup>10</sup> Nomukankala nao awfile ukumfwa bwino pali fintu Lesa amupoka ubukindami, pantu akalukuta ngeluba ly kyani.

<sup>11</sup> Pantu akasuba katula akabalikisyam, nekabilila kilenga ikyani ukuma. Amaluba ya kyani yalalukuta nokuyemba kwawpa. Mu musango umo wine efintu nomukankala akonaulwa pansita apamfiwe namakwebo yakwe.

### Ukwesiwa no kutunkwa

<sup>12</sup> Alisyuka umuntu uusipikisyam mu mesyo. Pantu ngakimfyamakyusi akapokelela ikilambu kya mweo kintu Lesa alaya abantu abamutemwa.

<sup>13</sup> Ngamwatunkwa, peba nangu umo uufwile ukulanda atti, "Lesa antunkwa." Pantu Lesa tekuti atunkwe ku mubifi kabiliano tekuuti atunke uuli onse.

<sup>14</sup> Lelo umuntu atunkwa lintu ulunkumbwa lwakwe lwamongola no kumukwata.

<sup>15</sup> Elo ulunkumbwa ngalwaimita lufyala ulubembu, kabilo no lubembu nga lwakula lufyala imfwa.

<sup>16</sup> Ala mwilabepwa mwe bwabanana!

<sup>17</sup> Ifyabupe fyonsye ifisuma kabilo ifyapwiliilika fifuma ku mulu. Fifuma kuli Tata uwabumba ifya mumulu ifipela ulubuuto. Uusyaluka ngekinsingwa kilesyunguluka.

<sup>18</sup> Lesa umwine ku kufwaya kwakwe ewatufyele kwi siwi lyakwe ilyakisinka pakuti tube abantansi pa fibumbwa fyakwe fyonse.

### Ukumfwa no kukita

<sup>19</sup> Isibeni iki mwebabwananina abatemwika! Umuntu onse alingile ukuba uwayanguka ukumfwa, lelo uukokola ukulanda nokufulwa.

<sup>20</sup> Ukufulwa kwa muntu takuleta ubulungama buntu Lesa akabila.

<sup>21</sup> Talukeni ku fyakowela fyonse ne misango ibi yonse mukili nayo. Mulenakila Lesa nokupokelela amasiwi yakwe yantu abyala mu mitima yenu ayaba namaka yakumipususa.

<sup>22</sup> Mwilabepa pakupelelafye mukumfwa amasiwi yakwa Lesa lelo mulekita nafintu yalemyeba.

<sup>23</sup> Onse umfwafye amasiwi lelo takita fintu yalandia, aba ngomuntu uwailolesya pamenso mwigilashi.

<sup>24</sup> Kibili lintu aimona aya, kibili palya pene ailaba fintu amoneka.

<sup>25</sup> Lelo onse ulolekesya mu Mafunde ayapwilika. Amafunde ayalenga umuntu ukuba umuntungwa, kibili atwalilila ukwabula ukuba komfwafye ulaba lelo kakita, akaba uwupalwa muli fyonse mumilimo yakwe yonse.

<sup>26</sup> Bonse abalandia ati nibakapepa, lelo tabasunga ululimi lwabo ninsi baibepafye abene nabukapepa bwabo buntu bwabula ubuyo.

<sup>27</sup> Bukepepa ubwalengama kibili ubusyakowela kuli Lesa nyubu, Kwafwa abana bansiwa naba mukamfwilwa muli fintu balekabila nokutalusya umuntu mukukowela kwisonde.

## 2

### *Mwilakita mukisia kinani*

<sup>1</sup> Mwe babwananina, abasumina mu Mfumu yesu Yesu Klistu iyabukata, mwilaba nakapatulula.

<sup>2</sup> Ngakyakuti umukankala uufwele imbalia minwe ya golide nefyakufwala ifyayemba aisa mu njanda muntu mulongene elo nomupina uwaspula nao aisamo.

<sup>3</sup> Ngamwapokelela bwino uufwele insalu isisuma mwamweba ukuti, "Ikala apa apaweme", elo mwaeba umupina ukuti, "Webo kemininge uko, nangu ati, soikale pansi mupepi nanebo,"

<sup>4</sup> Busye ninsi tekapatulula mwakita? Busye ninsi temano ayabi mwabomfyia mukupingula?

<sup>5</sup> Ufweni mwebabwananina abatemwika bandi! Busye Lesa tasala aba bantu abo abantu pano sonde beta ukuti bapina ukuba abakankala mukitetelelo? Abasala ukupanya ubufumu buntu Lesa alaya abamutemwa.

<sup>6</sup> Lelo mwebo mwafupula abapina. Busye tebakankala abamifyengelesya no kumitatanisinsya mufilye?

<sup>7</sup> Busye tebasalula isina likindami iyakwa Yesu lintu mwainikweko?

<sup>8</sup> Nga kyakuti ikine kine mulakita ifunde ilikalamba ilya mumalembo yamusilo iyakuti, "Uletemwa umubyo nga fintu waitemwa," ninsi mulalungika.

<sup>9</sup> Lelo ngamulapatalula ninsi mulabembuka kabilia namusangwa no mulandu wakutoba amafunde.

<sup>10</sup> Uyo onse usunga amafunde yakwa Lesa yonse elo atobapo limo, ninsi apanga umulandu wakutoba yonse.

<sup>11</sup> Pantu uwalandile ukuti, "Wilakita bukende," ewalandile nokuti, "Wilaipaya." Kansi ngataulekita bukende lelo uleipaya ninsi watoba amafunde.

<sup>12</sup> Imilandile yenu nemikitile yenu ileba naga bantu abalepingulwa ku mafunde ayalenga tube abantungwa.

<sup>13</sup> Pantu Lesa takomfwe luse pakupingula umuntu usyakwete uluse. Pantu uluse Iwalikindama pubupingusi.

### *Ikitetekelo ne mikite*

<sup>14</sup> Busye mwebabwananyina, bukumunsi bulimo umuntu ngalandia ukuti alikwata ikitetekelo nomba talebomba nangu kimo? Busye ikyo kitetekelo kuti kyamupususa?

<sup>15</sup> Nga kyakuti munyinenwe nangu nkansi yenu nasapula kibili takwete nefyakulya.

<sup>16</sup> Ngakyakuti umo pali mwebo alanda ukuti, "Mwende umutende, mulefwalla mulekaba, mulelya muleikuta," Lelo takitilepo nangu fimo pali fintu balekabila, busuma nsi bulimo?

<sup>17</sup> Mu musango umo wine, ikitetekelo kyekafye ukwabula ukubombapo nangu fimo kintu kyafwa.

<sup>18</sup> Nomba umo kuti alanda ukuti, "webo naukwata ikitetekelo, nanebo ndabomba imilimo iisuma." Ndanga ikitetekelo kyobe ikyabula imilimo, nanebo nalakulanga ikitetekelo kyandi mu milimo yandi.

<sup>19</sup> Mwasumina ukuti kwabafye Lesa umo mpo. Kisuma! Nengulu sine nasyo syasumina ifyo fine kibili situtuma nomwenso.

<sup>20</sup> We kipumbu kya muntu we! Ulimukufuna nkulange ukuti ikitetekelo kyabula imilimo iisuma kyafye?

<sup>21</sup> Busye kinsi kyalengele Aburahamu ikikolwe kyesu abe uwalungama pamenso yakwa Lesa? Nipamulandu nemilimo isuma akitile lintu atulile umwana wakwe Isaaki ilambo pa kipailo.

<sup>22</sup> Mwamona ukuti ikitetekelo kyakwe nemilimo fyalebomba pamo, kibili nekitetekelo kyakwe kyapwililike kumilimo akitile.

<sup>23</sup> Kibili namalembo yafkilisyey ayakuti, "Aburahamu asumine Lesa, kibili

nekitetekelo kyakwe kyalengele Lesa ukumumona uwalungama pa kinso kyakwe." Kibili Aburahamu aitilwe ukuti ni kibusu wakwa Lesa.

<sup>24</sup> Mwamona ukuti abantu betwa abalungama pali fintu bakita, te pakitetekelofye kyeka.

<sup>25</sup> Epamo pene naku mwanakasi Rahabu kilende. Lesa amumwene uwalungama pa kinso kyakwe pali fintu akitile. Apokelele inengu sya bena Israeli sibili, asyafwilisysako nokufyuka ukubomfyia insila simbi.

<sup>26</sup> Nga filya umubili wamuntu ufwa umupasi wamuntu nga wafumamo, efintu nekitetekelo kiba ikyafwa ngatakilebomba milimo isuma.

### 3

#### *Mulesunga ululimi*

<sup>1</sup> Mwebabwananyina mwileka abengi pali mwebo babe bakafundisy. Pantu mwalisiba ati fwebo fwe bakafundisy tukapingulwa ukukilapo.

<sup>2</sup> Pantu fwebonse tulapanga ifilubo. Nomba umuntu uusilufyanya muli fintu alanda ninsi alipwililika. Kibili ninsi aba muntu uwakwata amaka yakutungulula umubili wakwe onse.

<sup>3</sup> Tubika ikela mukanwa kakwa kabalwe pakuti alekita fintu tulefwaya. Ngatwkaita ifi tulenga kabalwe ukuya konse kuntu tulefwaya.

<sup>4</sup> Tontonkanyeni pakyombo. Nangu kikule syani, nangu kipiitwe nekimwela ikyakosa syani, kipindulwilwafye kukakafi akanono nokuya konse kuntu kensya wakyombo alefwaya.

<sup>5</sup> Ululimi nalo efintu lwaba nangu lube kalundwa akanono akamubili, lulailumbanya ukuti lukita ifyakupapa. Tontonkanyeni fintu impanga iikalamba bayokyafye kuli kamulilo akanono.

<sup>6</sup> Ululimi nalo lwaba kwati mulilo. Pafilundwa fyamibili yesu, ululimi lwaba kwati kyalo ikyaisulamo ububi bonse, lusalanganya ububi mu mubili onse. Lutanda umulilo mu bumi bwesu bonse ubwa pano kyalo kibili lwena lufumya yu mulilo kumbo.

<sup>7</sup> Umuntunse kuti ateeka imitundu yonse iya nama syampaanga, ifyoni, ifikulika ne-fyamuli bemba nakuba fyonse ifi tulafiteeka.

<sup>8</sup> Lelo tapali umuntunse uwingateeka ululimi. Ululimi talutuusya ku bubifi kibili ikyaisulamo no busungu ubwipaya.

<sup>9</sup> Ku lulimi tulalumbanisysako Imfumu na Tata, nakabili ku lulimi lumolwine tulatipwililako abantu banensu ababumbwa mukyata kyakwa Lesa.

<sup>10</sup> Ku kanwa kamo kene kufuma ukutip-wila no kulumbanya, mwebabwananina ifi tefintu kifwile ukuba.

<sup>11</sup> Busye kuti amensi ayasuma na yakikelekese yafuma pa kilambe kimo?

<sup>12</sup> Mwebabwananina, busye umukunyu kuti watwala ifisabo fya miolife, nangu umwangasi ukutwala amakunyu? Ala tekuti ikilambe kya mensi ya kikelekese kifumye amensi ayasuma.

#### *Amano ayafuma kuli Lesa*

<sup>13</sup> Ninani pali mwebo uwamano kibili uwailuka? Uyo afwile ukulanga ukuti wamano kibili muntu wailuka mumikitile yakwe isuma mu fintu akita, mukuikefya nokuba uwamano mulifyonse fintu alekita.

<sup>14</sup> Lelo mu mitima yenu ngamwalikwata umufimbila ngansi no kuitemwa, lekeni ukuyumfwilapo nangu ukukana ikisinka.

<sup>15</sup> Amano yamusango uyo, tayafuma ku mulu, lelo ya pano isonde, teyabumupasi lelo yakwa kiwa.

<sup>16</sup> Pantu uko ukuli umufimbila nokuitemwa, ekuba nekimfulunganya ne misango yabubifi yonse.

<sup>17</sup> Lelo amano ayafuma kuli Lesa yena yaba ayasanguluka, yamutende, yamutembo no bufuke. Elo kibili yakwatisya uluse yakinataye ifisuma. Tayaba namunkisia kinani lelo yaiminina pakisinka.

<sup>18</sup> Ukuba uwalungama pa kinso kyakwa Lesa, efisabo abasopa umutende basombola luntu babyala mu mutende.

### 4

#### *Mwilapanga bukibusa ne sonde*

<sup>1</sup> Busye ifilenga mulesosa nokulapusana fifuma kwisa? Busye temukukonkelela ulunkumbwa ululwisikana muli mwebo?

<sup>2</sup> Mulafwaya ukukwata ifintu nomba tamukwata, ekyo mulepailapo na bantu. Mufimbila ukukwata nomba tamukwata, eco mupusanina no kulwa. Ekyo tamukwatila nipamusango tamulomba kuli Lesa.

<sup>3</sup> Ngamwalomba, tamupokelela pamusango mulomba na mapange ayabi. Mulomba ifintu fyakumisansamusya mwebene.

<sup>4</sup> Mwe bantu bafutatila Lesa mwe! Busye tamwaisiba ukuti ukuba bukibusa nesonde kuba ubulwani kuli Lesa? Kansi onse uwasala ukuba kibusu ne sonde aba mulwani wakwa Lesa.

<sup>5</sup> Mwilatontonkanya ukuti tefisinka ifyalembwa mu malembo ifilandia ukuti, "Lesa alitutemwisia ngansi kabilii alatutfwila ubukwa pamulandu no mupasi untu abika mulifwebo."

<sup>6</sup> Lelo atupela ukusenaminwa ukukalamba. Ekintu amalembo yalandila

ukuti, "Lesa acincintila abafilumba lelo abaikefyia bena alabakwatila ikikuku."

<sup>7</sup> Kansi mulenakila Lesa. Mule ansya Kiwa nao akamibutuka.

<sup>8</sup> Palamineni kuli Lesa nao akapalama kuli mwебо. Mwe babembu sambeni im-inwe yenu! Sangululen iimitima yenu mwеба myalu myalu.

<sup>9</sup> Beni nobulanda, lileni nokuloosya. Lekeni inseko syenu syaluke imisowa nensansa sibe ubulanda.

<sup>10</sup> Muleikefyia pa kinso kya Mfumu, nayo ikamisansabika.

### *Ulwambo telo*

<sup>11</sup> Mwebabwananyina mwila ambana. Onse uwalandi ifibi pali munyina nokumupingula, ninsi alanda ifibi pa mafunde yakwa Lesa no kuyapingula. Kansi ngawapingula amafunde yakwa Lesa ninsi tauleyanakila iyoo lelo ulyeypingulafye.

<sup>12</sup> Kwabafye umo kapela wamafunde kibili kapingula, uwingapususya nokulofya. Nomba busye niwebo nani uwakupingula umubiyio?

### *Amataki teyo*

<sup>13</sup> Umfweni nomba mwebalanda ukuti, "Lelo nangu mailo, tukaya kuli uyu nangu kuli ulya musumba. Tukayapwako umwaka umo, tuyapanga amakwebo nokupanga ulupiya ulwingi."

<sup>14</sup> Tamwaisiba fintu ubwa mailo bukaba. Tamwaisiba ngamukaba abomi. Mwebo mwabafye nga fube fube uumoneka pa kasitafye akanono, kibili mwaluba pantu ele.

<sup>15</sup> Fintu mulingile ukulalanda nifi, "Imfumu nga yafwaya tukaba abomi kibili tutakita ifi na filya."

<sup>16</sup> Nomba mwebo muupanga ifilumba nokulayumfwa. Ukyuyumfwa konse ukwamusango uyu kuntu kwabipa.

<sup>17</sup> Kansi umuntu onse uwaisiba ifisuma fintu awfile ukukita, nomba takita, ninsi lubembu kuli ena.

## 5

### *Mwe bakankala cenjeleni*

<sup>1</sup> Umfweni mwe bakankala, lileni ifilamba, mwangwilepo nemisowa pamusango na makyusi ayalamisila.

<sup>2</sup> Ifyuma fyenu nafibola, kibili nensalu syenu nasiliwa ku buswa.

<sup>3</sup> Golide na Silufele yenu nafikwata in-dalawa. Nesi ndalawa sikaba ekambone wakumisinina. Sikalya imibili yenu kwati mulilo. Mwebo namuitulikila ifyuma mun-siku syakulekelesya.

<sup>4</sup> Moneni ifilambu mwafililwe ukupela ababomfi abalebomba mu mabala yenu

filelilila palimwebo. Imisowa syabalesombola mu mabala yenu, nasifika mu matwi yakwa Lesa Wamaka yonse.

<sup>5</sup> Mubwikasi bwenu ubwa pano isonde mwaleposa ulupiya pa fyakuisansamusya mwebene mweka, nokuilemena. Na-muinya mibusiku ubwakwipaiwa.

<sup>6</sup> Mupingwila abantu bakaele imi-landu nokubepaya mulabepaya, nabo tabakanako nakalya.

### *Muleteka imitima nokupupa*

<sup>7</sup> Mwebabwananyina muleteka imitima mpaka nalintu Imfumu ikabwela. Moneni fintu umulimi ateka umutima pakulo-lela, ifisabo ifisuma fikule fipyе mwibala lyakwe. Ateka umutima nokulolela imfula yakubalilapo ne yakulekelesya.

<sup>8</sup> Nemwe bene muleteka imitima nokwi-minina abakonsa ndi, pamusango ukwisa kwa Mfumu nakupalama.

<sup>9</sup> Mwebabwananyina, mwilaisosya pali fintu umubiyo akita, pakuti mwikapin-gulwa. Moneni Kapingula ali pa mwinsi.

<sup>10</sup> Mwebabwananyina, fisendeni ngekilangililo fintu bakasesema abalelandila mwisina lya Mfumu balekita, baleteka imi-tuda munsita ya makyusi.

<sup>11</sup> Moneni, balya basipikisyia mu makyusi ebo twita abasyuka. Mwalyumfwa ukusipikisyia kwakwa Yobo nafintu Lesa amulambwile pakulekelesya pantu imfumu yafulisyia uluse no kukuntikilwa.

<sup>12</sup> Nekyakilapo mwe bamunyinane mwilalapa mulapo pakulaya ikilayo. Mwilalapa mulu ne ikyalo, nangu ikintu kyonsefye. Lelo mwebo mulelandafye ngani "Ee" ati ee nga ni "Awe" ati awe, ngateifyo Lesa akamipingula.

### *Ipepo lyakitetekelo*

<sup>13</sup> Busye umo pali mwebo ali mumafya? Napeye. Busye umo pali mwebo ali nensansa? Naembe inyimbo syakulum-banya Lesa.

<sup>14</sup> Busye umo pali mwebo nalwala? Naete abakalamba ba mulukuta bamupe-pelele nokumusuba amafuta mwisina lya Mfumu.

<sup>15</sup> Kibili nepempo lya mukitetekelo likalenga umulwele ukupola. Imfumu ikamundapa nokumubelela uluse ngalibe-mbu.

<sup>16</sup> Kansi Muleyebelela imembu kuli kila umo naumo nokulapepelana pakuti mule-pola. Ipepo lya mulungami lilabomba na maka.

<sup>17</sup> Eliya alifye mutu ngafwebo. Apepele pamaka ukuti imfula iloka kibili nayo tay-alokele pa myaka itatu nekipande.

<sup>18</sup> Nakibili apepele ukuti iloke nayo yalilokole nefisabo fyatwala pamusili.

<sup>19</sup> Mwebabwananyina, umo pali mwebo  
nga ayaluka, afuma na munsila yakisinka  
elo umbi amwalulula nakabili, isibeni iki.

<sup>20</sup> Umuntu onse uwayalulula umube-

mbu ukufuma kumibebe yakwe iyalube-  
mbu, akapususya ulya muntu kumfwa ka-  
bili akafimba pa membu isingi.